

Yon Yon beleş mere iğin Yesu niñ yitiñ gayen kayyın

Mere beleş po al hirin

¹ Be, hañkappa wor po megenya nañkinya ma forok yekeyabe Mere goyen hinhin. Mere gobe Al Kurunya hinaryum. Irde Mere gobe Al Kurun. ² Yenbe megenya nañkinya ma forok yekeya Al Kurunya hinaryum. ³ Det kurun gabe yen hitte mat gab Al Kurun beleş forok yiryin. Det kurun forok yiryin gayen Mere go miñmon manhan forok ma yewon. ⁴ Irde yenbe Al Kurunya hugin heñ heñ gote miñ al, irdeb alya bereya Al Kurun yikala yird yird hulsi. ⁵ Irdeb hulsi goreb kidoma bana melak heñ hiyen. Irkeb kidomayen sanin beleş epte ma wor po isikamde hiyen.*

⁶ Be, Al Kurun beleş al kura teñ kerke wayyin. Denembe Yon. ⁷ Yenbe hulsi goyen goke al momon yire yen wayyin. Gogab al tumñan meremin nurde hulsi goke dufaymin taren irnayin yen nurde wayyin. ⁸ Goyenbe Yon yingenbe hulsi mon. Yenbe hulsi goyen goke po tagale yen wayyin. ⁹ Hulsi fudinde alya bereya Al Kurun yikala yirde hiyen gobe Yon kamere gab megen wayyin.

* **1:5:** Miñ kurabe: Goyenbe kidomare niñ alya bereya beleş keneñ bebaş ma teñ hanjen.

¹⁰ Yen hitte mat gab Al Kurun belenbe megen gago iryin. Irkeb wan megen gar hinhin. Goyenbe al megen hinhan mar gare kenej bebak ma tiyamin. ¹¹ Yenbe yingenje alya bereya wor po hitte wan yenya hinhin gega, go ma nurd unenbe igin igin ma iramin. ¹² Goyenpoga al kura pel ma irde dufaymin yen ge tarenj iramin marbe Al Kurunyen dirnen wen hen hen sanj yunyin. ¹³ Dirnen wen hamin gobe megen ninj mata ma gama irde Al Kurunyen dirnen wen hamin. Irde alyen dufayde ire unyat matare ma Al Kurunyen dirnen wen hamin. Yenbe Al Kurunyen dufayde po dirnen wen hamin.

¹⁴ Be, Mere gore po al henbe nenya hinhet. Irdeb tarenmin turun yan wor po goyen dilninde wor po kenej hinhet. Tarenmin turun yan gobe Al Kurun belen Urmin unkenj mun goyen unyin. Yenbe al buninenj yirde faran yurd yurd matamin kurun wor po. Irde mere fudinde manan makin wor po hinhin.

¹⁵ Be, Yon Baptais belen yen ge kuware tagalde gaha yen hinhin: "Al gabe ne belen dinen himyen al go goyen. Yen ge yenbe gaha dinen himyen: 'Al harhokner wayyen al gobe ne kawan ma himirinja bikkenj bikkenj wor po hinhin. Ningeb denemya tarenminyabe nere folek wor po,' dinen himyen gobe gogo," yirin.

¹⁶⁻¹⁷ Be, saba sanjbe Al Kurun belen Mose haniinde kerke yen belen tagalyin gega, buninenj dirde faran durd durdya mere fudindeya gobe Yesu Kristu haniinde kerke yen belen dunyin. Ningeb yen belen buninenj dirde faran durd durd

mata gobe kurun wor po geb, neŋ tumnaŋ guram dirde tareŋ dirde go hende hugiŋeŋ duneŋ tebaŋ dirde hiyen. ¹⁸ Al Kurunbe al kura kintiŋ miŋmon gega, Al Kurun Urmiŋ unjkuren muŋ goreb Al Kurunbe gwahade yeŋ kawan dikala dirde hiyen. Yeŋbe Al Kurunya tunande, irde yeŋya tumnaŋ haryen.

Yon Baptais beŋeŋ saba tagalyiŋ
(*Matiyu 3:1-12; Mak 1:1-8; Luk 3:1-17*)

¹⁹ Be, Yerusalem taunde niŋ Yuda marte doyaŋ mar beŋeŋ Yon Baptais goyen, “ ‘Gebe al ganuŋ?’ ineŋ gusuŋaŋ irnayeŋ,” yiŋeŋ Al Kurun doloŋ ird ird mata doyaŋ marya Liwai marya kura hulyaŋ yiraŋiŋ. ²⁰ Be, mel go waŋ gusuŋaŋ irkeb Yon gobe helwaŋ ma hiriŋ. Irdeb kawan keŋkelak po, “Nebe Mesaia moŋ,” yiŋyiŋ. ²¹ Irkeb sopte gusuŋaŋ irdeb, “Niŋgeb gebe ganuŋ? Ge gayenbe Elaia?” inamiŋ. Inkeb wol heŋbe, “Moŋ, nebe yeŋ moŋ,” yiŋyiŋ. Irkeb mel gore sopte po, “Niŋgeb Mose beŋeŋ Al Kurunyaŋ mere basaŋ al kura wayyeŋ yiriŋ go goyenbe ge gago?” inamiŋ. Irkeb Yon beŋeŋ wol heŋbe, “Moŋ po,” yiŋyiŋ. ²² Irkeb mel gore, “Niŋgeb gebe ganuŋ? Mere bebakkeŋ kura dirkeb mulgaŋ heŋ kuŋbe hulyaŋ dirhaŋ mar goyen bebak yirtek,” inamiŋ. ²³ Irkeb Yon beŋeŋbe Al Kurunyaŋ mere basaŋ al Aisaia beŋeŋ mere tiyiŋ goyen goke yeŋbe, “Nebe al kura sawsawa po kurun naŋa bana goŋ heŋbe,
‘Doyaŋ Al Kurunyaŋ beŋeŋ sope irde huwa irnaŋ!’ yeŋ hiyeŋ yeŋ katiŋ al go goyen,” yiŋyiŋ.
Aisaia 40:3

²⁴ Gwaha yinkeb Yuda marte tikula sanjɩ po gama irde hanjen Farisi mar kura Yuda mar belɩ hulyan yirke wayaminj gore, ²⁵ “Gebe Me-saia moŋ, Elaia moŋ, irde Al Kurunjen mere basan al yitin goyen moŋ yaha gega, danin geb alya bereya baptais yirde ha?” inen gusunjan iraminj. ²⁶ Irkeb wol henbe, “Nebe fe ulin po baptais yirde hime. Goyenbe den han bana gonbe al kura den belɩ al gwahade yen ma nurd unen han al kura hi. ²⁷ Yenbe harhokner ga wayyen. Ne al gahade gare epte ma yen ge ten meten kurun titek hime. Kahan basanminde nin kan urgun kan yugu ten ten gobe meten kurun moŋ gega, go wor epte moŋ yen nurde hime,” yininj.

²⁸ Be, mata ten hinhan kurun gabe Betani taunde, Yodan fe sinɩ kurhan Yon Baptais belɩ alya bereya baptais yirde hinhin belɩ gon forok yirinj.

Yesube Al Kurun Urminj

²⁹ Be, ferd faymindebe Yesu go Yon hitte wan hike kenenbe alya bereya gor gabu irde hinhan mar goyen, “Al Kurunjen sipsip al dirin fonen nen ge ten gitik irtin go iro wan hi iro kennan. Yen kamyen gore gab megen nin marte mata bulun kurun gayen pasi iryen. ³⁰ Nebe al gayen gake yenbe, ‘Al kura harhokner wayyen al gobe ne kawan ma himirinɩya bikken bikken wor po hinhin. Ningeb tarenminbe nere folek wor po,’ yiminj gogo. ³¹ Ne belɩ wan alya bereya baptais yirde himyen gabe al gayen Israel mar yikala yirmeke kenen bebak tinayin yen baptais yirde

himyen. Goyenpoga ne wor bikkenbe Mesaiabe al goyen yeŋ bebak ma teŋ hinhem,” yinyiŋ.

³² Irdeb Yesu baptais irkeya mata forok yiriŋ goyen goke Yon Baptais beleŋ gahade momoŋ yiryiŋ: “Be, naŋkiŋde mat Holi Spirit kalyiŋgi kattiŋ yara teŋ uliŋ hende hike kinmiŋ. ³³ Ne wor go ma nurde unmewoŋ gega, fe beleŋ po alya bereya baptais yirayiŋ yeŋ hulyaŋ niryiŋ Al gore, ‘Al kura Holi Spirit kateŋ yeŋ hende hike kenayiŋ al goreb Holi Spirit beleŋ po alya bereya baptais yiryen,’ ninyiŋ. ³⁴ Niŋgeb mata gwahade goyen yeŋ hitte forok yeke kinmiŋ geb, gago al gabe Al Kurunyen Urmiŋ diŋeŋ hime,” yinyiŋ.

Al karwo Yesuyen komatmiŋ hamiŋ

³⁵ Be, sopte fay urkeb Yon gobe komatmiŋ irawa goya gor huwarde hinhan. ³⁶ Irkeb Yesu waŋ kuŋ hike keneŋbe, “Al Kurunyen sipsip al diriŋ diriŋeŋ iro kinyi,” yinyiŋ.

³⁷ Be, komatmiŋ irawa gobe Yon beleŋ gwaha yeke nurdeb Yesu gama irde kwaryum. ³⁸ Gama irde hike Yesu beleŋ fulgaŋ kaŋ yeneŋbe, “Derbe da niŋ nurde waŋ har?” yinyiŋ. Irkeb irem gore wol heŋbe, “Rabai, gebe dare heŋ kuŋ ha?” ineŋ gusuŋaŋ iraryum. (“Rabai” gobe Grik mere matbe “tisa” yeŋ haŋyen.) ³⁹ Irkeb Yesu beleŋ wol heŋbe, “Wayyi, waŋ gabe kiniryen,” yinyiŋ. Irkeb irem gore gama irde kuŋbe hinhin gasuŋ goyen kenaryum. Irdeb naŋa diliŋbe 4 kilok wawuŋbana hiriŋ geb, goyen nalube Yesuya gor po hinhan.

⁴⁰ Be, Yonyen mere nurde Yesu gama iraryum al kurabe Andru. Yeŋbe Saimon Pita kuliŋ. ⁴¹ Yeŋbe

Yesuya hen gabe gor mat po itin Saimon nin kun naninyin. Irdeb kenenbe, “Deyyabe Mesaia kenhar,” inyin. (Mesaia gobe Grik mere matbe Kristu.) ⁴² Gwaha inenbe Saimon goyen Yesu hitte tawayyin. Tawake Saimon goyen Yesu belen kenenbe, “Gebe Yon urmin Saimon. Gebe Sifas ginen hinayin,” inyin. (Sifas gobe Grik mere mat Pita.)[†]

Yesu belen Filipya Natanielya komatmin yirin

⁴³ Be, go feramin kun fay urkeb Yesu go Galili nanare kwe yen kun hinhin. Kun henya Filip kenenbe, “Wan gama nira,” inyin. ⁴⁴ Filipbe Betsaida taunde nin al. Andruya Pitaya wor gor nin po.

⁴⁵ Be, Filip go kadam Nataniel nin nankenen kurin. Kun kenenbe, “Nenbe Mose belen saba saninminde yen ge kayyin, irde Al Kurunyen mere basan mar manan yen ge asande kayamin al go goyen kenhet. Yenbe Nasaret nin al Yesu, Yosep urmin,” inyin. ⁴⁶ Irkeb Nataniel belen wol henbe, “Nasaret taunde matbe da igin forok yiyen? Epte mon geb,” inyin. Irkeb Filip belen, “Wake kure, irde ga kena,” inyin.

⁴⁷ Be, Yesu belen Nataniel wan forok yeke kenenbe, “Be, Israel mar al fudinde wor po yen kentak albe gago. Yenbe usi ma ten hiyen. Hubu wor po,” yirin. ⁴⁸ Irkeb Nataniel belen, “Gebe daha mat nurd nunha?” inen gusunan iryin. Irke wol henbe, “Gebe Filip belen kun ne nin ma ginkeya fik he yoknare hike genhem,”

[†] **1:42:** Sifas gobe Yuda marte mere, irde Pita gobe Grik marte mere. Deje irawa gote minbe ‘hora kurun’.

inyiñ. ⁴⁹ Gwaha inkeb Nataniel belej, “Rabai, gebe fudinde Al Kurun Urmiñ. Gebe Israel marte Doyañ Al Kurun,” inyiñ. ⁵⁰ Irkeb wol heñbe, “Fik he yokñare hike genhem ginmeke goke tenbe gago dufayge ne niñ tareñ irha? Mata gog mun po moñ geb. Gote folek mata tiñeñ turñun yañ kurayen kurayen wor hako yeneñ heñ taha geb,” inyiñ. ⁵¹ Irdeb sopte gaha inyiñ. “Fudinde wor po dineñ hime, denbe nanñiñ hol yeke Al Kurunyen miyon belej megen mat hiryon hende Al Kurun hitte hurkun megen kateñ teñ hike yennayiñ. Irde hiryon gobe ne Al Urmiñ gayen yeñ bebak tinayiñ,” inyiñ.

2

Yesu belej fe tigiri tike wain hirin

¹ Be, naña fay irawa hubu hekeb Galili naña bana goñ niñ taun kura Kana gorbe al kura bere tirin gote dula mata kurun forok yirin. ² Yesu miliñbe dula mata kurunde gor hinhin. Yesu wor Galili nañare hinhin. Niñgeb yenya komatmiñya wor hoy yirkeb gor kwamiñ.

³ Be, dula mata kurunde gor niñ wainbe hubu hirin. Irkeb Yesu miliñ belej wañbe Yesu goyen, “Mel gabe wain miñmoñ hahan,” inyiñ. ⁴ Irkeb Yesu gore wol heñbe, “Bere,* danin geb gwaha gwaha tiya nineñ ha? Mata tiñeñ turñun yañ titek nalube hako geb,” inyiñ. ⁵ Gwaha inkeb miliñ belej gor niñ meten mar goyen, “Yeñ belej daha kura tinañ dinkeb go po gama irnayin,” yinyin.

* **2:4:** Yesube Mesaia meten goyen miñ uryin geb, miliñ goyen bere inyiñ gogo.

⁶ Be, Yesu hinhin ya bana goŋbe Yuda marte matare haninya kahanya halde ig uliŋ titek fe farde hanjen kuwe hora belej po yirin karkuwan 6 gayen hinhan. Kuwe unkuwenbe fe 100 lita gwahade goŋ hitek. ⁷ Irkeb Yesu belej meten mar goyen, “Kuwe ga fe yunke makin henaŋ,” yinyin. Irkeb fe yunke wan tumnan makin hitin ala tiyamin. ⁸ Irkeb, “Be, fe kura farde yukuŋ dula mata ga tonan hen hi al go unnan,” yinke yen yirin gwahade po tiyamin. ⁹ Gwaha tikeb dula mata gote tonan al goreb Yesu belej fe tigiri tike wain hiriŋ goyen tunan uryin. Goyenbe wain gobe meten mar belej gor nin kura ten wayhan yen ma nuryin. Gega meten mar gobe gwaha mat forok yihi yen nurde hinhan. Be, tonan al gore bere tirin al goyen hoy irke wakeb, ¹⁰ “Albe wain igin wor po go wa yawan yunke nene hanjen. Irde ep nene hikeya gab wain mali malinen goyen yawan yunen hanjen. Goyenbe gebe gwaha ma taha. Wain iginbe kame ga yunen yen nurdeb wain mali malinen goyen hubu heke gab gago igin dunha,” inyin.

¹¹ Be, Galili nana bana nin taun Kana gorbe Yesu belej hanƙapya wor po mata tinen goyen forok iryin. Irkeb komatmin yago mata tinen tunan yan tiyin goyen kenenbe yen ge du-faymin sanin iramin.

Yesu belej Al Kurunyen ya balem bana hora meten ten hinhan mar yakira tiyin

(Matiyu 21:12-13; Mak 11:15-17; Luk 19:45-46)

¹² Be, go kamereb Yesube miliŋya kulin yagoyabe komatminya irde tumnan Kapeneam taunde

kateŋ gor hinhan gega, wawuŋ budam ma hinhan.

¹³ Be, Yuda marte gabu nalu kurun kura Pa-soba† goyen forok yewenj tikeb Yesube taun go tubul teŋ Yerusalem hurkuriŋ. ¹⁴ Kuŋ Al kurunyen ya balem koya milgu irtin bana al gabu irde hanjen sawsawa kurunde gorbe al belenj bulmakaw, sipsipyabe kalyinji yago gor yerke al belenj wanj damu teŋ hinhan goyen yinyin. Irde hora kapyan heŋ heŋ mar‡ manan gasunminde keperde hike yinyin. ¹⁵ Gwahade yenenbe kan kura teŋ det goyen yusulak teŋ teŋde nin det irde gore po dapna goyen tumnanj yusulak tike Al Kurunyen ya balem bana mat sinare katamin. Irde hora kapyan heŋ heŋ marte hora goyen yad yemeyke mali ga megen katamin, irde hora yerd yerd gasun wor yabolonj tiyyin. ¹⁶ Irdeb kalyinji damure nin yerde hinhan mar goyen yinyin. “Det ga yade kat kunan. Daniŋ geb Adoner yabe dawet damu teŋ teŋ gasun irde hanj?” yinyin. ¹⁷ Be, komatminj yago goyen yenj belenj mata tiyyin goyen kenenbe Al Kurunyen asande mere kura katinj hinhin goke binj bak yamin. Merebe

† **2:13:** Bikkenj Israel mar Isip nanja tubul teŋ Kenan kunin tiyaminjabe Al Kurun belenj sipsip al dirin dirnenj gasa yirde darim yade yame kantayan sam yirnayin yinyin. Munan al kura gwaha ma tiyaminj marbe Al Kurunyen miyonj belenj wanjbe mel gote urminj matalinja dapnaminj matalinja goyen tumnanj gasa yirke kamaminj. Gega mereminj gama iraminj marbe miyonminj belenj yubul tiyaminj goke dufay heŋ heŋ ge dula mata teŋ hinhan.

‡ **2:14:** Hora kapyan heŋ heŋ mar gobe al belenj horaminj hoyan goyen yunkeb wolminjenbe Al Kurunyen ya balem bana Al Kurun galak ird irdde ninj hora goyen yunenj hanjen.

gahade:

“Yage goke dufay heñ heñ gore po mununen ten hi,” yitiñ hi. *Tikiñ 69:9*

¹⁸ Be, Yuda marte doyañ mar gor hinhan goreb, “Mata tiñeñ dahade kura Al Kurun beñ po ga irtek goyen kura forok irke keneñbe fudinde gebe mata gahade ird ird tareñge yañ yeñ gentek?” inamiñ. ¹⁹ Irkeb Yesu beñ wol heñbe, “Al Kurunyen ya balem ga upew urnañ. Irkeb ne beñ naña fay karwore po ya kurun goyen sopte irde pasi ireñ,” yinyiñ. ²⁰ Irkeb mel goreb, “Ya balem gayenbe dama 46 hubu heke gab pasi iramiñ. Goyenbe ge beñbe naña fay karwore po ya ga irde pasi ireñ yeñ ha?” inamiñ. ²¹ Goyenbe Yesu beñ Al Kurunyen ya balem niñ yiriñ gobe yinñeñ ge nurde yiriñ. ²² Kame Yesu go kamyinde mat huwarke gab komatmiñ yago goyen Yesu beñ mere tiyyiñ goyen goke biñ bak yamiñ. Irkeb Al Kurunyen mere asañde hi goya Yesu beñ mere tiyyiñ goyen fudinde yeñ nuramiñ.

²³ Be, Yesu go Pasoba gabu kurun nalure Yerusalem hinhinya goyen mata tiñeñ kurayen kurayen Al Kurun po ga yirtek goyen yirde hike yeneñbe al budam yeñ ge dufaymiñ tareñ iramiñ. ²⁴ Goyenpoga Yesube al binde dahade hañ goyen keñkela nurde yuneñ hinhin geb, mel goke hekeñ ma nuryiñ. ²⁵ Yeñbe al dufaymiñdebe gwahade hañ yeñ nurde hinhin geb, al kura beñ wañ al kadam ge tagalde al gobe gwahade gwahade yeñ momoñ irtek ma hinhin.

Yesu belen Nikodemusya mere tiyaryum

¹ Be, Yuda marte doyan mar buda bana gon nin al kura denembe Nikodemus goyen hinhin. Al gobe Farisi mar al. ² Yen belen wawun kurare kura Yesu hitte wanbe, “Rabai, gebe al saba yird yird al, irde Al Kurun belen gad gerke wayan yen nurde hite. Al kura Al Kurunya ma hiriryenbe mata tinen kurayen kurayen ge belen irde ha gayen epte ma iryen,” inyin. ³ Irkeb Yesu belen wol henbe, “Fudinde wor po ginhem. Al kura sopte ma kawan hiyyenbe Al Kurun belen alya bereyamin doyan yirde hi bana gon epte ma hiyen,” inyin. ⁴ Irkeb Nikodemus goreb, “Goyenbe al salannen hitinbe daha mat sopte kawan hiyyen? Daha matbe milin binde hurkun sopte kawan hiyyen? Epte mon!” inyin. ⁵ Irkeb wol henbe, “Fudinde wor po ginhem. Al kura mata bulunmin yubul ten fe po baptais tiyyen, irde Holi Spirit tiyyen al gobe epte al gergen sopte kawan hitin yara hiyyen. Munan gwahade ma tiyyenbe Al Kurun belen alya bereyamin doyan yirde hi bana gon epte ma hurkuyen. ⁶ Albe milin binde mat kawan hen hanyen. Gega kawan hitin mar gobe Holi Spirit belen po gab Al Kurun dilinde al gergen yiryen. ⁷ Sopte kawan hawayin ginhem gake hurkunat ma tiyayin. ⁸ Meje miginbe nurde hityen gega, meje gobe gwaha mat wan gon kwa yen ma po nurde hityen. Ningeb Holi Spirit belen gergen yiryen mar goyen wor megen nin mar belen epte ma al gwahade yen bebak tinayin,” inyin. ⁹ Gwaha inkeb Nikodemus belen, “Mere yen ha gobe daha mat forok

yiyyen?” inyin.

¹⁰ Irkeb wol henbe, “Gebe Israel mar saba yird yird al gega, dahade ningeb merene gayen bebak ma ten ha? ¹¹ Fudinde wor po ginen hime. Nenbe saba fudinde yen nurde hityen goke tagalde hityen. Irde mata fudinde dilnininde yenen hityen goke tagalde hityen. Goyenpoga denbe mereninin goyen fudinde yen ma nurde hanjen. ¹² Nebe igin bebak tinayin mat po megen gar mata forok yen hanjen goyen yade saba dirde himyen gega, denbe fudinde yen ma nurde hanjen. Ningeb Al Kurun hire gor nin mata forok yen hanjen gore saba dirmekeb daha mat fudinde yenayin? Epte mon geb. ¹³ Al kura Al Kurun hire gor kura ma hurkurin. Goyenbe ne Al Urmin gayen ga po gab Al Kurunya hen gor mat katmirin. Ningeb Al Kurunyen gasunde nin mata goyen igin tagaltek hime. ¹⁴ Mose beben sawsawa po kurun nan bana gon Israel marya hinhanya baras ain beben po kunere toney irde he hende kerde isan hirin. Ningeb ne Al Urmin gayen wor Al Kurun beben gwaha po niryen. ¹⁵ Gogab ne nenenbe al tumnan ne nin dufaymin sanin irde Al Kurunya huginen hinayin.

¹⁶ “Al Kurunbe megen nin alya bereya gayen bubulkunne wor po yen nurd yunenbe Urmin unkenen mun goyen basin ma irdeb yunin. Ningeb al kura Urmin goke dufaymin taren iryen al gobe huginen kamde kamdere ma kunbe Al Kurunya huginen hiriryen. ¹⁷ Al Kurunbe alya bereya gayen merem yan yire yen ma Urmin ten kerke katyin. Gwaha titnenbe Urmin beben meten

tiyyen go hende alya bereya yumulgan tiyyen yen Urmin ten kerke katyin. ¹⁸ Niñgeb al kura Urmin goke dufaymin taren iryenbe Al Kurun belen merem yan ma yiryen. Munan al kura Al Kurun Urmin goke dufaymin sanin ma iryen al gobe Urmin unkenen mun goke hekenen ma nuryen geb, bikken merem yan irtin hiyen. ¹⁹ Be, merem yan yird yird gote minbe gahade: hushi kura Al Kurun belen ten kerke megen gar wayyin. Goyenbe albe mata bulun po ten hanen geb, kidoma bana po hitek yirkeb hushi nin amanen ma nurde hanen. ²⁰ Niñgeb mata bulun ten han marbe hushi nin igin ma nurde han. Monjo hulsire forok yeteke mata buluninin kawan henayin yenbe hulsire watek ma yirde hiyen. ²¹ Goyenpoga al kura mata igin igin fudinde po ten hi al gobe hulsire forok yen hiyen. Gogab mata ten hiyen kurun gobe Al Kurunen dufay po gama irde ten hi goyen kawan hekeb al hoyan belen kennayin,” inyin.

Yon Baptais belen Yesu nin kawan po tagalyin

²² Be, go kamereb Yesuya komatminya gobe Yerusalem taun go tubul ten Yudia nana bana gon nin tiyun hoyan yan hoyan yan kwamin. Irde gon nana fay budam ma henya alya bereya baptais yiryin. ²³ Be, goya goyenbe Yon Baptaisbe Salim tiyun bindere Aion gor al baptais yirtek fe iginde wor po hinhin. Niñgeb gor alya bereya turte wan hikeb baptais yirde hinhin. ²⁴ Yon go gwaha ten hinhin gobe fere ten koyare ma keramin ya ten hinhin.

²⁵ Be, Yonyen komatyabe Yuda al kura goya yende matare ig ulin ten ten mataya fe baptais

niŋ kadom mohonɗe tiyamiŋ. ²⁶ Gwaha teŋ Yon hitte waŋbe, “Rabai, Yodan fe ward ironɗ geya hinaruŋ al gobe al baptais yirde hi. Irkeb al tumŋaŋ yeŋ hitte kuŋ haŋ,” inamiŋ. ²⁷ Irkeb Yon belen wol henbe, “Albe mali mali ma meten tinayiŋ. Al Kurun belen meten yuntiŋ goyen po tinayiŋ. ²⁸ Haŋkapyabe, ‘Nebe Mesaia moŋ. Nebe yeŋ ge teŋ mehen hen wamiriŋ,’ diniŋ hinhem goyen denbe nurde haŋ. ²⁹ Al kura bere mekerd unke tewe yeŋ bere gote yare kuyeŋ. Irkeb al gote kadombe waŋ bere tiyyen al gote yare hen al goya beremya mulgaŋ hen waŋ waŋ ge doyaŋ hiyyen. Irdeb al go waŋ mere tike nurdeb amaŋ hiyyen. Niŋgeb al go amaŋ hiyyen gwahade goyen po ne wor Yesuyen mere momoŋ nurdeb amaŋ wor po hihim. ³⁰ Yenbe al denem yaŋ hiyyen, munan nebe denem moŋ hewen.

³¹ “Yenbe Al Kurun hitte mat katyiŋ geb, al megen haŋ kurun gate folek wor po. Munan nebe megen gar forok yimirin geb, megen niŋ al, irde megen mata forok yeŋ haŋ go po ga nurde bebak teŋ himyen. Fudinde wor po, yenbe Al Kurun hitte mat katyiŋ geb, neŋ al megen hite kurun gate tareŋ folek wor po. ³² Yenbe Al Kurunyen gasunde niŋ mata goyen diliŋde yenen, mere kirminde nurde hiyen goke tagalde hiyen gega, al kura meremiŋ nurde fudinde yeŋ ma nurde hanyen. ³³ Goyenbe al kura Yesuyen mere nurde usi ma yiyyenbe Al Kurunyen merebe fudinde yeŋ nurdeb gogo gwaha tiyyen. ³⁴ Al Kurun belen teŋ kerke wayyiŋ al gobe Holi Spirit kenkela wor po untiŋ geb, Al Kurunyen mere po tagalde hiyen.

³⁵ Yenbe Nanin Al Kurun belen bubulkunne wor po yen nurde unenbe det kurun gayen doyan yird yird tareŋ goyen unyin. ³⁶ Niŋgeb al kura Urmin goke dufaymin sanin iryenbe Al Kurunya huginen hiriryen. Munan Urminde mere ma nuryenbe Al Kuruyen bearar bana hiyen geb, yenya huginen heŋ heŋ goyen epte ma tiyen,” yinyin.

4

Yesuya Samaria bere kura goya mere tiyaryum

¹ Be, Farisi mar gobe Yesu belen Yon Bap-tais fole irde al budam baptais yirke komatmin budam heŋ haŋ yeke gote mere momon goyen nuramin. ²⁻³ Niŋgeb Yesu gobe Yudia naŋa go tubul teŋ sopte mulgaŋ heŋ Galili naŋa belen kurin. Goyenbe Yesu yinŋenbe al kura ma baptais yirde hinhin. Komatmin yago belen po ga al baptais yirde hinhan.

⁴ Be, Galili kwe yenbe belenmin Samaria naŋayan mat kurin. ⁵ Kunbe Samaria naŋa bana goŋ nin taunde kura gor forok yirin. Taun gote deŋembe Sikar. Sikar taun gobe megen tapum kura bikken Yekop belen urmin Yosep nin tubul teŋ unyin goyen bindere hinhin. ⁶ Gorbe Yekopyen meten mar belen bikken mete fe tamin kura goyen gor hinhin. Be, Yesu gob belen ulyan kun naŋa baŋkahal heŋ misinen wor po hekeb ulin yul yeke kun mete fete gor keperde usaŋ heŋ hinhin.

⁷ Gor hikeb Samaria bere kura fe fare yen wayyin. Irkeb Yesu belen, “Fe kura nunke newe,” inyin. ⁸ Goya goyenbe komatmin yagobe kun

binje damu tiniŋ yeŋ taun bana goŋ kwamiŋ. ⁹ Be, Yesu beleŋ gwaha inkeb Samaria bere gore wol heŋbe, “Gebe Yuda mar al, munan nebe Samaria niŋ bere. Goyenbe dahade geb fe kura nunke newe ninha?” inyiŋ. Yuda marbe Samaria mar niŋ igiŋ ma nurd yuneŋ awalikde ma hanŋen geb, gogo mere gwahade tiyiŋ. ¹⁰ Be, bere go gwaha yekeb Yesu beleŋ wol heŋbe, “Gebe det igiŋ wor po damum moŋ Al Kurun beleŋ duliŋ guntek gobe det goyen yeŋ nurde, fe niŋ gineŋ hime al gayen neneŋ bebak teŋ ha manhan det goke gusunan nirwoŋ. Irkeb Al Kurunya hugineŋ hitek gird gird fe goyen gunmewoŋ,” inyiŋ. ¹¹ Irkeb bere goreb, “Doyan al, mete gabe dukun wor po. Irde fe fard fard detgem moŋ gega, damde kun nene igiŋ hitek fe goyen farayiŋ? ¹² Fe gabe asininiŋ Yekop, dirneŋ weŋ, sipsipminiŋyabe bulmakawminiŋya beleŋ nene hinhan. Irdeb neŋ ge tubul teŋ dunyiŋ. Niŋgeb ge gayenbe asininiŋ Yekop folek yeŋ nurdeb gogo yaha?” inyiŋ. ¹³ Irkeb wol heŋbe, “Al buda mete fe gayen ga nenayiŋbe sopte fe niŋ yiryen. ¹⁴ Goyenbe fe ne beleŋ yunmeke nennayiŋ mar gobe sopte fe niŋ ma yiryen. Fudinde, fe ne beleŋ yunmeke nennayiŋ gobe Al Kurunya hugineŋ hitekde niŋ fe. Fe gobe fe kura diliŋde mat hugineŋ marde wan hiyen go gwahade goyen geb, fe go niyyen al gote binde forok yeŋ epte ma pet yiyyen,” inyiŋ. ¹⁵ Irkeb bere goreb, “Doyan al, fe ge beleŋ yeŋ ha goyen ne nunayiŋ. Gogab sopte fe niŋ ma niryen. Irdeb sopte fe fard fard niŋ gar ma wan heŋ,” inyiŋ. ¹⁶ Irkeb Yesu beleŋ wol heŋbe,

“Kun almege tupi ten ga wayyi,” inyiñ. ¹⁷ Gwaha inkeb bere goreb, “Nebe almenem moñ,” inyiñ. Irkeb Yesu belenbe, “ ‘Almenem moñ,’ yaha gobe fudinde yaha. ¹⁸ Fudinde gebe al siptesoñon yade yubul tenbe sopte al ten goya har gobe almege moñ. Niñgeb, ‘Almenem moñ,’ ninha gobe fudinde wor po yaha,” inyiñ. ¹⁹ Irkeb bere goreb, “Doyañ al, gebe Al Kurunyen mere basañ al genhem. ²⁰ Goyenbe Al Kurun doloñ ird ird gasunbe asininin yago belen dugu* gayenter wañ doloñ irde hinhan. Gega den Yuda marbe Al Kurun doloñ ird ird gasunbe Yerusalem po yeñ hanjen,” inyiñ. ²¹ Irkeb Yesu belen inyiñ. “Bere, merene ga fudinde yeñ nura ko. Nanne doloñ irnin yenbe dugure gorya Yerusalem taundeya po ma doloñ irtek nalu goyen forok yiyyen. ²² Den Samaria marbe al goyen doloñ irhet yeñ ma nurdeya doloñ irde hanjen. Munañ Al Kurun belen alya bereya yumulgañ ten ten gobe neñ Yuda mar momoñ diryin geb, nenbe al goyen doloñ irde hite yeñ nurdeya doloñ irde hityen. ²³ Goyenbe Al Kurun doloñ ird ird mar kenkelak wor po gore Al Kurunyen mere fudinde goyen binde kerde Holi Spirityen tarende Al Kurun doloñ irtek nalube forok yiyyen. Go nalu gobe hanka gago forok yihi. Al Kurunbe mata gwaha mat doloñ ird ird mar goke nankenen hiyen. ²⁴ Al Kurunbe gogo hi yeñ ma kentek. Yenbe Holi Spirit yara po geb, doloñ irnin yenayin marbe Holi Spirityen tarende meremin fudinde goyen binde kerde gab doloñ irde hinayin,” inyiñ. ²⁵ Irkeb

* **4:20:** Dugu gote denembe Grisim dugu.

bere goreb, “Mesaia gobe wayyen yey nurde hime. Yey belen gab ge belen yey ha kurun goyen min kenkela bebak diryen,” inyin. Mesaiabe Kristu inen hanyen. ²⁶ Be, bere gore gwaha inkeb Yesu belen wol henbe, “Go al gobe mere girde hi al gago,” inyin.

²⁷ Be, Yesu belen bere goya mere ten hikeb komatmin yago goyen mulgan hen wan yenenbe dilin fot yamin. Goyenbe al kura belen, “Danin nurde ha?” inen kurabe, “Danin bere ga mere irde ha?” inen gusunon ma iramin. ²⁸ Be, bere gobe fe fard fard kuwemin goyen gor po tubul tenbe mulgan hen taunde kunbe al momon yirdeb, ²⁹ “Al kura ne mata ten himyen kurun goyen momon nirde pasi wor po hihi. Yenbe Mesaia wet kura nin, wan kennan!” yinyin. ³⁰ Irkeb mel go Yesu kinnin yey kwamin.

³¹ Goya goyenbe komatmin belen, “Rabai, binje ga kura nawa be,” inamin. ³² Irkeb wol henbe, “Nebe binjene yan goyen den go ma nurde han,” yinyin. ³³ Gwaha yinkeb komatmin yago goyen, “Al kura belen binje kura wet yawan una?” yenbe kadam gusunon gird tiyamin. ³⁴ Irkeb Yesu belen, “Nere binjebe nad nerke wamin al gote dufay kenkela gama irdeb meten nunyin goyen ten tukun pasi iren gogo. ³⁵ Irdeb dende mere kurabe, ‘Gagasi sipte po henbe sak nana hiyyen,’ yey hanyen. Goyenbe diltin nankenen Al kurunen metende binje ep hahan ga yennan. Binjebe yad yadi yertek hahan. ³⁶ Al binje yade yadi yiryen al gobe meten tiyyen gote murungem tiyyen. Binje yad yiryen gobe

alya bereya Al Kurunya huginɛn hitek gasunde yukuyen go gwahade goyen. Gogab meten hard hard al goya bingɛ yad yad al goya tumɛnde aman hiriryen. ³⁷ Ningeb mere kura, ‘Al kura belɛn bingɛ haryen. Irkeb al kura belɛn bingɛ yade yadi yiryen,’ yitin gobe fudinde yen nurde hime. ³⁸ Nebe den belɛn bingɛ ma hartin metende gor nin bingɛ yawarnayin yen hulyan dirmin. Al hoyan belɛn meten kurun po titin gote iginɛbe den belɛn yade han gago,” yinyin.

³⁹ Be, Samaria nin alya bereya taun goyenter ninbe bere gore kun, “Al goreb ne mata ten himyen kurun goyen momon nirde pasi hihi,” yinyin geb, Yesu nin dufaymin sanin iramin. ⁴⁰ Ningeb mel gore wanbe, “Nenya gar hinin,” inkeb yenya wawun irawa gor hen saba yirde hinhin. ⁴¹ Irkeb al budam Yesu nin dufaymin taren iramin. ⁴² Irdeb bere goyen, “Hanƙapya nenbe ge belɛn mere momon diran goke dufayninin yen ge taren irtin. Goyenpoga hanƙabe nindiken kirminininde wor po meremin nurdeb fudinde wor po al gabe megen nin alya bereya Yumulgan ten ten Al yen nurhet,” inamin.

Yesu belɛn doyan al kura gote urmin sope iryin

⁴³ Be, Yesu go gor hen wawun irawa hubu hekeb mel go yubul ten Galili nanare kurin. ⁴⁴ Kun henyabe Yesu belɛn yingen ge yen, “Al Kuruyen mere basan marbe nanamde nin mar belɛn palap ma yirde hanyen,” yirin. ⁴⁵ Be, Galili nin marbe Pasoba gabu kurun nalure Yerusalem kun gor Yesu mata ten hinhin goyen kenamin geb,

yeŋ waŋ forok yekeb aman heŋ hoy irde gargar iramiŋ.

⁴⁶ Yesube sopte po Galili naŋa bana goŋ niŋ taun kura Kana, fe gergeŋ tigiri tike wain hiriŋde gor kuriŋ. Gorbe naŋa gote doyaŋ al kurunđe meten al kura gor hinhin. Goyenbe al gote urmiŋbe Kapeneam taunde gor garbam buluŋ po heŋ yamiŋde firtiŋde po hinhin. ⁴⁷ Doyaŋ al gobe Yesu go Yudia naŋare mat Galili forok yihi mere momoŋ go nurdeb yeŋ hitte kuŋ urmiŋ kamtek binde po hiriŋ goyen waŋ sope irwoŋ yeŋ esen mere iryiŋ. ⁴⁸ Irkeb Yesu belen wol heŋbe, “Deŋbe dulneŋ epte ma wor po dufaytiŋ ne niŋ saŋiŋ irnayiŋ. Mata tiŋen kurayen kurayen Al Kuruŋ belen po ga yirtek goyen yenen gab ne niŋ dufaytiŋ tareŋ irnayiŋ,” inyiŋ. ⁴⁹ Irkeb al goreb, “Doyaŋ al, urne kamyenkek geb, wake kure,” inyiŋ. ⁵⁰ Irkeb wol heŋbe, “Urgebe igiŋ hiyyen. Go ma kamyen geb, igiŋ ge kwa,” inyiŋ. Irkeb al gobe Yesuyen mere goyen fudiŋde yeŋ nurdeb yamiŋde kuriŋ. ⁵¹ Be, al go hako kuŋ hikeyabe meten marmiŋ belen waŋ belen kenenbe, “Urgebe igiŋ hiyuŋ!” inamiŋ. ⁵² Irkeb al goreb da nature wor po garbam go urmiŋ tubul tiyuŋ goke gusuŋaŋ yiryiŋ. Irkeb, “Urgebe ki naŋa bul irde naŋa diliŋ unkuŋen gwahade hekeya garbam tubul tiyuŋ,” inamiŋ. ⁵³ Gwaha inkeb diriŋ gote naniŋ goyen Yesu belen, “Urgebe igiŋ hiyyen, go ma kamyen,” inyiŋ mere gobe naŋa diliŋ goyenter wor po ninuŋ yeŋ bebak tiyyiŋ. Irdeb yenya yamiŋde haŋyen mar gobe tumŋaŋ Yesu niŋ dufaymiŋ tareŋ iramiŋ.

⁵⁴ Be, Yesube Yudia nançare mat Galili nançare wañ mata tiñeñ sopte hoyañ kura iryiñ gobe gogo doyañ al gote urmiñ sope iryiñ.

5

Yesu belen al garbam minyañ kura Betesida fe ala siñakde hinhin goyen sope iryiñ

¹ Be, Yesube hinhin, irde nalu kura kuke gab Yuda marte gabu nalu kurun kura forok yekeb Yerusalem kuniñ. ² Yerusalem binde gonbe fe ala kura al po taltiñ Yuda marte mere mat Betesida inen hanjen goyen hinhin. Fe ala gobe hora koya kurun taun go milgu irtiñde yame kura Sipsipyen Yame inen hanjen goyen bindere hinhin. Irde ya kawan yulyañen kura siptesonon goyen fe ala go siñakyañ hinhan. ³⁻⁴ Gorbe al garbam minyañ karim ma wañ ya kawan bana gon hinhan. Diliñ titmiñ, kahan nonbo hitinyabe uliñ kamtiñ yagoya goyen budam wor po wañ gor hinhan.*

⁵ Be, al kura dama 38 gayen garbam hitiñde po hiyen goyen wor gor hinhin. ⁶ Be, Yesu belen gor kun al goyen firtiñde gwahade hike kenenbe al gobe sobamde po bulunen gahade hiyen yen nuryiñ. Irdeb, “Igiñ hemewon yen nurde ha we?” inyiñ. ⁷ Irkeb garbam al goreb, “Doyañ al, fe ugala tike al gore kura farañ nurde nad fete nertek mon. Niñgeb hako ga kurke yen kurut yen

* **5:3-4:** Asañ hoyandebe gahade hi: 4 Irdeb gise hanjka Doyañ Al Kurunen miyon belen fe binde go katen fe korom irde hiyen. Niñgeb miyonmin gore katen fe go korom irke al kura yen wa solok yen fe binde kurkuyenbe garbamin dahade gobe goya po hubu hiyen.

himekeb al hoyan belen wa mehen hen kurkun hanyen,” inyiñ. ⁸ Irkeb Yesu belenbe al goyen, “Huwarade gasunje sope irde ten kwa,” inyiñ. ⁹ Irkeb goyare po al gobe igiñ hiriñ. Irdeb huwarde gasunmiñ sope irde ten kuriñ.

Be, mata gobe Sabat nalure forok yiriñ. ¹⁰ Niñgeb Yuda marte doyan mar belen al igiñ hiriñ al goyen, “Sabat nalure detge yade kun ha gobe Moseyen sabarebe utan irtiñ goyen ten han geb,” inamiñ. ¹¹ Irkeb al gore wol henbe, “Sope nira al goreb, ‘Huwardeb detge ten kwa,’ nina,” yinyiñ. ¹² Irkeb mel goreb, “Gobe ganun al belen wor po gwaha gina?” inen gusunñ iramiñ. ¹³ Goyenbe Yesube al buda kurun bana gon isal po uryiñ geb, al garbam minyan igiñ hiriñ goreb al goyen yen bebakken ma nuryiñ.

¹⁴ Be, kamebe Yesu belen Al Kurunyen ya balem bana gor al go kenenbe, “Ga nura ko. Igiñ hawan geb, sopte mata bulun ma tiyayiñ. Monjo det bulun wor po girtek kura forok yen gunyen geb,” inyiñ. ¹⁵ Irkeb al gobe Yuda marte doyan mar hitte kunbe, “Yesu belen sope nirun,” yinyiñ.

¹⁶ Be, Yesu gob Sabat nalure mata gwahade tiyyiñ geb, Yuda marte doyan mar belen bulun bulun iramiñ. ¹⁷ Irkeb Yesu belen wol henbe, “Adonebe meten titinde po hiyen. Gayenter wor meten ten hi. Niñgeb ne manan gago meten ten hime,” yinyiñ. ¹⁸ Gwaha yekeb mel Yuda marte doyan mar goreb daha mat kura mayteke kami yen kurut wor po yen hinhan. Gobe Sabat naluyen saba ma gama irde hiyen goke po mon. Al Kurun wor neya tunande, irde Adone nigen

yeŋ hiyen goke manan iŋin ma nurdeb gogo mayniŋ teŋ hinhan.

¹⁹ Be, Yesu belen gahade wol hiriŋ: “Fudinde diniŋ hime. Urmiŋbe yiŋgeŋde saŋiŋde epte ma det kura iryeŋ. Naniŋ belen mata kura teŋ hikeb Urmiŋ wor goyen po teŋ hi. Niŋgeb yeŋbe Naniŋ belen mata kura teŋ hike keneŋbe goyen po teŋ hiyen. ²⁰ Naniŋbe Urmiŋ goyen bubulkunne wor po yeŋ nurdeb yeŋ mata teŋ hiyen kurun gob Urmiŋ ikala irde pasi heŋ hiyen. Fudinde deŋbe haŋka mata kenhan gate folek Al Kurun belen Urmiŋ ikala irkeb yeŋ belen kawan forok yiryen. Irkeb deŋ belen yeneŋbe ditiŋ fot yenayiŋ. ²¹ Naniŋ belen al kamtiŋde mat yisaŋ heŋ hiyen gwahade goyen po, Urmiŋ wor al kura Al Kurunya hugiŋeŋ heŋ heŋ goyen une yeŋbe iŋin ala po unyeŋ. ²² Irde Naniŋ yiŋgeŋbe al merem yaŋ ma yirde hiyen. Goyenpoga al merem yaŋ yird yird metenbe Urmiŋ haniŋde kiriŋ. ²³ Gogab al belen Naniŋ turuŋ irde hanŋen gwahade goyen po Urmiŋ wor turuŋ irde hinayiŋ. Al kura Al Kurun Urmiŋ ma turuŋ irde hiyeŋbe teŋ kerke wayyiŋ al Naniŋ wor turuŋ ma irde hiyen.

²⁴ “Fudinde wor po diniŋ hime, al kura merene gayen nurde nad nerke katmiriŋ al goke du-faymiŋ tareŋ iryeŋbe yeŋya hugiŋeŋ heŋ heŋ goyen tenayiŋ. Irdeb yeŋ diliŋde merem yaŋ ma henayiŋ. Go mar gobe hugiŋeŋ kamde kamde mata goyen fole irde Al Kurunya hugiŋeŋ heŋ heŋ mata goyen miŋyaŋ henayiŋ. ²⁵ Fudinde wor po diniŋ hime, nalu kura forok yeweŋ tiya. Go

nalu gobe gago forok yihi. Niñgeb Al Kurun ma nurde unenbe yen dilinde al kamtiñ yara hanjen mar goyen Al Kurun Urminde mere nurnayin. Irde nurde yen ge dufaymin taren irdeb yenya huginen hinayin. ²⁶ Naniñ yingenbe al belen yenya huginen hen hen mata gote min al. Gwahade goyen po Urmin wor Naniñ belen huginen hen hen mata gote min al iryin. ²⁷ Irdeb yenbe Al Urmin geb, alyen mata iginya bulunya pota yird yird sanin goyen manan unyin.

²⁸ “Be, al kamtiñ tumnan Urminde melak nurdeb meteminde mat huwarnayin nalu go wan hi geb, goyen goke hurkunat ma tinayin. ²⁹ Al mata igin igin ten hitin marbe huwarde Al Kurunya huginen hinayin. Munan al mata bulun bulun ten hitin marbe kamtinde mat huwarkeb merem yan yiryen. ³⁰ Nigen tarenbe epte ma daha wet kura tiyen. Alyen mata iginya bulunya yinen himyen gobe Al Kurun belen al gobe gwahade ninke po gabe igin ma bulun yinen himyen gogo. Nebe dufayner ma mata ten himyen. Nad nerke wamirin al gote dufay po gama irde gwaha ten himyen. Niñgeb meten ten himyen gabe huwak geb,” yinyin.

Al hoyan wor Yesube ganun goyen tagalamin

³¹ Be, Yesu belen sopte po gaha yinyin: “Nebe nigen ge yen nebe al goyen yewenbe merene gobe fudinde mon yenayin. ³² Goyenbe ne nin hen mere tagalde hiyen al kura hi. Al gore ne nin tagalde hiyen gobe fudinde yen nurde hime. ³³ Denbe Yon Baptais belen ne nin dahade kura yeke nurtek yen al hulyan yiran. Irkeb

yeŋ beleŋ ne niŋ mere fudinde diruŋ. ³⁴ Nebe al beleŋ ne niŋ heŋ tagalwoŋ yeŋ ma nurde hime. Goyenpoga Yon Baptais beleŋ ne niŋ heŋ tagalde hi goke momoŋ dirde hime gobe deŋ beleŋ ne niŋ dufaytiŋ tareŋ irkeb Al Kuruŋ beleŋ dumulgaŋ tiwoŋ yeŋ nurdeb gago momoŋ dirde hime. ³⁵ Yonyen merebe hulsi kura melak heŋ agat urtiŋ yara alyen dufay wuk irde hinhin. Irkeb deŋbe sobamde ma meremiŋ goke amaŋ heŋ hinhan. ³⁶ Goyenbe metenŋ teŋ himyen gabe Yon beleŋ ne niŋ heŋ tagalde hiyen gote folek. Metenŋe gabe Nanne beleŋ gwaha teŋ pasi irayiŋ ninenŋbe nunyiŋ. Niŋgeb metenŋe gareb fudinde Nanne beleŋ nad nerke wamiriŋ goyen al yikala yirde hi. ³⁷ Irdeb Nanne nad nerke wamiriŋ al gore wor yiŋgeŋ mohonŋe ne niŋ tagaltiŋ hi. Goyenpoga deŋbe melak muŋ kura ma nurde, yeŋbe al gwahade yeŋ ma keneŋ haŋyen. ³⁸ Irde ne niŋ dufaytiŋ saŋiŋ ma irde haŋ geb, nad nerke wamiriŋ al gote merebe bitiŋde ma hi.

³⁹ “Be, Al Kuruyen asaŋbe deŋ beleŋ mali ma kapyan heŋ haŋyen. Kenkela kapyan hetek gab goreb Al Kurunya hugiŋeŋ hitek gobe nende hiyyeŋ yeŋ nurdeya kapyan heŋ haŋyen. Goyenbe asaŋ gobe ne niŋ katiŋ haŋ. ⁴⁰ Niŋgeb ne hitte wanayiŋbe Al Kurunya hugiŋeŋ hitek goyen dende hewoŋ gega, ne hitte waŋ waŋ niŋ bada heŋ haŋ.

⁴¹ “Nebe al beleŋ turuŋ nirnaŋ yeŋ ma nurde hime. ⁴² Irde deŋ gayen al dahade yeŋ nurd duneŋ hime. Bitiŋ banabe Al Kuruŋ niŋ fudinde wor po amaŋeŋ nurd nurdbe hubu wor

po. ⁴³ Nebe Adone belen hulyan nirke wan tareñminde meten ten himyen gega, denbe pel po nirde han. Goyenbe al kura wan yingende tarende po meten ten hikeb gargar irnayin. ⁴⁴ Denbe kadtin belen turun dird dird nin po nurde hanjen. Gega Al Kurun unjuren gore turun dird dird nin mun kura ma nurde hanjen. Niñgeb den belen gwaha ten hinayinbe dahadem dufaytin ne nin sanin irnayin? Epte mon geb.

⁴⁵ “Goyenbe ne belen Adone hitte merem yan diryen yen ma nurnayin. Merem yan dirtek albe Mose geb. Denbe yen ge hekken nurde hanjen gega, yen gore po merem yan diryen geb. ⁴⁶ Yen belen gab asanmindebe ne nin kayyin. Niñgeb den gayen yen ge fudinde hekken nurde hanjen manhan ne nin dufaytin tareñ irwon. ⁴⁷ Goyenbe mere kayyin goke dufaytin tareñ ma irde han geb, daha matbe ne mere ten hime gayen fudinde yen nurnayin? Epte mon,” yinyin.

6

*Al 5,000 binje paka yiryin
(Matiyu 14:13-21; Mak 6:30-44; Luk 9:10-17)*

¹ Be, go kamereb Yesube Galili nanare kurin. Kunbe Galili fe ala kurun goyen sinja kurhan kurin. Galili fe ala kurun gote denjem kurabe Taiberias. ² Be, al budam Yesu belen garbam mar sope yird yird mata tinen karkuwan forok yirke yenamin geb, yen po gama irde kwamin. ³ Irkeb Yesu gob dugu dabayinde kura gor hurkunbe komatminya keperde usan hamin. ⁴ Be, Yuda

marte gabu nalu kurun kura Pasoba goyen binde binde hej hinhin.

⁵ Be, Yesu gob al buda kurun go yej hitte po wan hike yinyin. Irdeb Filip goyen, “Beretbe damde kun damu ten yuntek?” inyin. ⁶ Go inyin gobe yingenbe gwaha tiyen yej nurd nurd ga Filip goyen dulin tunan ure yej gusanan iryin. ⁷ Irkeb Filip belen wol henbe, “Al tunan beret mun kura netek gobe nen bana al kura gagasi ⁸ gayen meten ten hora tiyen gore wor epte ma diryen,” inyin. ⁸ Gwaha yekeb komatmin kura Andru, Saimon Pita kulin belen hardeb, ⁹ “Dirin kura beret muknen siptesonon bali bilmin karka ten palawa yara irtin gore po yirtin goya makan dapna irawaya minyan bana gan hi. Goyenbe go mun goreb al buda kurun gayen daha yiryen?” inyin. ¹⁰ Irkeb Yesu belen wol henbe, “Al buda ga yinke kepernan,” yinyin. Irkeb gorbe yamun budam hinhande geb, goyan keperde tukamin. Al gabu iramin gobe 5,000 gwahade. ¹¹ Be, Yesu belen beret muknen siptesonon go yade Al Kurun turun irde al buda keperamin mar goyen gale hej yunke nene ep namin. Irde makan dapna irawa goyen wor yade gwahade po yiryin.

¹² Be, nene ep neke yenenbe Yesu belen komatmin goyen yinyin. “Beret ep nene yubul tahan ga buda yirnan. Kura mun yubul tike bulun ma henayin,” yinyin. ¹³ Irkeb beret muknen siptesonon namin mar gore ep nene yubul tiyamin goyen buda yirde tiri ¹² gayen makin yiramin. ¹⁴ Be, al buda gobe Yesu belen mata tinen kurun goyen irke kenenbe, “Fudinde, al gabe Al Ku-

runyen mere basan Al kame megen gar wayyen yitiŋ al go goyenbe gago!” yamiŋ. ¹⁵ Goyenbe Yesube mel gore waŋ parsay irde yende Doyaŋ Al Kurun irniŋ teŋ hike nurdeb gor matbe bal heŋ yeŋ unŋkureŋ po dugure hurkuriŋ.

Fe hende huwarde kuriŋ
(*Matiyu 14:22-33; Mak 6:45-52*)

¹⁶ Be, ŋumtuk ureŋ tikeb Yesuyen komatmiŋ yagobe dugu dabayiŋde mat mulgaŋ heŋ Galili fe ala siŋare kurkamiŋ. ¹⁷ Irdeb gor mat Galili fe ala kurun goyen siŋa kurhan Kapeneam beleŋ kuniŋ yeŋ hakwa hende hurkunbe kuŋ hinhan. Gega Yesube mel goya ma kwamiŋ. Be, hako kuŋ hikeyabe kidoma hiriŋ. ¹⁸ Irdeb meŋe kurun tike duba huwariŋ. ¹⁹ Be, mel gobe 5 ma 6 kilomita gwahade kwamiŋ. Irkeb Yesu forok yeŋ fe yuwalheŋ hende huwarde hakwa go tur po wayyiŋ. Waŋ hike keneŋbe kafura wor po hamiŋ. ²⁰ Goyenbe Yesu beleŋ, “Ne waŋ hime ge, kafura heŋ ma,” yinyiŋ. ²¹ Irkeb amaŋ hende Yesu faraŋ urke hakwa biŋde hurkuriŋ. Irkeb gor kuniŋ yeŋ kuŋ hinhande gor bemel po forok yamiŋ.

²² Be, ferd fay uryiŋ goya goyenbe al buda fe ala siŋa kurhan Yesu beleŋ yubul tiyyiŋ marbe gor po hinhan. Mel gore hakwa gor ma hike keneŋbe, “Kibe hakwa unŋkureŋ goyen po gar hinhin gobe Yesuyen komatmiŋ beleŋ teŋ kwaŋ. Gega Yesube yenya tumŋaŋ ma kwaŋ,” yamiŋ. ²³ Be, Doyaŋ Al Kurun beleŋ beret teŋ Al Kurun turun irde al buda go gale heŋ yunke namiŋ gasuŋ bindere gor Taiberias mat hakwa buda kura waŋ forok yamiŋ. Irkeb mel gore Yesube gor

wet hi yeŋ kuŋ naŋkenamiŋ. ²⁴ Goyenbe hakwa bana goŋbe Yesu ma komatmiŋ gwahade muŋ kura ma keneŋbe Yesu niŋ naŋkinniŋ yeŋ hakwa go hende Kapeneam kwamiŋ.

Yesube Al Kurunya hugiŋeŋ heŋ heŋ gote saniŋ miŋyaŋ

²⁵ Be, al buda gobe fe ala goyen siŋa kurhan mat waŋbe Yesu kenamiŋ. Irdeb, “Rabai, daha naŋa gar wayaŋ?” ineŋ gusuŋaŋ iramiŋ. ²⁶ Irkeb wol heŋbe gaha yinyiŋ: “Fudinde wor po dinen hime, deŋbe mata tiŋeŋ Al Kurun belen po ga irtek goyen keneŋ miŋ bebak ma tenya ne niŋ naŋkeneŋ haŋ. Beret nene bitiŋ makin iran goke po teŋ ne niŋ naŋkeneŋ haŋ. ²⁷ Megen niŋ biŋge buluŋ hetek goke ma meten teŋ hinayiŋ. Nene Al Kurunya hugiŋeŋ hitak biŋge goke po meten teŋ hinayiŋ. Biŋge gobe ne Al Urmiŋ gare dunen. Biŋge goyen dunen dunen meten gobe Adone belen basiŋa nirde nunyiŋ,” yinyiŋ. ²⁸ Gwaha yinkeb mel goreb, “Niŋgeb daha wor po teŋbe Al Kurun belen meten goke nurde hi goyen titek?” ineŋ gusuŋaŋ iramiŋ. ²⁹ Irkeb wol heŋbe, “Deŋ belen Al Kurunya meten titek gobe yeŋ belen teŋ kerke wayuŋ al goke dufaytiŋ tareŋ irnayiŋ gogo,” yinyiŋ. ³⁰ Irkeb, “Gwahade kenem mata tiŋeŋ dahade goyen irke keneŋ gabe ge niŋ dufayniniŋ tareŋ irtek? Niŋgeb daha tiyayiŋ? ³¹ Hakot wor po asininiŋ yago sawsawa naŋa bana hinhanyabe biŋge ‘mana’ ineŋ haŋyen goyen nene hinhan. Goyen goke Al Kurunya asande, ‘Al Kurunya gasunde niŋ biŋge yeŋ belen mel go yunke namiŋ,’ gwahade

katiŋ hi,” inamiŋ. ³² Gwaha inkeb Yesu beleŋ wol heŋbe, “Fudinde wor po deneŋ hime, Al Kurunyen gasuŋde niŋ biŋge katke namiŋ gobe Mose beleŋ ma yunyiŋ. Biŋge yunyiŋ albe Adone geb. Irde gayenter wor biŋge fudinde duneŋ hi al gobe Adone. ³³ Al Kurunyen gasuŋde niŋ biŋgebe yeŋ hitte mat katuŋ al gogo. Yeŋ beleŋ po gab alya bereya megen haŋ kuruŋ gayen Al Kurunya hugiŋeŋ heŋ heŋ goyen yuneŋ hiyen,” yinyiŋ. ³⁴ Irkeb mel gore, “Doyaŋ al, haŋka matbe biŋge goyen hugiŋeŋ hugiŋeŋ duneŋ hayiŋ,” inamiŋ.

³⁵ Irkeb wol heŋbe gaha yinyiŋ: “Nebe Al Kurunya hugiŋeŋ hitek biŋge fudinde go goyen. Niŋgeb al kura ne hitte waŋ dufaymiŋ ne niŋ saŋiŋ iryeŋ al gobe biŋge ma kamde fe niŋ ma irde hiyeŋ go gwahade goyen po Al Kurunya hugiŋeŋ heŋ heŋ tareŋ gobe hubu ma hiyyeŋ. ³⁶ Goyenbe dinhem gwahade po, deŋbe ne gayen neneŋ haŋ gega, dufaytiŋ ne niŋ tareŋ ma yirde haŋ. ³⁷ Al tumŋaŋ Nanne beleŋ ne niŋ nuntiŋ mar gobe ne hitte wanayiŋ. Irkeb al ne hitte wanayiŋ mar gobe kura muŋ takira ma tiyeŋ. ³⁸ Nebe Al Kuruŋ hitte mat katmiriŋ gobe dufayne gama irde meten tiye yeŋ ma katmiriŋ. Gwahade yarabe nad nerke katmiriŋ al gote dufay po gama irde meten tiye yeŋ katmiriŋ. ³⁹ Niŋgeb ne niŋ nuntiŋ mar gobe uŋkureŋ muŋ kura tubul timeke pel ma hiyyeŋ. Gwaha irtineŋbe nalu funaŋde mel go tumŋaŋ yisaŋ heŋ al gergeŋ wor po yireŋ. Go tiyeŋ gobe nad nerke katmiriŋ al gote dufay geb, go po gama ireŋ. ⁴⁰ Nanner dufaydebe al tumŋaŋ diliŋbe Urmiŋ hende po irde yeŋ ge po

dufaymiñ taren irnayiñ marbe yenya hugiñen hinayiñ. Irkeb nalu funañdebe ne belen mel go yisañ hewen,” yinyiñ.

⁴¹ Be, Yesu belen yingen ge yen, “Nebe biñge fudinde Al Kurun hitte mat katmiriñ,” yeke nurdeb Yuda mar gore Yesu niñ igiñ ma nurde siksiksuk tiyamiñ. ⁴² Irdeb, “Al gabe Yosep urmiñ Yesu moñ? Naniñya miliñyabe nurde yunen hite. Goyenbe dahade niñgeb yingen ge yen, ‘Nebe Al Kurun hitte mat katmiriñ,’ yen hi? Mere gobe kukuwamnen wor po!” yamiñ.

⁴³ Irkeb Yesu belen, “Merene goke igiñ ma nurde siksiksuk ten hañ gobe bada henan. ⁴⁴ Al kura yingen epte ma ne hitte wanayiñ. Nanne nad nerke wamiriñ al gore gab bul yirke ne hitte wanayiñ. Irkeb nalu funañdebe go mar gobe ne belen kamtiñde mat yisañ hewen. ⁴⁵ Al Kurunyen mere basañ mar porofet buda belen asañde, ‘Al Kurun belen mel goyen tumnañ saba yiryen,’ katiñ hi gwahade goyen po, al kura Adoner mere nurde sabamiñ bebak tinayiñ mar gobe tumnañ ne hitte wanayiñ. ⁴⁶ Al kura Nanne ma kintiñ. Goyenpoga ne yen hitte mat watiñ al gare po ga kintiñ. ⁴⁷ Fudinde wor po dinen hime, al kura ne niñ dufaymiñ sañiñ irnayiñbe Al Kurunya hugiñen hinayiñ. ⁴⁸ Niñgeb al belen nene Al Kurunya hugiñen hitek biñge gobe ne gago. ⁴⁹ Asetiñ yagobe sawsawa po kurun nana bana kuñ henya biñge ‘mana’ inen hanjen goyen nene hinhan gega, tumnañ kamamiñ. ⁵⁰ Goyenbe biñge fudinde Al Kurun hitte mat kattin gobe gar hi. Al kura biñge go niyyenbe Al Kurun diliñde

al kamtiŋ yara ma hiyyeŋ. ⁵¹ Nebe al belen nen Al Kurunya hugiŋeŋ hitekde niŋ biŋge Al Kurun hitte mat kattin goyen. Niŋgeb albe biŋge nene gabe tareŋ heŋ hanyen gwahade goyen po, ne niŋ dufaymin tareŋ irnayin marbe Al Kurunya hugiŋeŋ hinayin. Biŋge gobe ne gago. Alya bereya megen haŋ kurun gayen Al Kurunya hugiŋeŋ hinayin goke teŋ nigeŋ gasonne yunen,” yinyin.

⁵² Be, Yesu belen gwaha yinkeb Yuda mar goyen mere tiyyin goke teŋbe, “Al gab dahadem yingen gason dunke netek?” yeŋbe yingen bana gon bipti forok irde yingen ulin kadam mohonde tiyamin. ⁵³ Irkeb Yesu belen yinyin. “Fudinde wor po dineŋ hime, ne Al Urmin gate gasonneya darineya ma nenayinbe Al Kurunya hugiŋeŋ heŋ heŋ gobe epte ma dende hiyyeŋ. ⁵⁴ Munan al kura gasonneya darineya niyyeŋ al gobe Al Kurunya hugiŋeŋ heŋ heŋ gobe yende hiyyeŋ. Irkeb nalu funandeb al gobe isan heweŋ. ⁵⁵ Gasonnebe nene Al Kurunya hugiŋeŋ hitek biŋge wor po, irdeb darine wor nene Al Kurunya hugiŋeŋ hitek fe wor po go goyen. ⁵⁶ Niŋgeb al kura gasonneya darineya niyyeŋ al gobe neya hireŋ. Irkeb ne wor yeŋya hireŋ. ⁵⁷ Adone gwahader hitin al gore nad nerke megen gar katmirin. Irde yende saninde ne wor hugiŋeŋ heŋ heŋ tareŋnem yan hime. Niŋgeb al kura gasonne niyyeŋ al gobe tareŋner Al Kurunya hugiŋeŋ hiriryen. ⁵⁸ Nebe biŋge Al Kurun hitte mat kattin go goyen. Asetin yagobe biŋge ‘mana’ inen hanyen goyen nene hinhan gega, kun kunbe kamamin. Goyenbe al

kura ne binje yeŋ hime gayen niyyeŋ al gobe Al Kurunya hugiŋeŋ hiriryen,” yinyiŋ. ⁵⁹ Be, mere gabe Kapeneam taun bana Yuda marte gabu yare al saba yirde henya tiyyiŋ.

Yesuyen komatmiŋ yago budam tubul teŋ kwamiŋ

⁶⁰ Be, sabamiŋ go nurdeb Yesuyen komatmiŋ yago kura beleŋ, “Saba gabe epte ma bebak titek, meteneŋ wor po. Ganuŋ beleŋ epte nurde gama iryen?” yamiŋ. ⁶¹ Irkeb Yesu go komatmiŋ yago goyen yiŋgeŋ uliŋ mere goke ŋagak yeŋ hike nurdeb, “Merene gare dufaytiŋ haga ira? ⁶² Gwahade kenem kame ne Al Urmiŋ gayen bikkeŋ hinhemde mulgaŋ heŋ hurkumeke neneŋbe dahade nurnayiŋ? ⁶³ Al Kurun diliŋde al gergeŋ ird ird gobe Holi Spirit beleŋ po ga iryen. Megen niŋ marte saŋiŋde epte ma gwaha irnayiŋ. Merene gayen al kura beleŋ fudiŋde yeŋ nuryeŋbe Holi Spirit beleŋ al goyen Al Kurun diliŋde gergeŋ wor po iryen. ⁶⁴ Goyenbe kuratiŋ kurabe merene gayen fudiŋde yeŋ ma nurde haŋ,” yinyiŋ. Gwaha yinyiŋ gobe meteneŋmiŋ miŋ urde komatmiŋ yawaryiŋde mat po ganuŋ beleŋ yeŋ ge dufaymiŋ tareŋ ma irnayiŋ, irde ganuŋ beleŋ asogom haniŋde kiryen goyen keŋkela nurde hinhin geb, gogo yinyiŋ. ⁶⁵ Irdeb sopte yinyiŋ. “Kuratiŋ kura beleŋ merene pel irnayiŋ goke teŋbe, ‘Al kura yiŋgeŋ epte ma ne hitte wanayiŋ, Nanner tareŋde po ga ne hitte wanayiŋ,’ dinhem gogo,” yinyiŋ.

⁶⁶ Be, mere go yiriŋde matbe komatmiŋ yago budambe gama ird ird niŋ bada hamiŋ. ⁶⁷ Irkeb

Yesu beley komatmiŋ 12 goyen, “Deŋ manan nubul tiniŋ yeŋ nurhaŋ?” yineŋ gusuŋaŋ yiryiŋ. ⁶⁸ Irkeb Saimon Pita beley wol heŋbe, “Doyaŋ Al Kuruŋ, ge po ga al beley nurde Al Kuruŋya hugineŋ hitek merege yaŋ geb, gubul teŋ ganuŋ hitte kutek? ⁶⁹ Irde gebe Al Wukken wor po Al Kuruŋ hitte mat wayariŋ yeŋ nurde dufayniniŋ saŋiŋ irde hite, irde gebe fudinde al gwahade yeŋ nurde guney hite,” inyiŋ. ⁷⁰ Irkeb Yesu beley wol heŋbe, “Deŋ komatne 12 gayenbe nigeŋ po basaŋa dirmiŋ. Goyenpoga kuratiŋ kurabe Satanyen dufay gama irde hi geb!” yinyiŋ. ⁷¹ Gobe Yudas, Saimon Iskariot urmiŋ niŋ nurdeb gogo yiriŋ. Yeŋbe Yesuyen komatmiŋ 12 bana hinhin gega, kamebe yeŋ beley Yesu goyen asogom haniŋde kiryiŋ.

7

Yesube gabu nalu kuruŋ kura “Ya Kawan Heŋ Heŋ” iney hanŋen goke Yerusalem hurkuriŋ

¹ Be, Yuda marte doyaŋ mar Yudia naŋare hanŋen goreb Yesu mayniŋ yeŋ yeŋ ge doyaŋ heŋ hinhin. Niŋgeb Yesube go nurdeb kamde kamde nalumiŋbe hako hinhin geb, Yudia naŋa beley kutek ma iryiŋ. Irkeb Galili naŋa bana goŋ po heŋ kuŋ hinhin. ² Goyenbe Yuda marte gabu nalu kuruŋ kura “Ya Kawan Heŋ Heŋ” iney hanŋen goyen forok yetek binde heŋ hikeb ³ Yesu kuliŋ yago beley, “Naŋa ga tubul teŋ Yudia naŋare kwa ko. Gogab mata tiŋeŋ turuŋ yaŋ wor po forok yirde hayen goyen gor niŋ komatge yago wor yennayiŋ. ⁴ Al kura al budam beley nurd nunwoŋ

yeŋ goya banare ma mata teŋ hiyen geb. Gebe mata tiŋeŋ turŋuŋ yaŋ forok yirde hayen geb, naŋa kurunŋ gayen bana gebe al gwahade yeŋ alya bereya yikala yirde kuŋ hayiŋ,” inamiŋ. ⁵ Yesu kuliŋ yago yiŋgeŋde wor yeŋ ge dufaymiŋ taren muŋ kura ma iramiŋ geb, gogo gwaha inamiŋ.

⁶ Goke teŋbe Yesu beŋeŋ wol heŋbe, “Gwaha teŋ teŋ nalunebe hako geb. Munanŋ deŋ hittebe nalu kurunŋ gabe igiŋ ala po. ⁷ Megen niŋ marbe epte ma deŋ haram dirnayiŋ. Goyenbe nebe yeŋ mata teŋ haŋ gobe buluŋ teŋ haŋ yeŋ hugiŋeŋ yineŋ himyen geb, goke igiŋ ma nurd nuneŋ haŋ. ⁸ Niŋgeb deŋbe igiŋ niŋ gabu nalu kurunŋde gor kunaŋ ko. Nere kuŋ kuŋ nalu wor pobe hako geb, nalune forok yeke gab hurkeŋ,” yinyiŋ. ⁹ Be, Yesu go gwaha yineŋbe Galili gor po hinhin.

¹⁰ Irkeb kuliŋ yagobe Yesu go gor po tubul teŋbe Yerusalem kwamiŋ. Gega Yesu wor kame gab balmiŋ hurkuriŋ. ¹¹ Be, gabu nalu kurunŋ goyenter Yuda marte doyanŋ mar beŋeŋ yeŋ ge nanŋkeneŋbe, “Al gobe dare hi?” yeŋ gusuŋaŋ heŋ hinhan.

¹² Be, Yerusalem al gabu iramiŋ bana kurunŋ gob yeŋ ge sisure tagaltiŋ ala teŋ hinhan. Kura beŋeŋbe, “Yeŋbe al igiŋ,” yekeb, kura beŋeŋ, “Moŋ, yeŋ beŋeŋ al usi yirde hi,” yeŋ hinhan. ¹³ Goyenbe Yuda marte doyanŋ mar goke kafura heŋbe al kura beŋeŋ Yesu niŋ muŋ kura kawan ma ŋut yeŋ hinhan.

Yesu beŋeŋ gabu nalu kurunŋde gor al saba yiryiŋ

¹⁴ Be, gabu nalu kurunŋ goyen kuŋ kahalte heweŋ teŋ hikeyabe Yesu gob Al Kurunŋyen ya

balem koya milgu irtin bana al gabu irde hanjen sawsawa kurunde gor hurkunbe al saba yirijn. ¹⁵ Irkeb Yuda mar belej nurde hurkunkat tenbe, “Al gabe saba mun kura ma titin gega, dufay kurun gabe dare nin tiyun?” yamin.

¹⁶ Irkeb meremin go nurdeb Yesu belej wol henbe, “Saba ten hime gabe nere mon. Saba gabe nad nerke wamirin al goyen hitte mat wan hi. ¹⁷ Al kura Al Kurunyen dufay gama ire yen nuryen al gobe saba ten hime gayen Al Kurun hitte mat wan hi ma nigen dufayde mere ten hime goyen bebak tiyen. ¹⁸ Al kura yingen dufayminde mere ten hiyen al gobe al belej turun nirnan yen gwaha ten hiyen. Goyenbe al kura metenje tiyayin yen hulyan iryin al goyen turun irnan yen meten ten hiyen al gobe al fudinde, usi minmon. ¹⁹ Den belej saba taren gama irde hanjen gobe Mose belej dunyin. Goyenbe den kurun gayen saba goyen kenkela ma gama irde han. Gega danin mununnin ten han?” yinyin. ²⁰ Gwaha yinkeb al buda gor gabu iramin goreb, “Al kura mugunen ma ten hi geb, danin gwaha yaha? Gebe ungurage yan,” inamin. ²¹ Irkeb wol henbe, “Nebe Sabat nature kura mata tinen turun yan unkurun forok irmin. Irkeb goke hurkunkat tiyan. ²² Goyenbe den wor Mose belej urtin yago guba yen yunnayin yirin goyen gama irtek yenbe Sabat nature meten ten hanjen. (Guba yen yen mata gobe Mose belej ma min uryin. Asetin yago mehende hinhan gore min uramin.) ²³ Ningeb dirin kura gote guba yen yen nalu goyen Sabat nature forok yekeb Sabat nalu

go yeŋ bada ma heŋ hanŋen. Irde Sabat nalure bulun tihit yeŋ ma nurde hanŋen. Niŋgeb ne wor al kura Sabat nalure sope irmeke iŋiŋ wor po hiyuŋ gega, danŋiŋ bitŋiŋ ar nirde haŋ? ²⁴ Niŋgeb deŋbe al kura matamiŋ siŋare niŋ goyen po keneŋ goke ma tagal unnayiŋ. Gwaha titŋeŋbe al gore mata teŋ hi gote miŋ keŋkela bebak teŋya ga gobe iŋiŋ ma bulun innayiŋ,” yiniŋiŋ.

Yesube Mesaia?

²⁵ Be, mere gwahade yeke nurdeb Yerusalem niŋ mar kura beleŋ, “Al gabe nende doyaŋ mar beleŋ mayniŋ yeŋ kurut yeŋ haŋ al go goyen moŋ? ²⁶ Al gabe kawan po mere teŋ hi. Goyenbe mel gore daha wet kura ma ineŋ haŋ. Niŋgeb doyaŋ mar wor yeŋbe Mesaia yeŋ nurde haŋ wet? ²⁷ Goyenbe neŋbe al gabe gor niŋ yeŋ nurde hite. Gega Mesaia wayyeŋbe gor kura mat waya yeŋ ma po nurtek,” yamiŋiŋ.

²⁸ Be, mel gore gwaha yekeb ya koya milgu irtiŋ bana al gabu irde hanŋen sawsawa kurunde gor po Yesu gore al saba yirde heŋyabe kuware, “Deŋbe fudinde ne gayen keŋkela nurd nunen haŋ? Irde gor mat wayuŋ yeŋ nurde haŋ? Moŋ, deŋbe go ma nurd nunen haŋ geb. Nebe du-fayner ma gar wamiriŋ. Adone beleŋ nad nerke wamiriŋ. Matamiŋbe fudinde wor po. Goyenbe deŋbe go ma nurde unen haŋ. ²⁹ Goyenpoga nebe yeŋ beleŋ nad nerke wamiriŋ geb, keŋkela nurde unen hime,” yiniŋiŋ.

³⁰ Be, Yesu beleŋ go yiriŋ muŋ goke teŋbe teŋ mayniŋ tiyamiŋ. Gega mayke kamtek nalube hako hinhin geb, mayniŋ yeŋ kurut yamiŋ gega,

kura muñ sisañ ma uramiñ. ³¹ Goyenbe al buda bana goñbe al budam Yesu niñ dufaymiñ sañiñ irtiñ hinhan. Niñgeb mel goreb, “Mesaia hoyañ damiñ belej wañbe al gare mata tiñeñ karkuwan forok yirde hi goyen fole irde budam po iryen? Epte moñ!” yamiñ.

³² Be, Farisi mar gobe al belej mere gwahade teñ sisu balgarat teñ hike nuramiñ. Irdeb Al Kurun doloñ ird ird mata doyañ marte karkuwanmiñya Farisi marya belej Yesu fere tiniñ yeñ Al Kurunyen ya doyañ irde hanyen mar hulyañ yiramiñ.

³³ Be, Yesu belej, “Nebe nalu ulyañde ma denya heñbe mulgañ heñ nad nerke wamiriñ al hitte kweñ. ³⁴ Irkeb ne niñ nañkennayiñ gega, go ma nennayiñ. Irdeb ne heñde gorbe deñ gwahade mar gobe epte ma kunayiñ,” yinyiñ. ³⁵ Irkeb Yuda mar goreb yiñgeñ uliñ, “Al gabe dam belej neñ epte ma kentekde kweñ yeñ yeñ hi? Yeñbe nende al burgagaw kerde Grik marte nañare kwamiñ belej goñ kuñ Grik mar wet saba yireñ yeñ yeñ hi? ³⁶ Gobe daha yihim yeñbe, ‘Ne niñ nañkennayiñ gega, go ma nennayiñ. Irdeb ne heñde gorbe deñ gwahade mar gobe epte ma kunayiñ,’ yeñ hi?” yamiñ.

³⁷ Be, gabu nalu kurun goyen kuñ kuñ nalu funañde hiriñ. Nalu funañ gobe Yuda mar belej nalu kurun yeñ nurde hanyen. Be, nalu go forok yekeb Yesu belej huwardeb kuware gaha yinyiñ: “Al kura fe niñ irkeb ne hitte wañ fe niyyeñ. ³⁸ Niñgeb al kura ne niñ dufaymiñ tareñ iryenbe Al Kurunyen asañde katiñ gwahade goyen po, Al

Kurunya hugiñeñ heñ heñ matare niñ fe gore binde mat marde wañ hiyeñ,” yinyiñ. ³⁹ Be, Yesu beleñ fe kahañyañ merem tiyyiñ gobe kame al kura yeñ ge dufaymiñ tareñ irnayiñ marbe Holi Spirit tenayiñ yeñ gogo yiriñ. Gega goyenterbe Yesu goyen Al Kurun hitte ma mulgañ heñ hurkuñ denem turñuñ yañ goyen go ma tirinde hinhin geb, Holi Spiritbe kateñ miñmoñ.

⁴⁰ Be, meremiñ go nurdeb al kura beleñ, “Fudinde, al gabe kame wayyeñ yitiñ Al Kurunyen mere basañ Al go goyen gago,” yamiñ. ⁴¹ Irkeb kura beleñbe, “Yeñbe Mesaia,” yamiñ. Goyenbe kura beleñ, “Moñ, Mesaiabe Galili nañare mat ma wayyeñ geb. ⁴² Al Kurunyen asañdebe Mesaiabe Dewityen miñde mat forok yiyyeñ, irde Dewit hinhin taunde Betlehem gor kawañ hiyyeñ yitiñ moñ?” yamiñ ⁴³ Be, Yesu niñ teñbe al buda goyen kurabe Yesu niñ hekeb kurabe Yesu asogo iramiñ. ⁴⁴ Kura beleñ Yesu go teñ mayniñ yeñ kurut yamiñ gega, sisañ ma po uramiñ.

Yuda marte doyañ marbe Yesu niñ dufaymiñ sañiñ ma iramiñ

⁴⁵ Be, ya balem doyañ irde hanyen mar go Yesu fere tiniñ yeñ kwamiñ gega, walip yeñ nurdeb mulgañ heñ Al Kurun dolon ird ird mata doyañ marte karkuwañmiñya Farisi marya hitte kwamiñ. Kukeb yeñ beleñ, “Daniñ al go teñ ma wayhañ?” yineñ gusuñañ yiramiñ. ⁴⁶ Irkeb ya balem gote doyañ mar beleñ wol henbe, “Al kura beleñ yeñ mere igiñ po teñ hi gwahade kura ma teñ hiyeñ,” yinamiñ. ⁴⁷ Irkeb Farisi

mar goreb, “Den wor al gore usi dirde bitin yawara?” yinamin. ⁴⁸ Irdeb, “Doyan marya Farisi marya kura dufaymin al goke tarej irke yenan? Hubu wor po geb! ⁴⁹ Al buda Moseyen saba kenkela ma nurde hanj mar goreb gogo gama irde hanj. Go mar gobe Al Kurunyen bearar bana po hinayin,” yamin. ⁵⁰⁻⁵¹ Irkeb Nikodemus belen huwardeb, “Nende sabarebe al kura merem yanj irtek yenbe al gote mere wor wor nurde gab merem yanj irnayin yitin monj?” yinenj gusunjan yiryin. Nikodemusbe Farisi mar al gega, hakot yen belen kunj Yesu kenenj sabaminj nuryin al go goyen. ⁵² Be, Nikodemus belen gwaha yinkeb mel gore wol henbe, “Ge manan Galili nin al? Al Kurunyen mere kenkela kenayin. Irde gab Al Kurunyen mere basan al kura Galili bana mat ma wayyen yitin goyen bebak tiyayin,” inamin.

[⁵³ Be, Yerusalem gabu iraminj marbe bur yenbe tiyunminj tiyunminj kwaminj.

8

¹ Goyenbe Yesube Olip dondonde hurkurinj.

Bere mata bulun minyanj kura Yesu hitte tawayaminj

² Be, fay urkeb sopte Al Kurunyen ya balemde kurin. Irkeb al budam wanj kalyanj keraminj. Irkeb keperde saba yiryin. ³ Be, Moseyen saba marya Farisi marya belen bere unj yanj kura goyen al hoyanya duwan tenj hike kenenbe tenj wayaminj. Tawakeb bere gob gabu iraminj goyen dilin mar huwaryin. ⁴ Irkeb mel goreb, “Tisa, bere gabe unj minyanj gega, al hoyanya duwan tenj

hike kenhet. ⁵ Moseyen sabarebe bere gahade gab horare gasa yirke kamnayiñ yitiñ hi. Munan gebe gokeb daha yawayin?" inen gusunan iramiñ. ⁶ Gusunan gwahade iramiñ gobe Yesu belen daha wet kura yekeb meremiñ gore po bul irde merem yan irniñ yenbe gusunan gwahade iramiñ gogo. Goyenbe Yesu gob urgun kan hanin po megen mere kura kan hinhin. ⁷ Irkeb mel gore wol hen hen ge pakku irke huwardeb yiniñ. "Den bana gayen al kura mata bulun minmon wor po hi kenen gab yen wa mehen hen horare mayyen," yiniñ. ⁸ Irdeb sopte urgun kan megen mere kan hinhin.

⁹ Be, mere go nuramiñ marbe yunƙuren yunƙuren siksuk irde kun hinhan. Parguwak wa mehen hamiñ. Kun kunbe Yesuya bere goya po gor hinaryum. ¹⁰ Irkeb Yesu belen huwardeb, "Bere, al buda gar gobe damde han? Al kura merem yan ma gira?" ininiñ. ¹¹ Irkeb bere goreb, "Gwaha, doyan al, hubu po," ininiñ. Irkeb Yesu belen, "Be, ne wor merem yan ma giren geb, kwa ko. Irdeb mata bulun sopte ma tiyayin," ininiñ.]*

Yesube hulsi

¹² Be, kame Yesu gob al saba yirdeb, "Nebe alya bereya Al Kurun yikala yird yird hulsi. Niñgeb al kura ne gama niryenbe mata bulunyen kidoma bana ma kun hiyen. Irde Al Kurunya huginen hen hen gote hulsi goyen tiyyen," yiniñ. ¹³ Irkeb Farisi mar belen inen tenbe, "Mere ten ha gobe gigen ge po ten yen ha. Niñgeb merege kurun

* **8:11:** Asan hoyandebe 7:53-8:11 gobe ma hi.

gobe miñ miñmon geb, al kura belen fudinde yeñ ma nuryeñ,” inamiñ. ¹⁴ Irkeb wol henbe, “Nebe gor mat wamiriñ, irde gor kweñ yeñ nurde hime. Niñgeb niñgeñ ge mere teñ hime gayenbe miñ manañ mere teñ hime. Goyenbe denbe ne gayen gor mat wamiriñ, irde gor kweñ yeñ hime gobe muñ kura ma nurde hañ. ¹⁵ Denbe megen niñ alyen dufayde po merem yañ nirde hañ. Gega nebe dende matare al muñ kura merem yañ ma irde himyen. ¹⁶ Munañ ne belen al kura merem yañ yireñ mar gobe ne nunkuren ma yireñ. Nanne hulyañ nirke wamiriñ al goya har geb, mel goyen merem yañ yireñ mata gobe mata huwak wor po. ¹⁷ Dende saba tareñdebe mere kura fudinde heñ heñ niñbe al irawa belen mere goyen sañiñ irkeb mere gobe fudinde yeñ nurnayiñ yeñ katiñ hi. ¹⁸ Niñgeb nebe niñgeñ ge mere teñ himyen, irde Adone nad nerke wamiriñ al gore wor ne yeñ hime gwahade po yeñ hi,” yinyiñ. ¹⁹ Irkeb mel gore, “Adogebe dare hi?” inen gusunañ iramiñ. Irkeb, “Denbe neya Adoneyab go ma nurde dunen hañ. Ne nurd nunen hañ manhan Adone wor nurde unwoñ,” yinyiñ. ²⁰ Saba gabe Al Kurunyen ya balem bana Al Kurun galak ird ird gasun bindere gor heñ al saba yiryiñ. Goyenbe yeñ mayke kamtek nalube hako geb, al kura wañ teñ miñmon.

²¹ Be, sopte po Yesu belen, “Nebe kweñ. Irke ne niñ nanñkenniñ. Irdeb mata bulun bana po heñ kamniñ. Goyenbe ne kweñde gorbe den epte ma kunayiñ,” yinyiñ. ²² Be, Yesu mere tiyyiñ goyen Yuda mar belen nurdeb, “Al gab yinjen

temeyen tiya? Gwahade ningeb gogo, ‘Ne kwenđe gorbe den epte ma kunayin,’ yen hi?” yen yingen ulin kadom gusunan gird tiyamin. ²³ Goyenbe Yesu belen teban yinyin. “Denbe megen gar nin mar gega, nebe gwahade mon. Denbe megen gar nin mata gama irde han gega, nebe Al Kurun hire gor nin mata gama irde hime. ²⁴ Denbe mata buluntin bana gon po hen kamnayin dinhem gobe fudinde wor po dinhem. Ningeb nebe al gwahade yen dinen himyen go goyen fudinde yen ma nurnayinbe mata buluntin bana gon po hen kamnayin,” yinyin. ²⁵ Irkeb mel goreb, “Gebe ganun al wor po?” inen gusunan iramin. Irkeb wol henbe, “Nebe al gwahade yen mehenđe mat wor po dinen himyen al go goyen. ²⁶ Nebe mere misin budam goke den gayen merem yan dirtek hime. Goyenbe nad nerke wamirin al gobe mataminbe fudinde geb, nebe al gore ninen hiyen go po megen nin mar kurun gayen momon yirde hime,” yinyin.

²⁷ Be, mel gobe Yesu belen Nanin ge mere dirde hi yen ma bebak tiyamin. ²⁸ Gwahade ningeb Yesu belen, “Ne Al Urmin gayen den belen kuruse hende nisan hen mununke kammeke gab nebe al gwahade dinen himyen goyen goke bitin bak yiyyen. Irdeb nebe dufayner ma mere tenbe Nanne belen saba nirde hi goyen po tagalde himyen goyen goke bebak tinayin. ²⁹ Nad nerke wamirin al gobe neya har. Nebe yen amanen nuryen mat po mata ten himyen geb, nubul ma ten hiyen,” yinyin. ³⁰ Be, al budam meremin nuranin mar gobe Yesu nin dufaymin tarej iramin.

Yesuya Abrahamya

³¹ Be, Yuda mar kura yen ge dufaymin taren irhet yamin mar goyen Yesu belen, “Sabane gayen kenkela tanarnayinbe komatne wor po henayin. ³² Irde gab mere fudinde goyen nurnayin. Irke mere fudinde nurnayin gore gab mata bulun bana mat dad sinə diryen,” yinyin. ³³ Irkeb mel gore wol henbe, “Nenbe Abrahamyen asem yago. Irde al kurat yufuk bana hen meten murungem mon ma ten hitin. Ningeb daha yihim yenbe megen nin kanduk bana ma hinayin dinen ha?” inamin. ³⁴ Irkeb wol henbe, “Fudinde wor po dinen hime, al kura mata bulun tiyyen gobe mata bulun yufukde gor po hen gote kanduk po ten hiyen. ³⁵ Be, al kura al kurate yufukde hen murungem mon meten ten unen hiyen al gobe huginen hitek gasun minmon hiyyen. Goyenbe doyan almin gote urminbe huginen naninya hiriryen. ³⁶ Ningeb ne Al Urmin gare mata buluntin yad sinə yirde dawarmekeb fudinde wor po denbe mata bulun bana ma wor po hinayin. ³⁷ Denbe Abrahamyen asem yago yen nurde dunen hime. Goyenbe bitin bana gobe mata bulun belen po makin hitin geb, merene nurtek ma han. Ningeb mununnin ten han gogo. ³⁸ Nebe Nanne belen mata nikala nirke yenen himyen goyen po momon dirde hime. Munan denbe nantin belen mere dirke nurdeb goyen po ten han,” yinyin. ³⁹ Irkeb mel goreb, “Abrahambe adoninin,” inamin. Irkeb, “Denbe Abraham dirnen wen manhan yen mata ten hinhin goyen po ten hiwon. ⁴⁰ Nebe mere

fudinde Al Kurun hitte mat nurmin goyen po momon dirde himyen. Goyenpoga denbe goke mununnin ten han. Abrahambe mata gwahade kura ma ten hinhin. ⁴¹ Ningeb denbe adotin beley mata ten hiyen goyen po ten han,” yinyin. Irkeb mel gore igin ma nurdeb, “Nenbe totpa dirin mon. Adonininbe Al Kurun unken gogo po,” inamin. ⁴² Irkeb Yesu beley, “Nebe Al Kurun hitte mat wamin him geb, nantinbe fudinde Al Kurun manhan ne nin amanen nurde hiwon. Nebe dufayner ma wamin, yen beley nad nerke wamin. ⁴³ Denbe merene epte ma nurtek geb, gogo merene min bebak ma ten han. ⁴⁴ Denbe adotin Satanyen dirnen wen. Irdeb adotin de dufay bulun goyen po gama irde mata titek po dirde hi. Yenbe mata fudinde mun kura bin bana ma hi geb, minde mat wor po al gasa yirke kamde kamde al hirin. Yenbe usi al, irde usi mere gote min al. ⁴⁵ Ningeb mere fudinde dinen him gega, ne nin heken ma nurde han. ⁴⁶ Den bana gayen ganun al kura beley mata bulun gwahade tiyan ninyen? Nebe mere fudinde ten him gega, dani ne nin heken ma nurde han? ⁴⁷ Al kura Al Kurunenbe meremin nurde hiyen. Ningeb denbe Al Kurunen mon geb, Al Kurunen mere ma nurde han gogo,” yinyin.

⁴⁸ Be, Yesu beley gwaha yinkeb Yuda mar gore wol henbe, “Gebe Samaria nin al, ungora beley ketal gurtin gintek gobe fudinde wor po gintek,” inamin. ⁴⁹ Irkeb wol henbe, “Nebe ungora ma ketal nurtin him. Nebe Adone turun irde himekeb den beleybe son hen ne ma turun nirde

hanj. ⁵⁰ Nebe denne turɗunɗan yanj ird ird niɗ ma nurde hime. Goyenbe denne turɗunɗan yanj irtek albe unɗurenɗan hi. Niɗgeb merem yanj nirde hanj gobe yenɗan hanjinde kerenɗan. ⁵¹ Fudinde wor po dinenɗan hime, al kura merene gama iryenɗanbe go ma kamyenɗan,” yinyinɗan.

⁵² Be, Yuda mar gobe Yesu mere tiyyinɗan goyen nurdeb, “Hanɗkab gebe unɗgura ketal gurtinɗan ha yenɗan nurde gunhet. Abrahambe kamyinɗan, irde Al Kurunɗan mere basanɗan mar mananɗan kamaminɗan. Gega gebe, ‘Al kura merene gama iryenɗanbe go ma kamyenɗan,’ yenɗan ha? ⁵³ Abrahamya Al Kurunɗan mere basanɗan maryabe kamaminɗan. Munanɗan ge gayenbe yenɗan folek? Al dahade go goyenbe ge gago?” inaminɗan. ⁵⁴ Irkeb wol henɗanbe, “Denne turɗunɗan yanj irenɗanbe minɗan minɗamonɗan hiyyenɗan. Goyenbe Nanne denɗan belenɗan Al Kurunɗaninɗan yanj hanɗan al gore denne turɗunɗan yanj irde hi geb. ⁵⁵ Denbe yenɗan ma nurd unenɗan hanɗan gega, nebe nurde unenɗan hime. Irdeb ne belenɗan al goyen ma nurde unenɗan hime yewenɗanbe ne wor denɗan yara usi al hewenɗan. Goyenbe nebe nurde unenɗanbe mereminɗan gama irde himyen. ⁵⁶ Asetinɗan Abrahambe ne megen gar wanɗan wanɗan nalu goyen kenmewonɗan yenɗan nuryinɗan. Irdeb kenenɗanbe amanɗan wor po hiriɗan,” yinyinɗan. ⁵⁷ Irkeb mel goreb, “Ge gayen damage 50 ma henɗan hi gega, Abraham kenarinɗan?” inaminɗan. ⁵⁸ Irkeb wol henɗanbe, “Fudinde wor po dinenɗan hime, Abraham forok ma yirinɗan nebe hinhem!” yinyinɗan. ⁵⁹ Gwaha yinkeb mel gore hora yadeb mayninɗan tiyaminɗan. Irkeb bana kunɗanbe Al Kurunɗan ya balem goyen tubul tenɗan hoyanɗande kuriɗan.

9

Al diliŋ titmiŋ kura sope iryiŋ

¹ Be, Yesu gob beŋ kuŋ henyaŋbe al kura miliŋ beŋ diliŋ titmiŋ gwahade po kawaŋ kirtiŋ goyen kinyiŋ. ² Irkeŋ komatmiŋ beŋ, “Rabai, ganuŋ beŋ mata buluŋ tiyyiŋ? Al gare ma miliŋ naniŋ beŋ tiyaryum geb, gago gwahade po kawaŋ hiriŋ?” inamiŋ. ³ Irkeŋ wol henbe, “Diliŋ titmiŋ gobe yiŋgeŋde mata buluŋ ma miliŋya naniŋyaŋ mata buluŋ beŋ ma iryiŋ. Gobe Al Kurunyen saŋiŋ yeŋ hitte kawan forok yiyyeŋ yeŋbe gwahade po kawaŋ hiriŋ. ⁴ Munaŋ neŋbe naŋa hikeya po nad nerke wamiŋiŋ al gote meten teŋ hitek. Moŋgo kidoma hekeŋ epte ma meten titek geb. ⁵ Nebe megen gar hime nalure gabe alya bereya Al Kurun yikala yird yird hulsi geb,” yinyiŋ.

⁶ Be, gwaha yineŋbe mulowore meyaŋ teŋbe ti-giri tike woŋa hekeŋ teŋ al gote diliŋde sam iryiŋ. ⁷ Gwaha irdeb, “Kuŋ Siloam fe alare delge hala,” inyiŋ. (Siloam gote miŋbe Teŋ Kerke Kutuŋ.) Irkeŋ al gobe kuŋ fete gor diliŋ haldebe diliŋ wuk yeke naŋkeneŋbe mulgaŋ heŋ wayyiŋ. ⁸ Irkeŋ tiyuŋmiŋde niŋ marya hakot diliŋ titmiŋ heŋ kaŋaŋ teŋ hike keneŋ hitiŋ mar goreb gusuŋaŋ hamiŋ. “Al gabe belen keperde kaŋaŋ teŋ hiyen al go goyen moŋ?” yamiŋ. ⁹ Irdeb al kura beŋ, “Al diliŋ titmiŋ gar go goyen,” yekeŋ kura beŋbe, “Moŋ, yeŋ moŋ. Al kura yeŋ yara po be,” yamiŋ. Goyenbe al goreb, “Nebe yeŋ haŋ al goyen,” yinyiŋ. ¹⁰ Irkeŋ mel goreb, “Daha matbe igiŋ heŋ gogo naŋkenha?” inamiŋ. ¹¹ Irkeŋ, “Al

Yesu inenɗi hanɗen al go gore woɗa irde delne sam yira. Irdeb, ‘Kuɗ Siloam fe alare hala,’ ninkeb kuɗ haldebe gago naɗkenhem,” yinyiɗ. ¹² Gwaha yinkeb, “Al gobe dare hi?” inenɗi gusuɗaɗ irkeb, “Go ma nurde hime,” yinyiɗ.

¹³ Be, mel gore al goyen teɗ Farisi mar hitte tukamiɗ. ¹⁴ Be, Yesu beɗen mulowo meyaɗ irde tigiri teɗ gore po al diliɗ titmiɗ goyen sope iryiɗ nalu gobe Sabat nalu. ¹⁵ Niɗgeb Farisi mar wor yeɗ beɗen daha mat diliɗ igiɗ heke naɗkinyiɗ goke gusuɗaɗ iramiɗ. Irkeb, “Yeɗ beɗen woɗa teɗ delner sam irke kuɗ fete delne haldebe naɗkenhem,” yinyiɗ. ¹⁶ Irkeb Farisi mar kura beɗen, “Al gobe Sabat nalure niɗ mata ma gama ira geb, yeɗbe Al Kurunɗ hitte mat ma watiɗ geb,” yamiɗ. Goyenbe kura beɗenbe, “Gwahade kenem mata bulunɗ al beɗenbe dahadem mata tiɗen turɗun yaɗ Al Kurunɗ beɗen po ga yirtek goyen yirde hi?” yinenɗi gusuɗaɗ hamiɗ. Be, mel gobe gwaha teɗ yiɗgenɗ uliɗ kadom mohonɗe tiyamiɗ. ¹⁷ Be, gwaha teɗ kuɗ kuɗ funaɗbe al diliɗ igiɗ hiriɗ al goyen gusuɗaɗ iramiɗ. “Delge sope ira al gobe ganunɗ yeɗ nurde ha?” inamiɗ. Irkeb al goreb, “Yeɗbe Al Kurunɗyen mere basanɗ al geb,” yinyiɗ.

¹⁸ Be, Yuda marte doyaɗ marbe al diliɗ titmiɗ gega sope irke naɗkinyiɗ goyen fudinde yeɗ ma nuramiɗ. Irdeb miliɗya naniɗya niɗ keya heke wayaryum. ¹⁹ Wakeb, “Al gayenbe urtiriɗ? Irde yeɗbe diliɗ titmiɗ gwahade po kawaɗ hiriɗ yeɗ haryen go goyen? Goyenbe dahade niɗgeb hanɗabe naɗkenenɗ hi?” yinenɗi gusuɗaɗ yiramiɗ. ²⁰ Irkeb al gote naniɗya miliɗya beɗen wol heɗbe,

“Gabe urdere. Irdeb diliŋ titmiŋ gwahade po kawaŋ hiriŋ gobe nurde har. ²¹ Goyenbe daha mat naŋkena, irde ganuŋ beley sope ira gobe ma nurde har. Yeŋbe parguwak geb, yiŋgeŋ momoŋ diriyeŋ geb, gusuŋaŋ irnaŋ” yinaryum. ²² Be, Yuda marte doyaŋ mar gobe bikkeŋ mere sege irdeb, “Al kura Yesube Mesaia yekeb takira titek. Irkeb gabu yaniniŋde epte ma wanayiŋ,” yeŋ mere mayamiŋ. Niŋgeb naniŋya miliŋya go mere goyen nuraryumde geb, doyaŋ mar goke kafura heŋbe, ²³ “Yiŋgeŋ gusuŋaŋ irnaŋ. Yeŋbe parguwak geb,” yinaryum gogo.

²⁴ Be, sopte al diliŋ titmiŋ go inke wayyiŋ. Irkeb, “Delge sope ira al gobe mata buluŋ al yeŋ nurde uney hite. Niŋgeb al go deŋem turnuŋ yaŋ irtiŋeŋbe Al Kuruŋ deŋem turnuŋ yaŋ ira ko,” inamiŋ. ²⁵ Irkeb wol heŋbe, “Al gobe mata buluŋ al ma gwahade moŋ gobe ma nurhem. Goyenpoga nebe delne titmiŋ hinhem gega, gago naŋkenhem go po ga nurde hime,” yinyiŋ. ²⁶ Gwaha yinkeb mel goreb, “Daha daha gira? Daha mat delge sope irke naŋkenha?” iney gusuŋaŋ iramiŋ. ²⁷ Irkeb wol heŋbe, “Nebe bikkeŋ momoŋ dirhem gega, merene ma nurhaŋ. Gega daniŋ sopte nurniŋ teŋ haŋ? Deŋ manaŋ yende komatmiŋ hiniŋ yeŋ teŋ haŋ?” yinyiŋ. ²⁸ Gwaha yinkeb mel goreb sukal irde, “Ge po gab al gote komatmiŋ! Neŋbe Moseyen komat geb! ²⁹ Mosebe Al Kuruŋ beley mere iryiŋ gobe nurde hite. Goyenbe al gobe gor kura mat wayuŋ yeŋ ma po nurde uney hite,” yamiŋ. ³⁰ Irkeb wol heŋbe, “Be, deŋ beley al gobe gor kura mat wayuŋ yeŋ ma nurde hite

yeŋ haŋ gobe kukuwamŋeŋ wor po. Gega nebe al gore sope nirke gago naŋkeneŋ hime. ³¹ Al Kurunbe mata buluŋ marte merebe go ma wol heŋ yuneŋ hiyen. Munan Al Kurun palap irde dufaymiŋ gama irde haŋ mar gote merebe nurde wol heŋ hiyen yeŋ nurde hityen. ³² Irde al kura al diliŋ titmiŋ gwahade po kawaŋ hitiŋ goyen sope irke naŋkintiŋ baraŋeŋ kura ma po nurde hityen. ³³ Sope nira al gobe Al Kurun hitte mat ma wayuŋ manhan det kura ma irwoŋ,” yinyiŋ. ³⁴ Gwaha yinkeb mel gore wol heŋbe, “Gebe mata buluŋ bana po kawaŋ heŋ kuŋ kurun hawaŋ. Niŋgeb daniŋ ge gahade gare saba direŋ teŋ ha!” inenbe gabu yamiŋde mat hugiŋeŋ takira tiyamiŋ.

³⁵ Be, Yesu gob al diliŋ titmiŋ goyen Yuda marte doyaŋ mar belen takira tiyamiŋ gote mere momoŋ nuryiŋ. Irdeb al goyen keneŋbe, “Ge gayen Al Urmiŋ niŋ dufayge tareŋ irha?” inyiŋ. ³⁶ Irkeb al goreb, “Doyaŋ al, yeŋbe al ganuŋ? Momoŋ nira. Irkeb yeŋ ge dufayne tareŋ ireŋ,” inyiŋ. ³⁷ Irkeb Yesu belen wol heŋbe, “Al gobe bikkeŋ kenha. Fudinde wor po, al gobe mere girde hime al ne gago po geb,” inyiŋ. ³⁸ Irkeb al goreb, “Doyaŋ Al Kurun, ge niŋ dufayne saŋiŋ irhem,” inenbe dokolhoŋ yuguluŋ teŋ turuŋ iryiŋ. ³⁹ Irkeb, “Nebe al iginya bulunya pota yird yird niŋ megen gar wamiŋ. Gogab ne niŋ dufaymiŋ tareŋ irnayiŋ marbe diliŋ titmiŋ gega naŋkinyeŋ go gwahade Al Kurunyen dufay kenkela bebak tinayiŋ. Munan al kura harhok nunnayiŋ marbe al kura diliŋ titmiŋ yara Al Kurunyen dufay epte ma bebak

tinayin,” inyin. ⁴⁰ Irkeb Farisi mar kura yenya hinhan gore nurdeb, “Gebe neŋ gayen wor diltin titmin dinen ha?” inamin. ⁴¹ Irkeb wol heŋbe, “Deŋbe dindiken ge yeŋ, ‘Dilninin titmin geb, Al Kurunyen mere keneŋ bebak ma teŋ hite,’ yeŋ haŋ manhan Al Kurun beŋ mata bulun mar ma dinwon. Goyenbe dindiken, ‘Neŋbe dilninin titmin mon, igin Al Kurunyen mere keneŋ bebak teŋ hite,’ yeŋ haŋ geb, bikken mata bulun bana haŋ yeŋ denen hime,” yinyin.

10

Sipsipya doyan alminya

¹ Be, Yesu go sopte gaha yinyin: “Fudinde wor po dinen hime, al kura sipsip nin koya kirtin goyen yamemde mat ma waŋ koya go nandu urde hurkuyen al gobe kawe marya al gasa yirnin yirnin yirde detmin kawem yade hanjen marya geb. ² Goyenbe sipsip doyan al wor pobe sipsip koya gote yamere mat waŋ hurkuyen. ³ Irkeb sipsip koya gote yame doyan irde hi al goreb yame fegelde unyen. Irkeb hurkun sipsipmin goyen deŋe yurke tumnan wakeb bul yirde sinare yukuyen. ⁴ Be, sipsipmin yingen de go po yade sinare yukunbe yingen wa mehen heŋ kun henya mere yirde hiyen. Irkeb melak nurde hanjen geb, yeŋ po gama irnayin. ⁵ Goyenbe al tinenbe epte ma wor po gama irnayin. Fudinde, sipsip gobe al tinen gote melak ma nurde hanjen geb, keneŋ yilwa irde busaharnayin,” yinyin.

⁶ Be, Yesube maya mere gwaha mat yiryin gega, sabamin nurde hinhan marbe goke dinen hi yeŋ

ma bebak tiyamiñ. ⁷ Niñgeb Yesu gore sopte gaha yinyiñ: “Fudinde wor po dinenñ hime, nebe sipsip niñ koya kirtinñ gote yame. ⁸ Niñgeb al kura asogo nirde neñ wa neñ wa teñ hanñyen mar kurunñ gobe kawe marya al gasa yirniñ yirniñ yirde detmiñ kawem yade hanñyen marya geb, sipsip gore meremiñ ma nuramiñ. ⁹ Nebe yame yara. Niñgeb al kura ne hitte mat wañ Al Kurunñ hire gor hurkuyenñbe det kura belem epte ma bulunñ iryen. Al gobe sipsip belem koya binde hurkunñ usanñ henñ sinñare katenñ yamuñ nene hanñyen go gwahade goyen igiñ po hiyen. ¹⁰ Kawe albe sipsip kawe teñ gasa yirde bulunñ bulunñ yirenñ yenñ wañ hiyen. Goyenpoga nebe merene nurde hanñ mar gob Al Kurunñya hugiñenñ henñ henñ goyen yunenñ. Irkeb mel gobe Al Kurunñya hugiñenñ hinayiñ goyenbe igiñ wor po hinayiñ.

¹¹ “Be, nebe sipsip doyañ al igiñ. Sipsip doyañ al igiñbe sipsipmiñ ge teñ yinñenñ kamde kamde niñ ma nurde hiyen. Igiñ kamyenñ. ¹² Goyenbe al damu irke ga sipsip doyañ yirde hiyenñ al gobe sipsip gote miñ al moñ. Niñgeb kulu duwi kura wake kenenñbe sipsip goyen gor po okohom yubul teñ busaharyenñ. Irkeb kulu duwi belem sipsip goyen yisike burgagaw kernayiñ. ¹³ Al gobe damu irke hora niñ po nurde sipsip doyañ yirde hiyenñ geb, sipsip goke ma nurde busaharyenñ.

¹⁴⁻¹⁵ “Be, nebe sipsip doyañ al igiñ. Nanne belem nurd nunenñ hi, irkeb ne wor nurd unenñ hime. Gwahade goyen po, nebe sipsipne nurde yunenñ hime, irke sipsipne wor nurd nunenñ hanñ. Irde sipsipnenñ teñ kame yenñbe igiñ kameñ. ¹⁶ Nebe

sipsipne hoyañ manañ hañ. Gobe koya bana gor ma hañ. Goyenbe go manañ yawarenj. Yeñ manañ melakne nurnayinj. Irde sipsip koya bana hañ goya tumñañ hike doyañ yird yird al manañ ne nuñkurenj po heñ.

¹⁷ “Nebe kame sopte huwareñ yeñ nurdeb Nanner alya bereya goke teñ kameñ. Niñgeb Nannebe goke teñ ne gayen bubulkuñne wor po yeñ nurde nuneñ hi. ¹⁸ Al kura beleñ tareñmiñde epte ma mununke kameñ. Nebe alya bereya goke kame yeñbe igiñ kameñ, irde sopte huware yeñbe igiñ huwareñ. Go tiyeñ gobe Adone beleñ gwaha tiyayinj ninyinj geb, gogo tiyeñ,” yinyinj.

¹⁹ Be, mere tiyyinj goyen nurdeb Yuda mar beleñ sopte yingey uliñ kadom mohonje tiyamiñ. ²⁰ Al budambe, “Al gabe unğura ketal urtiñ geb, kukuwa wor po! Niñgeb daniñ meremiñ nurde hañ?” yamiñ. ²¹ Goyenbe kurabe, “Meremiñbe unğura ketal urtiñ al beleñ mere titiñ yara moñ. Unğurabe al diliñ titmiñ igiñ sope iryen? Epte moñ geb,” yamiñ.

Yuda mar tumñañ Yesu asogo iramiñ

²² Be, kuñ kuñ gabu nalu kuruñ kura “Ya Balem Al Kuruñ Untek” iney hanjen goyen Yerusalem forok yiriñ. Goyenterbe naña uysuñ wor po heñ heñ nalu.* ²³ Be, Yesube Al Kuruñyen ya balem bana ya kawan yulyañey kura Solomonyen Paranda iney hanjen bana goyañ kuñ hinhin. ²⁴ Irkeb Yuda mar beleñ wañ Yesu

* **10:22:** Naña uysuñ wor po heñ heñ nalu gobe ais kateñ hiyen geb, anutayen mere matbe “winta” yeñ hanjen.

kalyañ kerdeb, “Daha naña gab nebe al gwahade yeñ bebak dirkeb kukuwamñeñ ma nurtek? Gebe Mesaia kenem bebak po dirayñ,” inamiñ.

²⁵ Irkeb Yesu belañ wol heñbe, “Nebe momoñ dirmiñ gega, merene goyen fudinde yeñ ma nurde hañ. Mata tiñeñ turñuñ yañ ne belañ Nanner saññe forok yirde himyen goreb nebe al gwahade yeñ dikala dirde hañ. ²⁶ Goyenbe deñbe nere sipsip moñ geb, merene fudinde yeñ ma nurde hañ. ²⁷ Nere sipsipbe melakne nurde gama nirde hañ. Ne wor sipsip go nurd yuneñ hime. ²⁸ Nebe Al Kurunya hugiñeñ heñ heñ goyen yeñ yuneñ himyen. Niñgeb go ma po buluñ henayiñ. Irdeb al kura belañ hanner mat epte ma sipsipne kura gorañ niryeñ. ²⁹ Nanne belañ alya bereyamiñ sipsip yara goyen ne nuntiñ. Yeñbe tareñmiñ kurun wor po. Niñgeb sipsip goyen yeñ doyañ yirde hiyeñde mat epte ma al kura belañ gorañ yiryen. ³⁰ Neya Adoneyabe unjuren po geb,” yinyiñ.

³¹ Be, Yesu belañ gwaha yinkeb mel gore sopte hora yadeb mayniñ tiyamiñ. ³² Goyenbe Yesu belañ yinyiñ. “Nebe meten iñiñ wor po forok yirde duneñ himyen. Gega meten iñiñ damiñ goyen goke iñiñ ma nurde mununniñ teñ hañ?” yinyiñ.

³³ Irkeb mel gore wol heñbe, “Neñbe mata tiñeñ forok yirde hayen goyen goke ma mugunniñ teñ hite. Goyenbe gebe al neñ yara po gore, ‘Nebe Al Kurun,’ yeñ ha gobe Al Kurun sukal irde ha geb, goke mugunniñ teñ hite,” inamiñ.

³⁴ Irkeb wol henbe, “Dende sabarebe Al Kurun belen Israel marte doyan mar kura turun yirdeb, ‘Denbe nigen yara,’ gwaha yitiŋ goyen kapyan ma hen hanjen? ³⁵ Al Kurun belen meremiŋ yunyiŋ mar goyen, ‘Denbe nigen yara,’ yinyiŋ. Al Kurunyen asaŋde niŋ merebe fudinde wor po epte ma usi yetek. ³⁶ Nebe Adone belen basaŋa nirde nad nerke megen gar wamiriŋ. Niŋgeb nebe Israel marte doyan mar kura Al Kurun belen, ‘Denbe nigen yara,’ yinyiŋ mar gote folek. Gega dahade niŋgeb nebe Al Kurun Urmiŋ yemekeb den belen Al Kurun sukal irha ninhan? ³⁷ Ne belen Adoner meten ma ten himeke nenenbe dufaytiŋ ne niŋ taren ma irnayiŋ. ³⁸ Goyenbe gwaha ten hime kenem ne niŋ hekken nurnayiŋ. Gega gwaha ten tenmiŋ metenjen kenem mata tiŋen turunŋ yan forok yirde himyen go po yenenbe fudinde yen nurnayiŋ. Gogab Adonebe neya hike, nebe yenya har goyen bebak tinayiŋ. Irde yenya neyabe unkuřen po yen nurnayiŋ,” yinyiŋ. ³⁹ Be, meremiŋ goke mel gore sopte ten mayniŋ tiyamiŋ. Gega isal po uryiŋ.

⁴⁰ Be, gor matbe Yodan fe siŋa kurhan hanƙapya Yon belen al baptais yirde hinhin belen goŋ kuriŋ. Irdeb goŋ hinhin. ⁴¹ Irkeb al budam yen hitte wayamiŋ. Irdeb, “Yonbe mata tiŋen turunŋ yan kurayen kurayen ma forok yiryiŋ. Goyenbe yen belen al gake tagalde hinhin gobe fudinde wor po,” yamiŋ. ⁴² Irdeb go gasuŋde gorbe al budam yen ge dufaymiŋ saŋiŋ iramiŋ.

Lasarus kamyinj

¹ Be, al kura denjem Lasarus goyen garbam bulun po hiriñ. Yenbe Betani tiyunde niñ al. Betani gobe Mariaya babam Martayat tiyuñ. ² Maria gobe he fimiñ hamiñ kusamuñ gore po Doyañ Al Kurunyen kahañde wogorde tonañ yuwalñen belen po utma tiyyiñ bere go goyen. Be, kuliñ Lasarusbe garbam iryiñ. ³ Niñgeb ire babamya goreb Yesu niñ keya henbe, “Doyañ Al Kurun, kadge amañen wor po nurde unen hayen al gobe garbam hihi,” yaryum. ⁴ Irkeb Yesu gobe mere go nurdeb, “Garbam goreb Lasarus mayke kamyen. Goyenbe hugiñen ma kamyen. Al Kurun denjem turñun yañ ird ird niñ garbam go forok yiyuñ. Irde ne Al Urmiñ gayen al belen Lasarus hitte mata forok ireñ goyen kenenbe denne turñun yañ irnayiñ,” yiriñ. ⁵ Yesube Martaya haymiñya kuliñ Lasarusya niñ amañen wor po nurde yunen hinhin. ⁶ Goyenbe Lasarus garbam hiriñ mere momonbe nuryiñ gega, hinhinde gor po sopte wawuñ irawa firyiñ.

⁷ Irde gab komatmiñ yago goyen, “Mulgañ hen Yudia nanare kuniñ,” yinyiñ. ⁸ Irkeb komatmiñ belen inamiñ. “Goyenbe Rabai, gorbe Yuda mar belen horare soñ mugunañ go. Gega sopte mulgañ hen gor kwen ten ha?” inamiñ. ⁹ Gwaha inkeb yen kamtek nalube hako geb, go ma mununnayiñ yinenbe maya mere mat gaha yinyiñ: “Wampot mat wawuñbana naña kurkuyen go kahal banabe awa 12 hanjen. Niñgeb naña temeyde hikeyabe albe igiñ dawet kenkela yennayiñ geb, al kura belenyañ kuñ henya epte ma kukuhuk

uryeñ. ¹⁰ Goyenbe wawuñbe kidoma geb, belen kuñ henbe takteñ mayyeñ,” yinyiñ.

¹¹ Be, gwaha yinenbe sopte po, “Kadniniñ Lasarusbe ferde hi niñgeb, ne belen kuñbe isan hewen tihim,” yinyiñ. ¹² Irkeb komatmiñ belen wol henbe, “Doyañ Al Kuruñ, yeñbe duliñ ferde hi gob igiñ hiyyeñ,” inamiñ. ¹³ Goyenbe Yesube Lasarus goyen kamiñ goke yinyiñ. Gega komatmiñbe fudinde ferd ferd niñ diniñ hi yeñ nuramiñ. ¹⁴ Be, mel gore gwahade nuramiñ geb, Yesu belen kawan po yinyiñ. “Lasarusbe kamuñ. ¹⁵ Goyenbe ne belen yeñ hitte mata kura forok irmeke keneñbe ne niñ dufaytiñ tareñ irnayiñ yeñbe gogo Lasarus hitte arañeñ ma kumiñ goke amañeñ nurhem. Goyenbe hanñkabe wake yeñ hitte kuniñ,” yinyiñ. ¹⁶ Irkeb komatmiñ kura Tomas, deñem kurabe Didimus gore diñuñ hoyañ yinyiñ. “Neñ manañ tumñañ kuniñ. Gogab yeñya tumñañ kamtek geb,” yinyiñ.

¹⁷ Be, Yesu go Betani forok yiriñ. Irdeb, “Lasarusbe bikkeñ gote yereñ horabok mete bana mete tiyañ,” yeke nuryiñ. ¹⁸ Betani mat Yerusalembe 3 kilomita gwahade po, gisaw wor po moñ. ¹⁹ Niñgeb Yuda mar budam belen ire babamya gote kuliñ kamiñ goke kuñ biñ yurum yirniñ yeñ wayamiñ.

²⁰ Be, Marta go Yesu wañ hinhin mere momoñ go nurdeb kuñ belen tupi tiye yeñ kuriñ. Goyenbe Mariabe yare hinhin. ²¹ Be, Marta belen kuñ Yesu keneñbe, “Doyañ Al Kuruñ, ge gar hinhin manhan kolnebe go ma kamwoñ. ²² Goyenbe hanñka gayen wor det kurañ Al Kuruñ gusuñañ

irkeb gunyen yen nurde hime,” inyin. ²³ Irkeb Yesu beley, “Kolgebe sopte huwaryen,” inyin. ²⁴ Irkeb Marta beley wol henbe, “Nalu funande al kamtiñ huward huward nalurebe yen manañ sopte huwaryen gob nurde hime,” inyin. ²⁵ Irkeb, “Al kamtiñde mat huwarnayin, irde Al Kurunya hugiñen hinayin gote miñ albe ne gago. Niñgeb al kura ne niñ dufaymiñ tareñ irtiñ kamyen gobe sopte huwaryen. ²⁶ Irde al dufaymiñ ne niñ sañin irde Al Kurunya hugiñen hinayin marbe Al Kurun diliñde al kamtiñ ma hinayin. Ga ginhem gayen fudinde yen nurde ha?” inyin. ²⁷ Gwaha inkeb Marta beley, “Gwaha, Doyañ Al Kurun, gebe fudinde wor po Mesaia, Al Kurun Urmiñ megen gar wayyen yitiñ al go goyen yen nurde hime,” inyin. ²⁸ Gwaha inenbe mulgañ heñ kuñ haymiñ Maria muñ po hoy irdeb, “Tisabe waya. Irde ge niñ gusunañ heñ hi,” inyin. ²⁹ Irkeb Maria gob arañ po huwarde Yesu hitte kuriñ.

³⁰ Be, Yesu gobe tiyunde ma forok yiriñ. Martaya mere tiyaryumde gor po hinhin. ³¹ Be, Yuda mar yare gor heñ Maria biñ yurum irde hinhan mar goyen Maria beley bemel po huwarde kat kuke kenenbe bembare kuñ esen wet kuñ hi yenbe gama irde kwamiñ. ³² Be, Maria gobe kuñ Yesu hinhinde gor forok yen kenenbe kahañ miñde kateñ dokolhon yugulun tenbe, “Doyañ Al Kurun, ge gar hinhan manhan gob kolnebe go ma kamwon,” inyin. ³³ Be, Mariaya Yuda mar yen gama irde wayamiñ morya goyen tumñañ esen hike Yesu beley yenenbe Yesu wor biñde mat mel goke buninjen wor po nurde biñ kanduk hiriñ.

³⁴ Irdeb, “Dare mete tiyañ?” yinenḡ gusuñḡ yiryiñ. Irkeb mel gore wol henbe, “Doyañ Al Kurunḡ, wake kuniñ. Irde ga kena,” inamiñ. ³⁵ Be, Yesu go diliñ fimiñ katyiñ. ³⁶ Irkeb Yuda mar goreb, “Go kennañ, Lasarus niñ amañeñ wor po nurde hiyen geb gogo esa,” yamiñ. ³⁷ Goyenbe al kura beleş, “Yeñbe al diliñ titmiñ sope irke nanḡkinuñ. Gega Lasarusbe daniñ ma sope irke gogo kamuñ?” yamiñ.

Lasarus kamtiñde mat isañ hiriñ

³⁸ Be, Yesu go sopte po bunineñ wor po nurdeb bembare kuriñ. Bemba gobe horabok, irdeb hora kurunḡ kura kañ kañ irde yamem goyen tatiñ hinhin. ³⁹ Be, Yesu beleş, “Hora ga teñ siña irnañ,” yinyiñ. Irkeb al kamtiñ gote babam Marta beleş, “Goyenbe, Doyañ Al Kurunḡ, kolne hakwambe bemba bana hike wawuñ sipte hihi geb hamiñ buluñ hihi,” inyiñ. ⁴⁰ Gwaha inkeb, “Dufayge ne niñ tareñ irayinbe Al Kurunḡyen tareñ turuñ yañ goyen kenayiñ ma ginhem?” inyiñ. ⁴¹ Irkeb mel goreb hora kurunḡ goyen teñ siña iramiñ. Irkeb Yesu beleş kotañ kañbe, “Ado, merene nurha goke igiñ wor po nurd gunhem. ⁴² Nebe merene hugineñ nurde hayen goyen nurde himyen. Goyenbe al gar harde hañ gake teñbe gago gineñ hime. Gogab nebe ge beleş nad nerke wamiñ goyen fudinde yeñ nurnayiñ,” yiriñ. ⁴³ Gwaha yeñbe Yesu go uguñ po, “Lasarus, siñare kata,” inyiñ. ⁴⁴ Irkeb al kamtiñ gobe haninya kahanya amil beleş po bili irde kimiñ mala titiñ goyen siñare katyiñ. Irkeb Yesu beleş,

“Bembare niŋ amil go hol irde unenbe tubul tike kwi,” yinyiŋ.

Yesu mayke kami yeŋ mere sege iramiŋ

⁴⁵ Be, Yuda mar budam Maria kinniŋ yeŋ wayamiŋ mar goyen Yesu mata tiyyiŋ goyen kenenbe yeŋ ge dufaymiŋ saŋiŋ iramiŋ.

⁴⁶ Goyenbe kuramiŋbe Farisi mar hitte kuŋbe Yesu mata tiyyiŋ goyen momoŋ yiramiŋ. ⁴⁷ Irkeb

Al Kurunŋ doloŋ ird ird mata doyaŋ mar pris buda gote karkuwaŋmiŋya Farisi marya belen mere sege irniŋ yeŋ Yuda marte doyaŋ mar hoy yiramiŋ. Hoy yirke wakeb, “Be, nenbe daha titek? Al gabe mata tiŋeŋ turuŋ yaŋ wor po

forok yirde hi. ⁴⁸ Al gayen tubul titeke gwahade po teŋ hiyeŋ gobe al tumŋaŋ yeŋ ge dufaymiŋ saŋiŋ irniŋ tahaŋ. Irkeb Roma gabman belen waŋbe nende Al Kurunyen ya balemya alya bereya tumŋaŋ gwamuŋ yurnayiŋ geb,” yamiŋ.

⁴⁹⁻⁵⁰ Irkeb pris buda gote karkuwaŋmiŋ bana goŋ kura deŋembe Kaiafas goreb tareŋ po, “Deŋbe det kura ma wor po nurde haŋ. Naŋaniniŋya neŋ almemya tumŋaŋ buluŋ hetek gobe igiŋ moŋ. Niŋgeb al unkuŋeŋ gare po kamyen gab kanduk kurunŋ goyen kentek moŋ,” yinyiŋ. Kaiafas gobe Yesu hinhin goyenter pris marte kurunmiŋ heŋ meten teŋ hiyen al.

⁵¹ Be, Kaiafas gore mere tiyyiŋ gobe mali dufaymiŋde ma mere tiyyiŋ. Yeŋbe dama goyenter pris buda gote kurunmiŋ heŋ meten teŋ hinhin geb, Yesu goyen Yuda mar niŋ teŋ kamyen yeŋbe gogo mata kame forok yetek goke tagalyiŋ. ⁵² Irde Yuda mar muŋ po moŋ, Al Kurunyen dirŋeŋ wen

hoyande hoyande han wor yawan tumnan gabu yirde unkuwen po iryen goke ten kamyen goyen wor tagalyin. ⁵³ Ningeb gor matbe mel gobe Yesu daha mat kura mayteke kamyen yen belen nin nankenen hinhan.

⁵⁴ Ningeb Yesube goke tenbe Yuda mar dilinyan ma kun hinhin. Gwaha titnenbe yubul ten sawsawa nana bindere tiyun kura Efraim inen hanyende komatminya kunbe gor hinhan.

⁵⁵ Be, Yuda marte gabu nalu kurun kura Pasoba goyen binde binde hen hinhin. Irkeb al budam Pasoba nalu ma forok yekeya ulin wuk yird yird mata titek yenbe Yerusalem hurkun hinhan. ⁵⁶ Irkeb Yuda marte doyan marbe Yesu nin huginen nankenen hinhan. Irdeb yingen ulin kadam gusunan gird tenbe, “Dahade nurde han? Pasoba gabu nalure gayen ma po wayyen yen nurde han?” yamin. ⁵⁷ Goyenbe pris buda gote karkuwanminya Farisi marya belenbe al momon yiramin. “Al kura Yesu goyen gor hi yen nurdeb wan momon dirkeb kun ten fere titek,” yinamin.

12

Maria belen he fimin hamin kusamun goyen Yesu kahande wogoryin
(Matiyu 26:6-13; Mak 14:3-9)

¹ Be, Pasoba nalu goyen nalu 6 po hen gab forok yetek hekeb Yesu go Lasarusyen tiyun Betani kun forok yirin. Lasarusbe kamtinde mat Yesu belen isan hirin al go goyen. ² Be, gorbe Yesu nin ten binge kanbe Marta belen binge go gale hen hinhin. Goya goyenbe Lasarusbe

binje ninij yen gor gabu iramiñ mar goyen binje nen nen gasunje keperde hinhin. ³ Be, mel go gwaha ten hikeyabe Maria belej nat he fimiñ hamiñ kusamuñ wor po, irde damumbe hende wor po goyen tawanbe tumñan po Yesu kahanje wogordeb tonan yuwalñen belej po utma tiyyiñ. Irkeb he fimiñ wok iryiñ gote hamiñ igiñ muñ gore po ya go ep iryiñ.

⁴ Goyenbe Yesuyen komatmiñ kura Yudas Iskariot belej Maria mata tiyyiñ goke igiñ ma nuryiñ. Al gobe kame Yesu goyen asogo haniñde kiryiñ al go goyen. ⁵ Be, al goreb, “Nat he fimiñ gabe al kura dama unñkuren meten ten hora tiyyen go goya tunande. Niñgeb det fimiñ ga damu tikeb gote murunjem ten al buniñen yuntewon,” yiriñ. ⁶ Goyenbe Yudasbe al buniñen goke wor po ma nurde hinhin. Yenbe kawe al geb, gogo gwaha mat mere tiyyiñ. Yenbe Yesuya komatmiñya gote hora doyan irde hiyen al gega, hanñkayen hanñkayen hora go kawemde nene hiyen. ⁷ Be, Yudas go gwaha yekeb Yesu belej wol herñbe, “Tubul tinañ. Yen belej hanñka det fimiñ hamiñ igiñ muñ go ten gwaha nira gobe kame mete nird nird ge sam nirnayiñ goke gitik ten ten ge gwaha nira. ⁸ Al buniñenbe denya hugiñen hinayiñ. Goyenpoga nebe denya hugiñen ma hitek geb,” yinyiñ.

⁹ Be, goya goyenbe Yuda mar buda kurun belej Yesu go ya goyenter hi yen nurdeb wayamiñ. Goyenbe Yesu yen ge po mon, Lasarus kamtiñde mat huwaryiñ goyen manañ kinniñ yen wayamiñ. ¹⁰⁻¹¹ Yuda mar budam Lasarus go

kenenbe Yesu hitte kuɲ dufaymiɲ yeɲ ge tareɲ irde hinhan. Niɲgeb pris buda gote karkuwaɲmiɲ beleɲ Lasarus mananɲ mayteke kami yeɲ mere sege iramiɲ.

Mesaia Yerusalem kuriɲ

(Matiyu 21:1-11; Mak 11:1-11; Luk 19:28-40)

¹² Be, ferd fay urkeb al buda kurunɲ Pasoba gabu nalu kurunɲ goke Yerusalem wayamiɲ mar gore Yesube Yerusalem kuɲ hinhin goyen mere momonɲmiɲ nuramiɲ. ¹³ Irdeb patila yuwalɲenɲ yufunɲ teɲ yad kuɲbe tupi teɲ waniɲ yeɲbe kuware gaha yamiɲ:

“Al Kurunɲ turunɲ irniɲ ko!

Doyanɲ Al Kurunɲyen denemɲde wanɲ hi al gobe Al Kurunɲ beleɲ guram irde sanɲiɲ iryenɲ!

Israel marte Doyanɲ Al Kurunɲbe Al Kurunɲ beleɲ guram iryenɲ!” yamiɲ. *Tikiɲ 118:25-26*

¹⁴ Be, Yesu go Al Kurunɲyen asanɲde katiɲ gwahade po, donɲki fonenɲ kura kenenbe go hende kipiryiɲ. Mata tiyyiɲ goke teɲ asanɲde katiɲbe gahade:

¹⁵ “Den Saion taunde niɲ mar, kafura ma henayiɲ.

Doyanɲ Al Kurunɲtiɲ kurunɲ donɲki fonenɲ hende wanɲ hi go kennaɲ,” yitiɲ hi. *Sekaraia 9:9*

¹⁶ Goyenbe hanɲkapyabe mata goyen goke komatmiɲ yagobe bebak ma tiyamiɲ. Goyenbe kame Yesu go Al Kurunɲ hitte mulganɲ heɲ hurkunɲ deɲe turunɲ yanɲ tiriɲ kamere gab Yesu mata tiyyiɲ goke Al Kurunɲyen asanɲde katiɲ hi goyen bebak tiyamiɲ. Irde al buda kurunɲ gore yeɲ ge mata tiyamiɲ go wor gwahade po katiɲ hi goyen go bebak tiyamiɲ.

¹⁷ Be, al buda Yesuya hikeya Lasarus kamyin goyen yeŋ beleŋ yeke horabok metere mat huwaryin go kenamin mar gore gote mere momon tagalde tukamin. ¹⁸ Irkeb al budam wor po mata tiŋeŋ turuŋ yaŋ forok iryin goyen nuramin geb, kuŋ tupi tiniŋ yeŋ kwamin. ¹⁹ Niŋgeb go yeneŋbe Farisi mar go yinŋeŋ uliŋ mere teŋbe, “Ga kennan! Al buda kurun gabe dubul teŋ yeŋ po gama irde pasi hiniŋ tahaŋ geb!” yamin.

Yesube kamyen goke tagalyin

²⁰ Be, Pasoba gabu nalure Al Kurun doloŋ irnin yeŋ Yerusalem hurkamin mar bana goŋbe Grik mar manaŋ hinhan. ²¹ Mel gore Galili nana bana nin taun kura Betsaida nin al Filip hitte wayamin. Waŋbe, “Neŋbe Yesu kinniŋ wor po yeŋ nurde hite,” inamin. ²² Irkeb Filip beleŋ Andru hitte kuŋ momon iryin. Irkeb Andruya Filipya tumŋande kuŋ Yesu momon iraryum. ²³ Irkeb Yesu beleŋ wol heŋbe, “Ne Al Urmin gayen deŋe turuŋ yaŋ tetek nalube gago forok yihi. ²⁴ Fudinde wor po dinen hime, wit bilmiŋbe megen bana kurkun gabe kawaŋ heŋ iginen paya hiyyen. Munan gwaha ma tiyyenbe paya ma hiyyen. ²⁵ Al kura yinŋeŋ ge po nurde hi al gobe Al Kurunya ma hiriryen. Munan al kura megen gar henya yinŋeŋ ge ma nurde Al Kurun nin po nurde hi al gobe yenya hugiŋeŋ hiriryen. ²⁶ Al kura ne nin meten teŋ hime yeŋ nurde hi albe merene po gama irde hiyen. Irdeb ne heŋde gorbe meten alne wor gor hiyen. Adonebe ne nin meten teŋ hiyen al goyen turuŋ iryen.

27 “Be, bener kandukneŋ wor po nurhem geb, daha yewen? ‘Ado, ulner kanduk forok yewen tiya go faran nurke ma keneŋ,’ inen? Moŋ, nebe kanduk goyen go po tewen yeŋ wamirin geb. 28 Ado, dengebe turnuŋ yaŋ hewoŋ yeŋ nurde hime,” yirin. Irkeb nanŋinde mat al melak kura, “Dengebe bikken turnuŋ yaŋ irmin, irde sopte gwaha ireŋ,” gwahade forok yirin. 29 Irkeb al buda gor hinhan go mere goyen nurdeb, “Daga mere tiya,” yamin. Munan kurabe, “Al Kurunyen miyoŋ belen mere ira,” yamin. 30 Irkeb Yesu belen, “Mere forok yihi gabe den ge ten forok yihi. Ne niŋ moŋ geb. 31 Be, Al Kurun belen megen niŋ alya bereya merem yaŋ yirtek nalube hanŋa gago. Irdeb megen gar niŋ doyaŋ al Satanbe takira timeke tareŋ miŋmoŋ hewen tiya. 32 Goyenbe ne kuruse hende nade nisaŋ heke gab alya bereya megen han kurun gayen nigen hitte yawayeŋ,” yinyin. 33 Gwaha yinyin gobe kame mata dahade mat kamyen goyen yikala yire yeŋbe gogo yinyin. 34 Irkeb al buda gore, “Neŋbe Moseyen sabarebe Mesaiabe hugineŋ hiyeŋ yeke nurde hityen. Goyenbe dahade niŋgeb, ‘Al Urminbe he hende kamyen,’ yeŋ ha? Al Urmin gobe ganuŋ?” yeŋ hitem po gusaŋan iramin. 35 Irkeb Yesube mel goya sobamde ma hiyeŋ goke maya mere mat wol henbe, “Hulsibe denya ulyande ma hiyeŋ. Niŋgeb hulsu hiya gayenter po kuŋ hinayin. Hen ga moŋ kidoma aw dureŋ tiya geb. Al kura kidoma bana kuŋ hiyeŋ al gobe gor kuŋ hime yeŋ ma po nurdeya kuŋ hiyeŋ. 36 Hulsu goyen denya hikeyabe yeŋ ge dufaytin

tareñ irnayıñ. Gogab denbe hulsi bana hen mata igin ten mar henayıñ,” yinyiñ. Be, Yesu go meremiñ pasi irdeb al buda go yubul ten kuñbe nennak yeñ bana kuriñ.

Yuda marbe Yesu pel irtek po hamiñ

³⁷ Be, Yesube mata tiñeñ turñuñ yañ goyen Yuda mar diliñyañ wor po forok yirde hinhin gega, yeñ ge dufaymiñ sañiñ ma irde hinhan. ³⁸ Go ten hinhan gobe Al Kurunyen mere basañ al Aisaia belen kame gwahade forok yiyen yeñ kayyiñ goyen po forok yeñ hinhan. Merebe gahade:

“Doyañ Al Kurun, mere tagaltekeb ganuñ belen fudinde yeñ nurde hañ? Hubu wor po!
Irdeb ganuñ mar hitte Doyañ Al Kurun belen tareñmiñ goyen yikala yiryen? Hubu wor po!” yitiñ. *Aisaia 53:1*

³⁹ Niñgeb Aisaia belen yitiñ gwahade goyen po, mel gobe dufaymiñ yeñ ge tareñ ma po iramiñ. Mel gote matamiñ goke Aisaia belen mere hoyañ kura gahade kayyiñ:

⁴⁰ “Yeñ belen mel gote diliñbe titmiñ yiryiñ. Irde biñbe pet tiyyiñ.

Niñgeb diliñ gore epte ma nanñkennayıñ.

Irde biñ go gereñ ma yeke epte ma bebak tinayıñ.

Irde ne hitte mulgañ ma henayıñ.

Moñ manhan ne hitte mulgañ heke sope yirmewoñ,” yitiñ. *Aisaia 6:10*

⁴¹ Aisaiabe Al Kurun beley Yesu denem turun yan irtin goyen bikken kenebe yen ge gogo tagalyin.

⁴² Be, al budam Yesu gwaha mat pel iramin gega, doyan mar budambe yen ge dufaymin sanin iramin. Goyenbe Farisi mar beley nurdeb dakira tike gabu yaminde epte ma kutek yen kafura hamin. Goke tenbe Yesu nin dufaymin taren iramin goyen kawan ma tagalamin. ⁴³ Mel gobe al beley turun yird yird nin po amanen nurde hanyen. Irde Al Kurun beley turun yird yird nin ma nurde hanyen geb, gogo kawan ma tagalamin.

⁴⁴ Be, Yesu beley kuware gahade tagalyin: “Al kura ne nin dufaymin sanin iryenbe ne nin po ma dufaymin taren iryen. Nad nerke wamirin al goke manan dufaymin sanin iryen. ⁴⁵ Irde al kura ne ninyen al gobe ne po ma ninyen. Nad nerke wamirin al goyen wor kinyen. ⁴⁶ Nebe hulsi melak hen hi go gwahade goyen melak hewe yen megen gar wamirin. Gogab al kura ne nin dufaymin taren iryen gobe kidomare ma hiyen.

⁴⁷ “Al kura merene nurde ga binde ma kerde hiyen al gobe ne beley merem yan ma iren. Nebe megen nin alya bereya gayen merem yan yire yen ma wamirin. Al Kurun hitte yumulgan tiye yen wamirin. ⁴⁸ Gega ne harhok nunen merene ma nurde han mar goyen merem yan yiryen albe hi. Ningeb nalu funandebe mere tagalde himyen gore wor po merem yan yiryen. ⁴⁹ Gwaha, nebe nigen dufayner ma mere ten hime. Adone nad nerke wamirin al goreb mere gwahade tiyayin, irde gwaha mat yawayin goyen

ninenj hiyen. ⁵⁰ Yen belej ninenj hiyen mere gobe al belej gama irdeb yenya huginenj hinayinj yen nurde hime. Niŋgeb mere tenj himyen kurunj gabe Nanne belej gwaha yawayinj ninenj hiyen go mun po yen himyen gogo,” yinyinj.

13

Yesu belej komatminj yagot kahanj halde yunyinj

¹ Be, gabu nalu kurunj Pasoba go gise gwahade hirinj. Irkeb Yesu go megenj ga tubul tenj Naninj hitte kunj kunj naluminj forok yihi yenj nuryinj. Yenbe alya bereyaminj megen hanj mar goyen bubulkunne wor po yenj nurde yunenbe iginj yenj ge tenj kamenj yenj nurde hinhin geb, dufayminj goyen yikala yiryinj.

² Be, wawunbanare ninj binje nene hinhan. Irkeb Unjurabe Saimon Iskariot urminj Yudas belej Yesu asogo haniŋde kiryenj yenj bikkenj binj tirinj. ³ Yesube det kurunj gayen doyanj yird yird tarej Naninj belej untinj goyen nurde hinhin. Irde yenbe Al Kurunj hitte mat watinj, irde sopte yenj hitte mulganj hiyyenj goyen wor nurde hinhin.

⁴ Niŋgeb binje nen hinhande mat huwardeb ulinhorminj hende ninj goyen tugu tenjbe ulinj utma tenj tenje ninj amil tenj mal temdere giti iryinj.

⁵ Gwaha tenj gab koronje fe wogordeb komatminj yagot kahanj halde yunyinj. Irdeb amil gore po fe goyen utma tenj yunyinj.

⁶ Be, gwaha tenj kunj kunjbe Saimon Pita hitte hirinj. Irkeb, “Doyanj Al Kurunj, ge gayenbe kahanje halenj tenj ha?” inyinj. ⁷ Irkeb wol henjebe, “Mata tihim gote minj bebak ma taha. Goyenbe

kamebe bebak tiyayin,” inyin. ⁸ Irkeb Pita beley, “Mon, kahanne epte ma halayin geb,” inyin.

Irkeb Yesu beley wol henbe, “Kahange ma halenbe epte ma metenne kurun gote iginen tawayin,” inyin. ⁹ Gwaha inkeb Pita go, “Doyan Al Kurun, gwahade kenem kahanne po ma halayin. Hanneya tonanneya manan tumnan halde nunayin,” inyin. ¹⁰ Irkeb wol henbe, “Al fe gimtin gobe ulinde tikin minmon geb, kahan po haltek hi. Gwahade goyen po denbe bikken Al Kurun dilinde wukken han. Goyenbe den tumnan mon geb,” inyin. ¹¹ Al gore asogo haniinde niryen yen bikken nurde hinhin geb gogo, “Den tumnanbe wukken han gega, al unkuken po gabe gwahade ma hi,” yinyin.

¹² Be, komatmin yagot kahan halde pasi irdeb ulinhormin hende nin tugu titin goyen sopte ten hor irdeb mulgan hen gasunminde kun kipiryin. Irdeb, “Den ge ten mata tihim gate min bebak tahan?” yen gusunan yiryin. ¹³ Irdeb gaha yinyin: “Den beley Tisa ninen hanyen, munan kurarebe Doyan Al Kurun ninen hanyen. Nebe al gwahade geb, den beley gwaha ninen han gob fudinde. ¹⁴ Ningeb gayenterbe Tisaya Doyan Al Kurunya ninen hanyen gare kahanin halde dunhem geb, den wor kadom kahan halde gunen ten hinayin. ¹⁵ Nebe mata gwaha ten hinayin yenbe gago dikala dirhem. Ningeb den wor dindikenbe kadtinyen meten al yen nurde kadom faran gurd ten hinayin. ¹⁶ Fudinde wor po dinen hime, meten al kura doyan almin folek ma han, irde mere basan al gobe hulyan iryen al go folek

ma hañ. ¹⁷ Deñbe saba gayen bebak tahañ. Niñgeb saba gayen gama irde mata teñ hinayinbe Al Kurun belen guram dirde igin igin diryen,” yinyin.

¹⁸ Be, Yesu go sopte gaha yinyin: “Nebe den tumñan goke ma yen hime. Neb basaña yirmirin mar gobe nurde yunen hime. Goyenbe mere Al Kurunyen asañde katin hi gobe forok po yiyyen. Merebe gahade: ‘Al kura neya tumñan binje neren al gore tigiri teñ asogo niryen,’ yitin hi. ¹⁹ Mata goyen forok ma yen hikeya go wa gago dinen hime. Gogab mata go forok yekeb nebe Mesaia yen dufaytin sañin irnayin. ²⁰ Fudinde wor po dinen hime, al kura ne belen al yad yermeke kunayin mar gote saba fudinde yen nurnayinbe merene nurde hañ yen nurd yunen. Irdeb al kura merene fudinde yen nurnayinbe nad nerke wamirin al gote mere nurde hañ yen nurd yunen,” yinyin.

²¹ Be, gwaha yinen pasi heñbe binde kandukñen wor po nurdeb kawan po, “Fudinde wor po dinen hime, kuratin kura belen pel nirde asogo haniñde neren tiya,” yinyin. ²² Irkeb komatmin belen kukuwamñen nurdeb ganun nin kura yihi yen yinñen ulin kadom genen tiyamin. ²³ Be, komatmin kura Yesu belen bubulkuñne wor po yen nurd unen hiyen al gobe Yesu bindere gegelhek mat bulgan yitin hinhin. ²⁴ Irkeb Saimon Pita belen al go haniñ belen po tunan irdeb, “Ganun nin yen ha yen gusunan ira,” inyin. ²⁵ Irkeb al gore Yesu hinhin belen ge tawun heñbe, “Doñan Al Kurun, ganun nin yen ha?” inyin. ²⁶ Irkeb Yesu

belen wol henbe, “Al gobe beret parwek gayen koron bana fe ulin irde ga unen al goyen,” inyin. Irdeb beret parwek go ten koron bana fe ulin irde Saimon Iskariot urmin Yudas unyin. ²⁷ Be, Yudas go beret go tekeb goyare po Satan belen ketal uryin. Irkeb Yesu belen, “Mata kura tiyen ten ha gobe aranen po tiyayin,” inyin. ²⁸ Goyenbe yenya gor binje nene hinhan mar goreb min dani Yesu belen Yudas gwaha ina yen bebak ma tiyamin. ²⁹ Yudasbe mel gote hora doyan irde hinhin al geb, al kurabe Yesu belen Pasoba binje damu ten ten goke inen hi yen nuramin. Kurabe hora ten al buninen yunen yunen nin inen hi yen nuramin. ³⁰ Be, Yudas go beret tenbe goyare po kat sinare kurin. Gobe wawunde tiyyin.

Yesu belen saba taren gergen goyen komatmin yunyin

³¹ Be, Yudas go kukeb Yesu belen, “Be, han kabe ne Al Urmin gayen den turun yan goyen tetek hihim. Irde ne belen mata tiyen goreb Al Kurun den turun yan tiyyen. ³² Nin geb Al Kurun belen ne hitte mat den turun yan tiyyenbe yen belen wor yingen hitte mat den turun iryen. Irdeb aran po iryen. ³³ Dirine yago, nebe denya sobamde ma hitek geb. Denbe ne nin nan kennayin gega, Yuda mar yinmin gwahade goyen po, ne kwen de gorbe den epte ma kunayin dinen hime gago. ³⁴ Nebe saba gergen kura gago diren tihim: kadin ge amanen nurd gunen ten hinayin. Ne belen den ge amanen nurde himyen gwahade goyen po, den wor din ge kadam amanen nurd gunen ten hinayin.

³⁵ Gwahade kadtinya kadom amanen nurd gunen ten hinayinbe al hoyan kurun gore denenbe nere komatne yen nurde dunen hinayin geb,” yinyin.

³⁶ Gwaha yinkeb Pita beben, “Doyan Al Kurun, gebe dare kwayin?” inen gusunan iryin. Irkeb Yesu beben wol henbe, “Hanke wor pobe kwenbe gor epte ma kwayin. Gega kamebe igin kwayin,” inyin. ³⁷ Irkeb Pita beben, “Doyan Al Kurun, dahade ningeb hanke gayen epte ma gama giren? Nebe ge nin ten igin kamen,” inyin. ³⁸ Irkeb wol henbe, “Ge gayen fudinde wor po ne nin ten igin kamayin? Fudinde wor po ginhem. Hanke wawun tatirok mere ma tikeya wawun karwore ne nin yen, ‘Al gob ma nurde unen hime,’ yawayin,” inyin.

14

Yesu beben komatmin sanin yirin

¹ Be, Yesu go sopte po, “Ne dubul ten kwen goke kanduknen ma nurnayin. Al Kurun nin heken nurde hinayin. Irdeb ne nin wor heken nurde hinayin. ² Nanner yarebe hen hen gasunbe budam han. Ningeb gor kun gasuntin sope yiren tihim. Gasun go budam mon manhan gwahade ma dinmewon. ³ Kun gasuntin sope yirde ep irdeb mulgan hen wan ne henbe gor duken. Gogab den manan ne henbe gor hinayin. ⁴ Denbe ne kwen ten himere gor kun kun bebenbe nurde han gogo,” yinyin. ⁵ Irkeb Tomas beben, “Doyan Al Kurun, nenbe gor kwen taha yen ma nurde hite. Ningeb beben gob daha mat nurtek?” inyin. ⁶ Irkeb wol henbe, “Nebe Al Kurun hitte kun

kun belen. Irde nebe mere fudinde gote min al, irde Al Kurunya huginjen hen hen gote min al wor po. Ningeb ne minjonbe al kura Adone hitte epte ma kunayin. ⁷ Denbe ne gayen kenkela nurde nunen hanjen manhan Adone wor nurd unwon. Goyenbe gayenter matbe ne gayen nurd nunen han geb, Adone wor nurde unen hinayin. Goke ten denbe bikken nurd unen han yen nurde hime.” yinyin.

⁸ Irkeb Filip belen, “Doyan Al Kurun, Nanake dikala dira. Dikala dirke kenenbe ep gogo yen nurtek,” inyin. ⁹ Irkeb wol henbe, “Filip, nebe denya ulyande hityen gega, ma po nurd nunen ha? Al kura ne nenen hiyen al gobe Nanne manan kenen hiyen. Ningeb dahade geb, ‘Ado dikala dira,’ ninen ha? ¹⁰ Nebe Nanneya hirekeb Nannebe neya har gobe fudinde yen ma nurde ha? Ne belen mere dirde himyen gobe dufayner ma dinen himyen. Meten ten himyen kurun gobe Adone, ne hitte hi gote meten geb, yen belen neya hen metenmin ten hiyen. ¹¹ Nebe Nanneya har, irde Nannebe neya har yemeke goke fudinde yen nurnayin. Munan gwaha ma tenbe mata tijen turnun yan wor po forok yirmeke yenen hanjen goke nurde gab mere ten hime gayen fudinde yen nurnayin. ¹² Fudinde wor po dinen hime, al kura ne nin dufaymin taren iryenbe ne belen mata forok yirde himyen goyen yen wor forok yirde hiyen. Irde nebe Nanne hitte kwen geb, al gobe ne belen mata ten himyen gote folek wor po

teŋ hiyeŋ. ¹³ Irdeb deŋner* det kura niŋ gusuŋaŋ hekeb ne beleŋ wol heŋ duneŋ. Gogab Adonebe Urmiŋ ne gayeŋ hitte mat deŋem turŋuŋ yaŋ hiyyeŋ. ¹⁴ Deŋbe det kura niŋ nurdeb ne deŋner po gusuŋaŋ nirnayeŋ. Irkeb det goke nurnayeŋ goyeŋ duneŋ.

¹⁵ “Be, deŋbe ne niŋ amaŋeŋ nurnayeŋbe ne beleŋ mata gwaha gwaha tinaŋ dineŋ hime goyeŋ gama irde teŋ hinayeŋ. ¹⁶ Ne beleŋ Nanne gusuŋaŋ irmekeb Faraŋ Al hoyoŋ dunyeŋ. Irkeb yeŋbe deŋya hugiŋeŋ hinayeŋ. ¹⁷ Yeŋbe Holi Spirit. Yende merebe fudinde wor po. Gega megeŋ niŋ alya bereyabe epte ma kennayeŋ, irde ma nurd uneŋ haŋ geb, meremiŋ fudinde yeŋ ma nurnayeŋ. Goyeŋpoga deŋbe yeŋya hinayeŋ, irde yeŋbe deŋ bana hiyeŋ geb, nurd uneŋ hinayeŋ. ¹⁸ Nebe kweŋ gega, kagew yara ma dubul tiyeŋ. Deŋ hitte sopte mulgaŋ heŋ wayeŋ. ¹⁹ Heŋ ga moŋ megeŋ haŋ mar gare ma nennayeŋ. Goyeŋbe deŋbe nennayeŋ. Irde nebe kameŋ gega, sopte huwardeb heŋ geb, deŋ wor gwahade po hinayeŋ. ²⁰ Gwaha tiyeŋ nalu goyeŋ wakeb Nanneya har goyeŋ bebak tinayeŋ. Irde deŋya hite gwahade po, deŋ wor neya haŋ goyeŋ bebak tinayeŋ. ²¹ Al kura sabane nurde gama irde hi al gobe ne niŋ amaŋeŋ nurde hi. Irde ne niŋ amaŋeŋ nurde hi al gobe Adone beleŋ yeŋ goyeŋ bubulkunŋe wor po yeŋ nurde uneŋ hi. Irde ne wor yeŋ goyeŋ gwahade po nurde uneŋbe nebe al gwahade yeŋ

* **14:13:** “Deŋner” gabe duliŋ Yesu deŋe urde gusuŋaŋ ird ird niŋ ma yeŋ hi. Neŋbe Yesuyeŋ alya bereya niŋgeb, yeŋya awalikde heŋya gusuŋaŋ heŋ heŋ niŋ yeŋ hi.

nigen ikala iren,” yinyin. ²² Irkeb Yudas beley, “Goyenbe, Doyan Al Kurun, dahade geb ney hitte po nebe al gwahade yey dikala dirdeb megen nin marbe gigen ma yikala yirayin?” inyin. Yudas gobe Yudas Iskariot mon, al hoyan po. ²³ Be, Yudas gore gwaha inkeb Yesu beley wol hejbe, “Al kura ne nin amanen nurde han marbe sabane gama irnayin. Irkeb Nanne beley bubulkujne wor po yey nurd yunyen. Irdeb neya Nanneya tumnan yey hitte kunbe yeyya hitek. ²⁴ Munan al kura ne nin amanen ma nurde han marbe sabane ma gama irnayin. Mere den beley nurde han gabe bener nin mon, Nanne nad nerke wamirin al gote mere geb.

²⁵ “Mere dirde hime kurun gabe tumnan henya gago momon dirde hime. ²⁶ Goyenbe kame Faran Al, Holi Spirit goyen Al Kurun beley ten kerke katen gasujne tiyyen. Irdeb den nurtek mere kurun goyen yey beley gab saba dirde hiyen. Irde ne beley det momon dirde himyen kurun goyen wor bebak dirde hiyen. ²⁷ Al bin kamke igin hen hen mata goyen den hitte tubul tihim. Al bin kamke hen hen gobe nigen goyen dunen. Nebe megen nin mar beley dunen hanjen gwahade ma dunen. Ningeb kame mata forok yiyyen goke kanduknen ma nurnayin, irde kafura ma henayin. ²⁸ Nebe kwen, irdeb sopte mulgan hen den hitte wayen yey himeke nuran. Ningeb ne nin amanen nurde han manhan Nanneb ne folek go hitte kwen tihim goke aman hewon. ²⁹ Han ka gago mata go forok ma yey hikeya goke dinhem. Gogab mata go forok yeke kenenbe fudinde yey

dufaytiŋ tareŋ irnayiŋ. ³⁰ Megen gar niŋ doyaŋ al Satanbe wayeŋ tiya. Niŋgeb sobamde ma heŋ mere direŋ geb. Goyenbe Satanbe saŋiŋmiŋdebe epte ma daha wet kura niryeŋ. ³¹ Gega nebe Nanneŋ amanenŋ nurde unenŋ hime geb, yeŋ belenŋ gwaha gwaha tiyayiŋ ninyiŋ goyen po tiyeŋ. Gogab al belenŋ ne gayen yeŋbe al gwahade yeŋ bebak tinayiŋ. Be, wake gasuŋ ga tubul teŋ kuniŋ,” yinyiŋ.

15

Yesube wain he, irde yende alya bereyabe gote haniŋ

¹ Be, Yesu go sopte gaha yinyiŋ: “Nebe wain he fudinde wor po. Munanŋ Nannebe wain metenŋ gote miŋ al. ² Yeŋbe wain haniŋ kura ne hitte mat kutiŋ goyen igineŋ ma heŋ hitiŋbe walde yemeyde hiyen. Munanŋ wain haniŋ igineŋ heŋ hitiŋ gobe sopte igineŋ kurunŋ po ferde hiyen yeŋ haniŋ sope yirde hiyen. ³ Deŋbe saba dirde himyen goreb bikkenŋ po he haniŋ haranŋ hitiŋ gwahade goyen dirtiŋ hanŋ. ⁴ Niŋgeb deŋbe neya po hinayiŋ. Irkeb ne gayen denya heŋ. He haniŋ kura piginde basanŋ ma hitiŋ hiyenbe yingenŋ epte ma igineŋ hiyyenŋ. Gwahade goyen po, neya ma hinayiŋbe, mata igiŋ kura ma forok yirnayiŋ.

⁵ “Nebe wain he, irde deŋbe gote haniŋ. Niŋgeb al kura neya hike nebe yenya heŋ al gobe gote igineŋ, mata igiŋ igiŋ budam forok yirde hiyenŋ. Munanŋ neya ma heŋ hoyanŋ muŋ po pat yitiŋ hiyenbe mata igiŋ kura ma po teŋ hiyenŋ. ⁶ Al kura neya ma hi al gobe he haniŋ kura walde

temeyke kamtiŋ hiyeŋ go gwahade hi. He hanin gwahade gobe yade kakde yemeyke humga kuŋ hanyen. ⁷ Munaŋ deŋ gayen neya hinayiŋ, irde merene manaŋ deŋ bana hiyeŋbe det kura niŋ nurde gusuŋaŋ henayiŋ. Irdeb det gobe yade hinayiŋ. ⁸ Gwaha teŋbe mata igiŋ igiŋ kurun forok yirde hikeb gore Nanner deŋebe turuŋ yaŋ heŋ hiyeŋ. Gwaha teŋ hinayiŋ gabe al hoyan beleŋ nere komat yeŋ deney hinayiŋ.

⁹ “Be, Nanne beleŋ ne gayen bubulkuŋne wor po yeŋ nurde nuneŋ hiyeŋ gwahade po, ne wor deŋ gayen bubulkuŋne wor po yeŋ nurde duneŋ hime. Niŋgeb deŋ ge amaŋeŋ nurde duneŋ hime bana goŋ heŋ mata teŋ hinayiŋ. ¹⁰ Nebe Adoner saba gama irde himekeb ne gayen bubulkuŋne wor po yeŋ nurd nuneŋ hiyeŋ bana goŋ hime. Gwahade goyen po, deŋ beleŋ wor sabane gama irnayeŋbe deŋ gayen bubulkuŋne wor po yeŋ nurde duneŋ heŋ goyen bana hinayiŋ. ¹¹ Mere ga momoŋ dirde hime gabe amaŋ dufayne manaŋ hime gwahade goyen po, deŋ wor gotiŋ yaŋ hinayiŋ, irde amaŋ dufaytiŋ goyen kurun wor po hewoŋ yeŋ gago momoŋ dirde hime. ¹² Sabanebe gahade: ne beleŋ deŋ gayen bubulkuŋne wor po yeŋ nurd duneŋ himyen gwahade goyen po, deŋ wor kadiŋ yago niŋ amaŋeŋ nurd guney teŋ hinayiŋ. ¹³ Niŋgeb kadiŋ ge amaŋeŋ nurd nurd mata fudinde wor pobe kadiŋ ge nurde faraŋ yurde kamnayeŋ gogo. ¹⁴ Deŋbe sabane gama irde hinayeŋbe duwanne yago wor po henayiŋ. ¹⁵ Metey albe doyaŋ almiŋ beleŋ metey daha teŋ hi goyen ma nurde hi. Goyenbe deŋbe nurde han

geb, meten marne ma dinen. Gwaha dintinenbe duwanne yago dinen. Nebe Al Kurun belen saba nirtin kurun goyen momon dirde himyen geb, gogo duwanne yago dinen hime. ¹⁶ Den belen basiṅa ma niraṅin. Gwaha nirtinenbe kun iginen huginen hitek mata igin goyen forok yir-nayin yen basiṅa dirmirin. Gwaha ten henyabe ne denner det kuraṅ gusaṅaṅ hekeb, Nanne belen igin ala po dunyen. ¹⁷ Niṅgeb kadtin ge kadom amanen nurd gunen ten hinayin. Sabanebe gago geb,” yinyin.

Megen nin marbe Yesuyen komatmin haram yirde hinayin

¹⁸ Be, Yesu go sopte po gaha yinyin: “Megen nin mar belen haram dirkebe, ‘Nen gago po ma dirhan. Doyaṅ alninin wa haram iramin go,’ yen nurde hinayin. ¹⁹ Denbe megen nin mar manhan megen nin mar belen awalik igin igin po dirde hiwon. Gega denbe megen nin mar bana mat basiṅa dirmirin geb, denbe megen nin mar mon. Goke tenbe megen nin mar belen den gayen igin ma nurd dunen han gogo. ²⁰ Ne belen, ‘Meten albe doyaṅ almin epte ma fole iryen,’ dinmin gobe bitin sir ma yiyyen. Niṅgeb dinmin gwahade po, mel gore ne bulun bulun nirnayinbe den wor bulun bulun gwahade po dirnayin. Munan mel gore sabane nurde gama irnayinbe dende saba nin wor gwahade po tinayin. ²¹ Mel gobe nad nerke wamirin al goyen ma nurde unen han geb, ne nin igin ma nurdeb den manan bulun bulun dirnayin. ²² Ne belen waṅ saba ma yirmin manhan mata bulun minmon hiwon. Goyenbe ne

wan̄ saba yirmin̄ geb, epte ma neñbe mata bulun̄niniñ miñmon̄ yetek hañ. ²³ Al kura bulun̄eñ wor po nurd unen̄ hi al gobe Adone wor bulun̄eñ wor po nurd unen̄ hi. ²⁴ Ne beleş mata tiñeñ turñun̄ yan̄ wor po al kura beleş epte ma forok yirtek goyen mel gote diliñ mar ma forok yirmin̄ manhan mata tiñeñ ne beleş yirmin̄ go pel iran̄ gote mata bulun̄ miñyan̄ ma hiwon̄. Goyenbe mel gobe mata tiñeñ goyen yenañ gega, neya Adoneya tumñan̄ bulun̄eñ wor po nurd duneñ hañ. ²⁵ Goyenbe mata gwaha teñ hañ gobe yende sabare Mose beleş, ‘Mel gobe miñ miñmon̄ bulun̄ nurd nuneñ hañ,’ gwahade kayyiñ goyen go po teñ hañ.

²⁶ “Be, Farañ durd durd Albe wayyeñ. Yeñbe Holi Spirit, meremiñbe fudinde wor po, irde Adone hitte mat wayyeñ. Ne beleş Al Kurun̄ hitte mat teñ kermeke wan̄be ne niñ momon̄ dirde hiyeñ. ²⁷ Irkeb deñ wor ne niñ al momon̄ yirde hinayiñ. Deñbe meten̄ miñ urmiriñde mat po neya hityen geb, deñ wor gwaha tinayiñ,” yinyiñ.

16

¹ Be, Yesu go sopte gaha yinyiñ: “Mere dirhem kurun̄ gabe dufaytiñ ne niñ tareñ irtiñ goyen yubul ma tinayiñ yeñbe gago dinhem. ² Be, Yuda mar beleş yende gabu yare dakira tike epte ma kunayiñ. Fudinde, al kurabe Al Kurun̄ niñ keñkela meten̄ tihit yeñbe mudunke kamnayiñ nalu goyen forok yiyyeñ. ³ Go mar gobe neya Nanneya ma nurde duneñ hañ geb, mata gogo teñ hinayiñ. ⁴ Nebe naña hakot po momon̄ dirde hime gago. Gogab nalu goyen forok yekeb bikkeñ

hayhay diriyiñ go gago forok yeñ hañ yeñ bitin bak yenayin. Hañkapyabe tumñañ hinhet geb, momoñ ma dirmirin,” yinyin.

Holi Spirityen meten

⁵ Be, Yesu go sopte gaha yinyin: “Hañkabe nad nerke wamirin al hitte kweñ tihim. Goyenbe deñ gayen al kura belen, ‘Dare kweñ teñ ha?’ yeñ gusuñañ ma nirhañ. ⁶ Mere dirhem garebe buninēñ dufay belen po dukdawañ dira. ⁷ Goyenbe fudinde wor po dinen hime, deñ gayen igin hewoñ yeñ nurdeb gago kweñ tihim. Ne ma kweñbe Farañ Durd Durd Al go deñ hitte ma wayyen. Gega ne kweñ gab Farañ Durd Durd Al go teñ kermeke wayyen. ⁸ Yeñ belen wañbe megen hañ marbe mata buluñ minyañ goyen yikala yirkeb yeneñ bebak teñ hinayin. Irde daminbe Al Kuruñ dilingde mata huwak, irde kame Al Kuruñ belen merem yañ yiryen goke wor momoñ yirde hiyen. ⁹ Mata buluñminbe ne niñ dufaymin sanin ma irde hañ gogo yeñ yikala yiryen. ¹⁰ Nebe kameñ, irde huwareñ, irdeb Al Kuruñ hitte hurkumeke al kura ma nennayin. Mata kuruñ go tiyen gote miñ goyen Farañ Al belen yikala yirkeb Al Kuruñbe huwak yeñ bebak tinayin. ¹¹ Irde megen niñ marte doyañ al Satanbe bikkeñ Al Kuruñ belen merem yañ iryin geb, kame megen niñ alya bereya tumñañ merem yañ yiryen goyen yikala yiryen.

¹² “Be, nebe det budam wor po momoñ dirtek hañ gega, deñbe epte ma merene tumñañ bebak tinayin. Niñgeb tumñañ ma momoñ direñ.

¹³ Goyenbe Holi Spirit, mere fudinde po yeñ hi

al gore waŋ gab mata fudinde teŋ teŋ belŋeŋ kuruŋ go dikala diryeŋ. Yeŋbe yiŋgeŋde dufayde ma mere tiyyeŋ. Al Kuruŋ belŋeŋ mere momoŋ irke go po momoŋ diryeŋ. Irde mata kame forok yetek goyen manaŋ momoŋ diryeŋ. ¹⁴ Merenebe yeŋ belŋeŋ gab basaŋ heŋeŋ momoŋ dirde hiyeŋ. Gwaha matbe deŋne turuŋuŋ yaŋ irde hiyeŋ. ¹⁵ Al Kuruŋyen dawet kuruŋ gobe tumŋaŋ nigen ala. Gwahade geb Holi Spirit belŋeŋ detne kuruŋ goyen dikala dirde hiyeŋ yihim gogo,” yinyiŋ.

Yesu niŋ biŋ misiŋ nurnayiŋ gega, kamebe aman henayiŋ

¹⁶ Be, Yesube sopte po yiriŋ. “Muŋ kura heŋbe ma nennayiŋ gega, gor mat hitŋeŋ teŋbe sopte nennayiŋ,” yinyiŋ. ¹⁷ Irkeb komatmiŋ yago kura belŋeŋ, “Daha yihim yeŋbe, ‘Muŋ kura heŋbe ma nennayiŋ gega, gor mat hitŋeŋ teŋbe sopte nennayiŋ,’ yeŋ hi? Irde, ‘Nanne hitte kweŋ tihim,’ yeŋ hi?” yeŋ kadom gusuŋaŋ gird tiyamiŋ. ¹⁸ Mel gobe goke gusuŋaŋ po heŋeŋ heŋbe, “Yeŋ belŋeŋ, ‘Muŋ kura heŋbe,’ gwaha yeŋ hi gobe daniŋ wor po yeŋ yeŋ hi? Neŋbe gwaha yeŋ hi yeŋ bininiŋ bak ma yeŋ hi,” yeŋ kadom gusuŋaŋ gird tiyamiŋ.

¹⁹ Be, Yesu go mere tiyyiŋ goke komatmiŋ yago belŋeŋ gusuŋaŋ irtek heke yeneŋbe, “Deŋ gayen ne belŋeŋ, ‘Muŋ kura heŋbe ma nennayiŋ gega, gor mat muŋ kura hitŋeŋ teŋbe nennayiŋ,’ yihim goke gusuŋaŋ nirniŋ teŋ haŋ? ²⁰ Fudinde wor po dineŋ hime, megen niŋ marbe ne kameŋeŋ goke aman hekeb deŋbe ne niŋ bunineŋ nurde esinayiŋ. Fudinde, deŋ belŋeŋ ne kammeke goke kandukŋeŋ nurnayiŋ. Goyenbe kamebe aman

henayiñ. ²¹ Bere kura diriñ kawan kertek nalumin forok yekeb diriñ kawan kere yenbe uliñ misiñ kurun katyen. Goyenbe diriñmiñ go kawan hekeb goke amañeñ nurdeb uliñ misiñ katyen goke biñ sir yiyyeñ. ²² Niñgeb gwahade po deñ wor hañka gabe kandukneñ nurde hañ. Gega sopte wañ denmekeb goyenter mat amañ wor po heñ hinayiñ. Irkeb al kura belen amañtiñ goyen epte ma goran diryen. ²³ Goyenterbe det kura niñ ne ma gusuñan nirnayiñ. Fudinde wor po dineñ hime, deñner det kura niñ Nanne gusuñan irnayiñ kurun gobe dunyen. ²⁴ Meheñde ne gama niraminde mat wañ wañ hañkabe ne deñner det kura niñ ma gusuñan irde hanjen. Goyenbe hañka matbe ne deñner gusuñan irde hinayiñ. Irkeb det niñ gusuñan irde hinayiñ kurun goyen duneñ hiyen. Irkeb goke amañeñ wor po nurde hinayiñ.

²⁵ “Nebe maya mere mat mere dirde himyen. Goyenbe nalu kura forok yekeb sopte ma maya mere mat mere dirde heñ. Nanneñbe kawan po mere dirde heñ. ²⁶⁻²⁷ Al Kurunbe deñ gayen bubulkuñne wor po yen nurde duneñ hi. Niñgeb go nalurebe ne deñner dindiken gusuñan irde hinayiñ. Ne belen po deñ ge teñ Nanne gusuñan ireñ ma dineñ hime. Deñbe ne niñ amañeñ nurde hanjen, irdeb nebe Al Kurun hitte mat wamiriñ goyen fudinde yen nurde hanjen geb, Adone belen deñ gayen bubulkuñne wor po yen nurd duneñ hi geb, gago dineñ hime. ²⁸ Nebe Adone hitte mat megen gar wamiriñ. Irdeb hañka gab megen ga tubul teñ Nanne hitte mulgañ hewen

tihim,” yinyiņ.

²⁹ Irkeb komatmiņ belenbe, “Be, mere dirha gabe ufurkuņ mat ma dirde mere keņkelak po dirha. ³⁰ Gebe det kuruņ ga nurde ha geb, al kura belen dufay guntek moņ yeņ genhet. Niņgeb gebe Al Kuruņ hitte mat wayariņ goyen fudinde yeņ nurde hite,” inamiņ. ³¹ Irkeb Yesu belen wol henbe, “Be, haņka gab dufaytiņ tareņ irhet ya-haņ. Gega keņkela hen ga hinayiņ! ³² Deņ gayen burgagaw kertek nalu forok yewen tiya geb. Go nalu gobe gago bikkeņ forok yihi. Irkeb nubul teņ burgagaw kerde tiyuņtiņaņ tiyuņtiņaņ kuniayiņ. Goyenbe nebe nuņkureņ ma hime, Nan-neya tumņaņ har. ³³ Mere gabe neya hen bitiņ kamke igiņ hinayiņ yeņbe gago momoņ dirhem. Megen garbe kanduk yeneņ hinayiņ. Goyenbe ne belen megen niņ tareņ go fole irmiņ geb, kanduk goke yul ma yenayiņ, saņiņ po hen hinayiņ,” yinyiņ.

17

Yesu belen komatmiņ ge teņ Al Kuruņ gusuņaņ iryiņ

¹ Be, Yesu go gwaha yinenbe kotaņ kaņ Al Kuruņ gaha inyiņ:

“Ado, nalube gago forok yihi. Urge denem turņuņ yaņ goyen kawan irayiņ. Gogab ne Urge gare wor denge turņuņ yaņ goyen kawan ireņ.

² Ge belen megen niņ alya bereya kuruņ gayen doyaņ yird yird tareņ gobe ne nunariņ. Gogab alya bereya ne nunariņ goyen geya hugiņeņ hen hen goyen yuneņ. ³ Geya hugiņ hen

heñ gote belenbe gahade: al belen Al Kurun fudindebe ge gunkuren po ha yen nurd gunen han, irde ne Yesu Kristu gayen ge belen nad nerke wamirin yen nurd nunen han gobe geya huginen heñ heñ gote belen. ⁴ Nebe megen gar meten nunarin gobe pasi irmin. Gwaha matbe saninge turun yan goyen al yikala yirmin. ⁵ Ningeb, Ado, han kabe ge hitte kwen tihim geb, megen ga ma forok yirinya geya henya sanigne turun yan hinhem gwahade goyen po nirayin.

⁶ “Be, nebe megen nin mar hitte mat alya bereya basina yirde nunarin mar goyen hitte gebe al gwahade yen kawan po yikala yirde himyen. Mel gobe gere. Ge belen ne nunkeb merege momon yirmeke nurdeb gama irde hanen. ⁷ Gayenterbe det kurun ge belen nunarin gobe ge hitte mat po watin yen nurde han. ⁸ Ge belen mere gwahade yinayin ninarin goyen yinmekeb fudinde yen nurde han. Irdeb nebe ge hitte mat wamirin gobe fudinde wor po yen nurde han. Mel gabe ge belen nad nerke wamirin goyen wor fudinde yen nurde han.

⁹ “Nebe mel gayen faran yurayin yen gusunan girde hime. Megen nin mar goke ma gusunan girde hime. Ge belen ne nunarin mar gobe gere ningeb, yen ge po ten gusunan girde hime. ¹⁰ Nere alya bereya kurun gobe gere, irde gere alya bereya kurun go wor nere. Ningeb mel gare denne turun yan wor po goyen kawan irde hanen. ¹¹ Nebe megen gar ma hen tihim, ge hitte hurken. Goyenbe mel gabe megen gar hinayin. Ado, gebe al wukken

wor po, mata bulungem moŋ. Gebe tareŋge yaŋ, irde tareŋge goyen ne nunariŋ. Niŋgeb saŋiŋger mel ga doyaŋ yirde hike al buluŋ beleŋ epte ma buluŋ yirnayiŋ. Gogab geya neya uŋkureŋ har gwahade goyen po, yeŋ wor awalikde po hinayiŋ. ¹² Neb mel gaya tumŋaŋ heŋyabe tareŋ nunariŋ gore po doyaŋ yirde petpet yirde himekeb igiŋ hinhan. Irdeb al kura ma timiyminŋ. Goyenpoga al kura bikkeŋ gwaha tiyyeŋ yeŋ asaŋger katiŋ goyen fudinde forok yeŋ yeŋ ge teŋbe al uŋkureŋ po ga mabok hiyuŋ.

¹³ “Be, gabe ge hitte hurkutek heŋ hime. Goyenbe amaŋ heŋ himyen gwahade po mel gayen wor amaŋ heŋya hiwoŋ yeŋ mere kuruŋ gago girhem. ¹⁴ Mel gabe merege momoŋ yirmeke gama irde haŋyen. Irkeb megen niŋ mar beleŋ haram yirde haŋyen. Gobe neb megen niŋ al moŋ gwahade goyen po, yeŋ wor megen niŋ al moŋ geb, gogo haram yirde haŋyen. ¹⁵ Goyenbe mel gayen megen gar mat yade siŋa yirke kanduk kura ma yeneŋ hinayiŋ yeŋ ma gineŋ hime. Gwaha titŋeŋbe al buluŋ beleŋ buluŋ yird yird niŋ pet pet yirde hayiŋ yeŋ gusaŋaŋ girde hime. ¹⁶ Nebe megen niŋ moŋ gwahade goyen po, mel gayen wor megen niŋ mar moŋ. ¹⁷ Meregebe fudinde wor po. Niŋgeb mereger mel ga saba yirke delger wukkeŋ henayiŋ. ¹⁸ Ge beleŋ nad nerke megen gar wamiriŋ gwahade goyen po, ne beleŋ wor mel gayen yad yermeke megen niŋ alya bereya hitte kunayiŋ. ¹⁹ Nebe mel gayen manaŋ gere

kudinej wor po henayinj yej nurdeb yej ge ten nigen gayen wa gunenbe gigen kudinej wor po hitinj hime.

²⁰ “Be, gusunanj girde hime gabe mel gake po monj. Kame mel gare mere tagalke mereminj nurde ne ninj dufayminj tarej irnayinj mar goke wor gusunanj girde hime. ²¹ Gogab, Ado, gebe neya hirekeb ne wor geya har gwahade goyen po, mel gayen wor gwahade po hej awalikde hinayinj. Irdeb mel gabe deyyat awalik bana hiwonj yej gusunanj girde hime. Irkeb ge belen nad nerke wamirinj goyen megen ninj mar belen fudinde yej nurnayinj. ²² Ge belen denne turnuj yaj iran gwahade po, ne wor mel ga gwaha yirhem. Gogab deyyabe unjurenj har gwahade goyen po, yej wor gwahade po hej awalikde hinayinj. ²³ Mel gore fudinde wor po awalikde hiwonj yej nurdeb gebe neya hirej, irkeb nebe yenja hitek. Gogab al hoyanj gore ge belen nad nerke wamirinj yej nurnayinj. Irde ge belen ne ninj amanenj nurde ha gwahade goyen po, mel gayen wor amanenj nurde yunen ha goyen megen ninj alya bereya belen nurnayinj.

²⁴ “Ado, ge belen al ne ninj nunarinj mar gobe ne hej gasunde kuj gor hiwonj yej nurde hime. Irdeb megen ga ma forok yekeya ne gayen bubulkunne wor po yej nurd nunenbe denne turnuj yaj irarinj goyen mel gare kenwonj yej nurde hime. ²⁵ Ado, gebe Al Huwak wor po. Megen ninj marbe ma nurd gunen hanj. Goyenbe nebe nurde gunen hime. Irde

neya hanj mar gayen wor ge belej nad nerke wamirinj goyen fudinde yej nurde hanj. ²⁶ Ne belej gebe al gwahade yej mel gar hanj gayen yikala yirde himyen. Irde kame wor gwahade po yikala yirde hej. Gogab ge belej bubulkunne wor po yej nurd nunen hayen gwahade po, yej wor gwahade po nurd yunen hayin. Irke nigenj gayen wor yenya hitek,” inyin.

18

Yesu asogo haniŋde kiryin

(Matiyu 26:47-56; Mak 14:43-50; Luk 22:47-53)

¹ Be, Yesu go Al Kurunj mere iryinj goyen pasi hejbe komatminj yagoya Pasoba binje nene hinhhan gasun go tubul tenj kwaminj. Kunj nanja dukunj kura Kidron inenj hanjen goyen fole irde kurhan kwaminj. Siŋa kurhan gonje olip he dugu kura hiyen geb, Yesuya komatminja go gor kwaminj.

² Be, Yesu asogo haniŋde kiryen al Yudas gobe Yesuya komatminj yagoya hanj kayen hanj kayen gor gabu irde hanjen goyen nurde hiyen geb, Yesube gor hi yej nuryin. ³ Niŋgeb Yudas go Roma ninj fuleja marya Al Kurunj dolonj ird ird mata doyanj mar pris buda gote karkuwanminja Farisi marya belej hulyanj yiraminj mar goyen yade Yesu hinhinde gor wayyin. Mel gobe hulsiya fulejare ninj detya yade wayaminj.

⁴ Be, Yesu go ulinje mata gwahade forok yewen tiya yej nurde hinhin geb kunjbe, “Ganunj ninj wor po nurde wayhanj?” yinenj gusunjanj yiryin.

⁵ Irkeb mel gore, “Nasaret ninj al Yesu,” inaminj.

Irkeb wol henbe, “Al gobe ne gago,” yinyiñ. Yesu asogo haniñde kiryiñ al Yudas gobe go mar goya hinhan. ⁶ Be, Yesu belej, “Al gobe ne gago,” yinkeb mel gobe tulfut yenbe harhok mat mulgañ heñ megen katamiñ. ⁷ Irkeb sopte gusuñañ yirdeb, “Ganuñ niñ wor po nurde wayhañ?” yinyiñ. Gwaha yinkeb mel goreb, “Nasaret niñ al Yesu,” inamiñ. ⁸ Irkeb wol henbe, “Al goyenbe ne gago dinhem. Ne niñ nankeney hañ kenem al neya hañ gabe yubul tike kunañ,” yinyiñ. ⁹ Mere tiyyiñ gobe hañkapy Galili hinhinyabe, “Nebe al kura ge belej nuntiñ goyen kura ma pel irmiñ,” yiriñ goyen gogo forok yiriñ.

¹⁰ Be, goya goyenbe Pitabe fulenare niñ bidila dirneñ miñañ geb, bidilamiñ go marde tenbe pris buda gote kurunmiñde meten al kura gote kirmiñ yase sapa iryiñ. Meten al gote denembe Malkus. ¹¹ Be, Pita go gwaha tikeb Yesu belej, “Bidilage go fokmiñ bana hawa! Gebe ne gayen Adone belej kanduk tawayiñ ninyiñ goyen go ma tiyyen yen nurde ha? Moñ, tewen geb,” inyiñ.

Yesube pris buda gote kurunmiñ Anas hitte tukamiñ

¹² Be, Roma niñ fulena marya gote doyañ alyabe* Yuda marte doyañ mar belej hulyañ yirke wayamiñ mar belej Yesu tamiñ. Irdeb haniñ fere tenbe ¹³ Anas hitte wa tukamiñ. Anasbe Kaiafas tenak. Irde Kaiafasbe goyen damare gobe yen belej pris buda gote kurunmiñ heñ meten ten hinhin. ¹⁴ Kaiafas goreb hañkapy,

* **18:12:** Roma niñ fulena marte doyañ al gayenbe fulena mar 1,000 gote doyañ al.

“Nanjaniniŋya neŋ almemya tumŋaŋ buluŋ hetek gobe igiŋ moŋ. Niŋgeb al unjkurenŋ gare po kamyenŋ gab kanduk kuruŋ goyen ma kentek,” yinyiŋ al go goyen.

Pita beleş haŋkapyä Yesu niŋ helwaŋ hiriŋ
(*Matiyu 26:69-70; Mak 14:66-68; Luk 22:55-57*)

¹⁵ Be, Saimon Pitaya Yesuyen komatmiŋ hoyanŋya kura goyen Yesu fere teŋbe teŋ kwamiŋ goyen gama iraryum. Komatmiŋ kura gobe pris buda gote kuruŋmiŋ beleş nurd unenŋ hiyen geb, al gobe pris buda gote kuruŋmiŋde ya kuruŋ koya milgu irtiŋ bana goŋ sawsawa al gabu irde hanyende gor Yesu teŋ hurkukeb yeŋ wor kame gama yirde hurkuriŋ. ¹⁶ Be, Pitabe ya go milgu irtiŋ koya gote yamere gor huwarde hinhin. Irkeb kadom, pris buda gote kuruŋmiŋ beleş nurd unenŋ hiyen al goreb mulgaŋ heŋ kateŋbe yamere gor metenŋ teŋ hinhin bere goyen mere irdeb Pita go teŋ koya biŋde hurkuriŋ. ¹⁷ Be, Pita go hurkuŋ hikeb yamere hinhin bere gore, “Yesu inenŋ hanŋyen al gote komatmiŋ kurabe ge gago?” inenŋ gusuŋaŋ iryiŋ. Irkeb Pita beleş wol heŋbe, “Moŋ, ne moŋ,” inyiŋ.

¹⁸ Be, naŋa meŋek wor po hiriŋ geb, ya goyenter niŋ metenŋ marya Al Kuruŋyen ya balem doyaŋ marya go uliŋ uka yirniŋ yeŋ kak kawaldebe goyen kalyaŋ kerde huwarde hinhan. Irkeb Pita mananŋ yenŋya gor huwarde kak kateŋ hinhin.

Pris buda gote kuruŋmiŋ beleş Yesu gusuŋaŋ iryiŋ
(*Matiyu 26:59-66; Mak 14:55-64; Luk 22:66-71*)

¹⁹ Be, mel go gwaha ten hikeyabe pris buda gote kurunmin belen Yesu go komatminya sabaminya nin gususunan iryin. ²⁰ Irkeb Yesu belen wol henbe, “Nebe megen nin alya bereyabe kawan po mere yirde hinhem. Nebe Yuda marte gabu yayan, irde kurabe Al Kurunyen ya balem bana gor saba yirde hinhem. Yuda mar dare gabu irde hanjende goyan huginjen kuj kawan po saba yirde hinhem. ²¹ Gega dani gusunan nirde ha? Merene nurde hinhan mar hitte kuj gusunan yirayin. Yen gab mere ten hinhem goyen nurde han geb,” yinyin.

²² Be, Yesu go gwaha yinkeb Al Kurunyen ya balem doyan al kura yen binde hinhin goreb kiminde sen uryin. Irdeb, “Pris buda gote kurunmin gayen gwaha mat ma mere irde hanjen gega, daha inhabe gago?” inyin. ²³ Irkeb wol henbe, “Mere bulun kura tihim kenem mere daminbe bulun goyen momon nira. Gega mere tihim gayen fudinde tihim kenem dani munha?” inyin.

²⁴ Be, Anas belen Yesu go hani fere titinde gwahade po pris buda gote kurunmin hoyan kura Kaiafas hitte wor ten kunan yinke ten kwamin.

Pita go sopte Yesu nin helwan hirin

(Matiyu 26:71-75; Mak 14:69-72; Luk 22:58-62)

²⁵ Be, Saimon Pita go huwarde kak katen hikeyab al kura belen, “Al gote komatmin kurabe ge gago?” inen gusunan iramin. Irkeb Pita go wol henbe, “Mon, ne mon geb,” inen helwan hirin. ²⁶ Irkeb pris buda gote kurunmin gote meten al kura, Pita belen kirmin sapa iryin al gote

kadom goreb, “Gebe Olip dugure gor yenya hike genhem,” inyiñ. ²⁷ Gwaha inkeb Pita go teban helwan hiriñ. Irkeb goya goyen po tatirok mere tiyyiñ.

Yesube Pailat diliñ mar huwaryiñ

(Matiyu 27:1-2,11-31; Mak 15:1-20; Luk 23:1-5,13-25)

²⁸ Be, Yuda marte doyañ mar belen Yesu ten Kaiafasyen yare mat Roma gabman al Yuda mar doyañ yirde hiyen al gote ya kurunđe tukamiñ. Goya goyabe nana fay urde wuk yiriñ. Irkeb Yuda mar go, “Moñgo al miñ hoyande yare kunbe Al Kurun diliñde tikiñ miñyañ hetek,” yeñ yingende saba gama irniñ yeñbe Roma gabman al gote ya biñde ma hurkamiñ. Gobe Pasoba biñge nen nen nalu kurun goyen netek yeñ nurde tiyamiñ. ²⁹ Niñgeb Pailat yingey siñare katenbe, “Da misiñde al ga merem yañ irniñ yeñ tawayhan?” yinen gusunañ yiryiñ. ³⁰ Irkeb al buda gore wol heñbe, “Al gayenbe mata bulun kura ma tiyun manhan ge hitte gaha ma tawatewoñ,” inamiñ. ³¹ Irkeb wol heñbe, “Dindiken tukun matatiñde ga merere kernañ,” yinyiñ. Irkeb mel gore, “Goyenbe neñbe al maymay saniñniniñ miñmoñ,” yamiñ. ³² Mata gobe Yesu belen gwaha mat kamen yeñ bikken mere tiyyiñ goyen go fudinde heñ heñ niñ gogo tiyamiñ.

³³ Be, Pailat go mulgañ heñ yamiñ kurunđe hurkunbe Yesu hoy iryiñ. Irke hurkukeb gusunañ iryiñ. “Ge gayen Yuda marte doyañ al kurun?” inyiñ. ³⁴ Irkeb Yesu belen, “Mere taha gobe dufayger po forok yihi ma al hoyañ belen momoñ

giran?” inyiñ. ³⁵ Irkeb Pailat belen wol henbe, “Nebe Yuda mar al moñ. Niñgeb daha mat nuren? Merere girniñ yeñ gawayhan marbe gigen al goya pris buda gote karkuwanminya gore po gawayhan. Niñgeb gebe daha wor po tiyan?” inyiñ. ³⁶ Gwaha inkeb, “Ne belen alya bereya doyan yirtek gobe megen gar niñ moñ. Megen gar niñ manhan Yuda marte doyan mar belen nad fere tiniñ yeñ wakeb meten marne belen ne basija fulenja tiwon. Goyenpoga gwahade moñ geb, gogo gwaha ma tahan,” inyiñ. ³⁷ Irkeb Pailat belen, “Be, gwahade geb, gebe doyan al kurun!” inyiñ. Irkeb wol henbe, “Doyan al kurun ninha gobe fudinde ninha. Fudinde, nebe miñ goyen goke wor po megen gar wamiriñ. Irde mere fudinde goyen tagalen yeñ wamiriñ. Niñgeb al kura mere fudinde niñ amanen nurde han marbe tumnan merene nurde han,” inyiñ. ³⁸ Irkeb Pailat belen, “Mere fudinde gobe da?” inen gusunen iryiñ. Gwaha inenbe Yuda mar hitte sinare sopte katenbe, “Nebe al ga gwaha mat kura mere ulinde irtek yeñ ma kenhem. ³⁹ Goyenbe dende matarebe Pasoba gabu nalu kurundeb ne belen mata bulun mar koyare han yen goyen un kuren kura ten sinja irde dunen himyen. Niñgeb, ‘Yuda marte doyan al kurun’ inen han yen al gayen tubul timeke sinare kuyen yeñ nurde han?” yinyiñ. ⁴⁰ Irkeb al buda kurun go taren po, “Moñ, yeñ moñ! Nenbe Barabas dunayiñ,” inamiñ. Barabasbe Roma gabman asogo irde hiyen goke ten koyare keramiñ hinhin.

19

¹ Be, mel gore gwaha yekeb Pailat go Yesu go ten usulak tinañ yen fulenã marminñ yinke usulak tiyaminñ. ² Irdeb doyañ al kurunyen tonañ umña irhet yen kañ hirwanenñ yañ kura goyen ten tukuli tenbe tonanđe keraminñ. Irdeb doyañ al kurunyen amil umñam bukkenya digulakya suluk irke bukkenñ yara hitiñ goyen tawañ hor irde unaminñ. ³ Irdeb Yesu hitte kuñ, “Gebe Yuda marte doyañ al kurunñ. Huginenñ hayiñ!” inenñ tebañ irde giwgiw irde hinhan. Irdeb kimiñde wolserenñ uraminñ.

⁴ Be, Pailat go sopte sinãre katenbe Yuda mar goyen, “Mel, nebe mere miñ goke kura al gayen merem yañ irtek yen ma nurdeb gago den hitte taktehem,” yinyiñ. ⁵ Irdeb Yesu go doyañ al kurunñ umña irtiñ yara irhet yenbe amil umñam bukkenya digulakya suluk yirke bukkenñ yara hitiñ kura hor irde unenñ, kañ hirwanenñ yañ tukuli ten tonanđe kirtiñde po sinãre katen hike kenenbe, “Al gobe gago,” yinyiñ.

⁶ Be, pris buda gote karkuwanminya Al Kurunyen ya balem doyañ marya belen Yesu go kenenbe, “Kuruse hende mayke kami! Kuruse hende mayke kami!” yen hekhok tiyaminñ. Irkeb Pailat belen wol henbe, “Nebe mere miñ goke kura merem yañ irtek ma kenhem geb, dindikenñ ga tukunñ kuruse hende maynayiñ,” yinyiñ. ⁷ Irkeb Yuda mar gore wol henbe, “Al gore yingenñ ge yen, ‘Nebe Al Kurunñ Urminñ,’ yen hiyen geb, nende sabarebe al gwahade gobe kamyenñ,” inaminñ.

⁸ Be, Pailat go gwaha yeke nurdeb kafura wor po hiriñ. ⁹ Irdeb ya binde sopte mulgañ heñ hurkuñbe, “Gebe dare niñ?” inen gusuñan iryiñ. Goyenbe Yesube wol ma hiriñ. ¹⁰ Irkeb Pailat belen, “Mere nirtek ma gira? Kuruse hende mayke kami yewen gobe gwaha girnayiñ. Munan tubul tike kwi yewen go wor gwahade po girnayiñ goyen go ma nurde ha?” inyiñ. ¹¹ Irkeb Yesu belen wol heñbe, “Al Kurun belen ge goyen doyan nird nird sañiñ goyen ma guntiñ manhan ge belen gaha ma doyan nirwoñ. Niñgeb ne nade hanger nera al gote mata bulunbe gere folek geb,” inyiñ.

¹² Be, mere go nurdeb Pailatbe Yesu go daha mat kura tubul timeke kwi yen nuryiñ gega, Yuda mar gob hewhow po ten, “Al kura al gayen tubul tike kuyenbe al gobe Roma gabman doyan al kurun Sisaryen kadom mon, asogom geb,” inamin. ¹³ Gwaha yeke Pailat go nurdeb Yesu go siñare taktenbe ya kurun gote koya bana sawsawa mere nurd nurd gasun kura “Belen Hora Po Irtiñ” inen hanjenje gor kipiryiñ. Gasun gobe Hiburu mere matbe Gabata. ¹⁴ Be, nalu gobe Pasoba binje gitik ten ten nalu, irde nanabe bankahal gwahade hewen tiyyiñ. Munan fay urkeb Sabat nalu heke Pasoba binje netek hiyyen. Be, Pailat belen Yuda mar goyen, “Doyan al kurunñbe gago,” yinyiñ. ¹⁵ Goyenbe go mar goreb, “Mayke kami! Mayke kami! Kuruse hende mayke kami!” inen hewhow tiyamin. Irkeb Pailat belen, “Doyan al kurunñ gayen ne belen kuruse hende maymeke kami yen nurde han?” yinen gusuñan yiryiñ. Irkeb

pris buda gote karkuwanmin belen wol henbe, “Nenbe doyan al kuruninin hoyan kura ma hi. Nendebe Sisar unjukan po hi,” inamin.

¹⁶ Be, Pailat go gwaha kura irtek minmon hekeb bada hen kuruse hende mayke kami yen mel goke pel iryin. Irkeb fulen mar belen Yesu tamin.

Yesu kuruse hende kamyin

(Matiyu 27:32-44; Mak 15:21-32; Luk 23:26-43)

¹⁷ Be, Yesu go kuruse go tenbe nan den kura Al Tona Kinkininde gor kurin. Den gobe Hiburu mere matbe Golgota. ¹⁸ Gorbe Yesu go kuruse hende mayamin. Yenyabe al irawa hoyan kura goyen wor yingen yingen kuruse heren gasa yirdeb kurabe Yesuyen kuruse yase belen kerde kurabe tapa belen keramin. Yesu yingenbe kahalte keramin.

¹⁹ Be, Pailat belen mere kura kanbe kuruse hende Yesu tonan belen kerna yinke keramin. Merebe gahade:

NASARET NIN AL YESU. YUDA MARTE DOYAN
AL KURUN.

²⁰ Be, Yesu kuruse hende mayamin gasun gobe Yerusalem bindere hinhin. Ningeb Yuda mar budam mere go kenamin. Mere gobe Hiburu mere, Latin mereyabe Grik mereya mat kayamin.

²¹ Irkeb pris buda gote karkuwanmin belen mere katin goke igin ma nurdeb Pailat goyen, “Yuda marte doyan al kurun ma kayayin. ‘Al garebe yingen ge yen “Nebe Yuda marte doyan al kurun,” yen hi,’ gwahade kayayin,” inamin.

²² Goyenbe Pailat belen wol henbe, “Mere kayhem gobe gwahade po hiyen,” yinyin.

²³ Be, fulenḡa mar go Yesu tenḡ kuruse hende kerdebe ulinḡ umḡaminḡ yade al sipte ninḡ gale heḡbe nende gigen yawaraminḡ. Irdeb ulinḡhorminḡ bande ninḡ gobe tubul tiyaminḡ. Ulinḡhorminḡ gobe sobam, binḡnde mat kurkuḡbe kahanḡ patare goyenbe gada irtinḡ moḡ. Amil unḡkurenḡ po tenḡ ulinḡhor goyen irtinḡ. ²⁴ Be, fulenḡa mar gob ulinḡhorminḡ goke yinḡenḡ ulinḡ, “Ga goya erek ma irtek. Ganuḡ beḡenḡ tiyyenḡ yeḡ nende matare tilinḡ tanartek,” yaminḡ. Mata gobe Al Kurunḡyen asanḡde mata gwahade forok yiyyenḡ yeḡ katinḡ gwahade po forok yirinḡ. Merebe gahade:

“Mel gore ulne umḡa yinḡenḡ ulinḡ pota yirdeb ulinḡhornenḡbe tilinḡ tanaraminḡ,” yitinḡ hi.

Tikinḡ 22:18

Ninḡeb yitinḡ gwahade po fulenḡa mar beḡenḡ mata gogo tiyaminḡ.

²⁵ Be, kuruse hinḡinḡ bindere gorbe Yesu milinḡ, milinḡde hayminḡ Klopas berem Mariayabe Makdala ninḡ Maria gore gor huwarde hinḡan. ²⁶ Irkeb Yesu go milinḡ gor kinyinḡ. Irde komatminḡ kura bubulkuḡne wor po yeḡ nurde unenḡ hinḡinḡ al go bindere gor huwarde hike kinyinḡ. Irdeb milinḡ goyen inyinḡ. “Bere, al gabe urge,” inyinḡ. ²⁷ Irdeb komatminḡ gobe, “Gabe momke,” inyinḡ. Be, gor mat hinḡinḡ kurunḡ gobe komatminḡ gore Yesu milinḡ go tenḡ yaminḡde tukunḡ doyanḡ irde hinḡinḡ.

Yesu kamyinḡ

(Matiyu 27:45-56; Mak 15:33-41; Luk 23:44-49)

²⁸ Be, komatminḡ inyinḡ kamereb metenḡminḡ kurunḡ gob pasi irhem yeḡ nurdeb Al Kurunḡyen asanḡde mere katinḡ goyen fudinḡde forok yiyyenḡ

goke tenbe, “Fe nin nira,” yiriñ. ²⁹ Irkeb gorbe wain fimiñ mukkuwen wor po hitiñ hinhin geb, mel gore amil parwek kura ten wain bana goñ fakamde hisop he kutum murunde bili irdeb isañ heñ Yesu dinonđe kiryiñ. ³⁰ Irkeb Yesu go wain fimiñ go ninam urdeb, “Meteneb pasi irhem,” yiriñ. Be, mere go muñ po yenbe urgun kanbe kamiñ.

³¹ Be, go nalu gobe Pasoba bingge gitik ten ten nalu. Munañ fay urkeb Sabat nalu heke Pasoba bingge netek hiyen. Niñgeb Yuda mar go Sabat nalure al kuruse hende po hinayinbe igiñ moñ yen nuramiñ. Irdeb Pailat gusuñañ irdeb, “Kahan yufun tenbe al hakwa go yarañ tiniñ,” yamiñ. ³² Irkeb Pailat go fulenā marmiñ yinke Yesu ketalde kuruse hende hinhin al kura go hitte wa kuñbe kahan yufun tiyamiñ. Irde gab kura wor gwahade po iramiñ. ³³ Goyenbe wañ Yesu hitte hamiñ gega, bikken kamtiñ kenenbe kahan ma yufun tiyamiñ. ³⁴ Gwaha irtineñbe fulenā al kura belen hakde dari malare fakamke goyare po dariya feya bemel po sursur yiriñ. ³⁵ (Mata go kinyiñ al goreb goke al momoñ yirde hiyen. Meremiñbe fudinde. Yenbe fudinde po yen hime yen nurde hi. Yenbe deñ asañ ga kapyañ heñ hañ mar belen fudinde yen nurnayiñ yenbe gago momoñ dirde hi.) ³⁶ Be, mata go forok yiriñ gobe Al Kurunyen asañde, “Kiñkiniñ unñkuren muñ kura ma yufun tinayiñ,” yitiñ gwahade goyen po forok yiriñ. ³⁷ Irde Al Kurunyen mere kurabe, “Yenbe hakde gegelhek belen fakamtiñ kennayiñ,” yitiñ mata gwahade goyen po forok yiriñ.

*Yesu mete tiyamin**(Matiyu 27:57-61; Mak 15:42-47; Luk 23:50-56)*

³⁸ Be, fulenja mar belej gwaha tiyamin kamereb Arimatea nin Yosep belej Yesu ulin hakwam nin Pailat gusunon iryin. Yosepbe Yesuyen komat gega, Yuda marte doyan mar nin kafura henbe balmin po hinhin. Be, Pailat belej igin inkeb kun Yesu hakwam go yenya kwamin marya belej taran tenbe ten kwamin.

³⁹ Yosep belej gwaha ten hikeya Nikodemus wor gor hinhin. Nikodemusbe hakot kura wawun kun Yesuya mere tiyaryum al go goyen. Yen belej he fimin irawa suluk yirde guram irtin hamin igin wor po goyen ten wayyin. Guram gote kandukminbe 30 kilogram gwahade. ⁴⁰ Be, irem go Yesu hakwam go ten kunbe amil faykek mete ten tende nin amil gore po bili iraryum. Irde gwaha ten henyabe he fimin guram irtin gore po sam iraryum. Irem gobe Yuda marte mata gama irdeb gwaha tiyaryum. ⁴¹ Be, Yesu kuruse hende mayamin gasun go binderebe he dugu kura hinhin. He dugu bana gonbe al hakwa yukun yerd yerd horabok bempa kura hinhin. Bempa gobe gergen, al hakwa kura ma yerde hitin. ⁴² Be, hen ga mon Sabat nalu forok yewen tiya go yenbe bempa gobe bindere hinhin geb, irem go Yesu hakwam tukun bana gor keraryum.

20*Yesube kamyinde mat huwaryin**(Matiyu 28:1-8; Mak 16:1-8; Luk 24:1-12)*

¹ Be, Sabat nalu hubu heñ fay urke Sande hirin. Sande wampot mun, kidoma po hikeya Makdala nin Maria go bembare kuñbe hora kurun horabok bamba yame pet titin goyen ten sinja irtin kinyin. ² Irdeb kup yen Saimon Pitaya kadam kura Yesu belen bubulkuñne wor po yen nurde unen hinhin al go hitte wanbe, “Doyan Al Kurun hakwambe bembare mat ten kwahan. Irdeb tukun gor kura kerhan yen ma nurhet!” yinyin. ³ Irkeb Pitaya kadam hoyan goya wor bembare kwaryum. ⁴ Irem gobe kup yen kwaryum. Goyenbe kadam gore Pita fole irde yen wa bembare forok yirin. ⁵ Forok yen pew kanbe horabok bana nankenenbe amil fayken bili irtin go po kinyin. Goyenbe binde ma hurkurin. ⁶ Irkeb Saimon Pita, kame wayyin goreb wan binde hurkurin. Irdeb amil fayken go po gor hike kinyin. ⁷ Irde Yesu tonan bili iramin amil go wor kinyin. Tonan bili irtin amil gobe ulin hakwam bili irtin amil goya ma hinhin. Kenkela po mupi irde hoyande po kirtin hinhin. ⁸ Irkeb Yesuyen komat kura yen wa bembare forok yirin al go wor binde hurkurin. Hurkun gwahade po kenenbe fudinde wor po Yesube kamunde mat huwarun yen nuryin. ⁹ (Goyenpoga irem gobe Al Kurunyen asande Yesube kamtinde mat huwaryen yitin gokeb bebek ma po tiyaryum.)

*Makdala nin Mariabe Yesu kinyin
(Matiyu 28:9-10; Mak 16:9-11)*

¹⁰ Be, Yesuyen komatmin waran go mulgan heñ yaminde kwaryum. ¹¹ Goyenbe Maria go bamba sinjare gor po heñ esen hinhin. Esen henjabe

pew kañ bamba bana goñ nañkinyiñ. ¹² Irdeb Al Kurunyen miyoñ irawa uliñ umña faykek hor yirtin goyen Yesu hakwam kirtin gasunde go keperde hike yinyiñ. Kurabe tonañ beleñ mat, kurabe kahañ beleñ mat keperaryum.

¹³ Be, irem goreb, “Bere, gebe daniñ esen ha?” inen gusunañ iraryum. Irkeb bere gore wol henbe, “Doyañ Al Kurunnebe al kura beleñ ten kwahañ. Irde tukuñ gor kura kerhañ yeñ ma nurde hime,” yinyiñ. ¹⁴ Gwaha ten fulgañ kañbe Yesu go gor huwarde hike kinyiñ. Goyenbe bebakken Yesu yeñ ma kinyiñ. ¹⁵ Irkeb Yesu beleñ, “Bere, gebe daniñ esen ha? Gebe ganuñ niñ nañkeneñ ha?” inen gusunañ iryiñ. Gwaha inkeb bere goreb he dugu bana goñ bamba hinhin gote doyañ al yeñ nurdeb, “Be, ge beleñ al hakwam bamba bana hinhin go tukañ kenem gor tukuñ kirmin yeñ momoñ nira. Irkeb tewen geb,” inyiñ. ¹⁶ Irkeb Yesu beleñ, “Maria,” inyiñ. Irkeb bere go yeñ hinhin beleñ fulgañ kañ kenenbe Hiburu mere mat, “Raboni!” inyiñ. Raboni gote miñbe Tisa.

¹⁷ Be, Yesu beleñ, “Nanne hitte mulgañ hen miñmoñ. Niñgeb sisañ ma nurayiñ. Gwaha titnenbe kolne yago hitte kuñbe momoñ yira. ‘Nebe mulgañ hen Adone, denya neyat Al Kurun hitte kwen tihim,’ nina yinayiñ,” inyiñ. ¹⁸ Irkeb Makdala niñ Maria go mere go nurdeb Yesuyen komatmin hitte kuriñ. Kuñbe, “Doyañ Al Kurunbe kenhem,” yinyiñ. Irdeb mere gahade nina yeñ momoñ yiryiñ.

Komatmiŋ beleş Yesu kenamiŋ

(Matiyu 28:16-20; Mak 16:14-18; Luk 24:36-49)

¹⁹ Be, Sande go wawunbana heŋ kidoma hewen tikeb Yesuyen komatmiŋ gobe Yuda mar niŋ kafura heŋbe tumŋaŋ ya biŋde gabu irdeb yame biŋ mat tareŋ po irdeb hinhan. Irkeb Yesu go waŋ mel go hinhan kahalte po huwardeb, “Bitiŋ kamke igiŋ po hinayiŋ,” yinyiŋ. ²⁰ Gwaha yinenbe haninya gegelhekyare fakamamiŋ delŋeŋ goyen yikala yiryiŋ. Irkeb komatmiŋ go Doyaŋ Al Kurun goyen keneŋbe amaŋ niŋ pultik wor po yamiŋ.

²¹ Be, Yesu beleş sopte po, “Bitiŋ kamke igiŋ po hinayiŋ. Nanne beleş nad nerke wamiriŋ gwahade goyen ne beleş wor dad dermeke kunayiŋ geb,” yinyiŋ. ²² Gwaha yinenbe mel go hitte meŋemiŋ fu yirdeb, “Holi Spirit tenaŋ. ²³ Irdeb deŋ beleş al kurat mata buluŋmiŋ halde yunayiŋbe Al Kurun wor mata buluŋmiŋ go halde yunyen. Munan mata buluŋmiŋ ma halde yunayiŋbe Al Kurun wor mata buluŋmiŋ ma halde yunyen,” yinyiŋ.

Tomas beleş Yesu kinyiŋ

²⁴ Be, komatmiŋ 12 goyen al kura Tomas, deŋem kurabe Didimus inen hanjen al gobe Yesu wayyiŋyabe gor ma hinhin. ²⁵ Irkeb komatmiŋ weŋ hoyan beleş, “Neŋbe Doyaŋ Al Kurun kintiŋ,” yeŋ momoŋ iramiŋ. Goyenbe wol heŋbe, “Haniŋde nil delŋeŋ wor wor yeneŋ. Irdeb nil yame bana goŋ hanne kereŋ. Irdeb hak beleş fakamtiŋ yameŋde gor hanne kerde gab fudinde yeŋ nuren,” yinyiŋ.

²⁶ Be, gor mat naŋa fay 7 hubu hekeb Yesuyen komatmiŋ go sopte ya bana gabu iramiŋ. Tomas wor gor hinhin. Yamebe biŋ mat tatiŋ goyenbe, Yesu go waŋ mel gote diliŋ mar huwardeb, “Bitiŋ kamke hinayiŋ,” yinyiŋ. ²⁷ Irdeb Tomas inyiŋ. “Hange faw gar hor irayiŋ. Irde hanne ga yena. Irdeb hange giŋ irdeb gegelhekner gar kera. Irdeb dufay budam ma heŋbe ne huwarmiŋ gayen fudinde yeŋ nurayiŋ,” inyiŋ. ²⁸ Irkeb Tomas gore, “Gebe Al Kurun, Doyaŋ Al Kurunne!” inyiŋ. ²⁹ Irkeb Yesu beley, “Gebe ne neneŋ gab gogo fudinde yeŋ nurha? Al kura go ma neneŋya ne niŋ dufaymiŋ tareŋ irnayiŋ mar gobe Al Kurun beley guram yirde saŋiŋ yiryen,” inyiŋ.

³⁰ Be, Yesube komatmiŋ diliŋde mata tiŋen turunŋ yaŋ kurayen kurayen budam forok yirde hinhin. Goyenbe asaŋ gayenter goke tumŋaŋ ma katiŋ haŋ. ³¹ Goyenbe Yesube Mesaia, Al Kurun Urmiŋ yeŋbe yeŋ ge dufaytiŋ saŋiŋ irnayiŋ yeŋ mere kurun gayen kayhem. Irde yeŋ ge dufaytiŋ tareŋ irke Yesuyen tareŋde Al Kurunya hugiŋen heŋ heŋ mata gobe dende hiyyen yeŋbe mere gago kaŋ hime.

21

Komatmiŋ 7 beley Yesu kenamiŋ

¹ Be, Yesu go komatmiŋ yago Yerusalem hikeya diliŋde forok yiriŋ kamereb Taiberias fe ala kurun siŋare sopte komatmiŋ diliŋde forok yiriŋ. Gote baraŋbe gahade: ² Be, Saimon Pita, Tomas denem kurabe Didimus, Galili naŋa bana niŋ

taun Kana gor niŋ al Nataniel, Sebedi ur-minj waranyabe kadom waraŋ hoyan manan tumŋaŋde hinhan. ³ Irkeb Saimon Pita beŋe, “Nebe fe alare dapŋa niŋ kweŋ tihim,” yinyiŋ. Irkeb mel goreb, “Tumŋaŋ kutek,” inenbe hakwa bana hurkuŋbe kwamiŋ. Goyenbe go wawuŋbe dapŋa kura ma yawaramiŋ.

⁴ Be, wampot muŋ wor po Yesu gobe waŋ makaŋ siŋare huwaryiŋ. Goyenbe komatmiŋbe Yesu yeŋ keneŋ bebak ma tiyamiŋ. ⁵ Be, Yesu beŋe mel goyen hokde po, “Mel yo, dapŋa kura yawarhaŋ we?” yinyiŋ. Irkeb, “Moŋ,” inamiŋ. ⁶ Be, mel gore gwaha inkeb, “Kamaŋtiŋ go hakwa siŋa yase beŋe mat temeyde gab dapŋa kura yawarnayiŋ,” yinyiŋ. Irkeb mel go gwaha teŋbe dapŋa karim ma yawaramiŋ geb, kamaŋ go tuluŋ teŋ hakwa hende kertek ma hamiŋ.

⁷ Irke gab komatmiŋ kura Yesu beŋe bubulkuŋne wor po yeŋ nurde unen hiyen al goreb Pita goyen, “Al irobe Doyaŋ Al Kurun be!” inyiŋ. Irkeb Saimon Pita beŋe, “Al irobe Doyaŋ Al Kurun be!” yeke nurdeb goyare po uliŋhormiŋ hende niŋ tugu titiŋ goyen teŋ uliŋde bili irdeb fete solok yiriŋ. ⁸ Irkeb komatmiŋ weŋ hoyanbe fe ala kurun feren binde 100 mita gwahade po hinhan geb, hakwa hende kame ga gama irde wayamiŋ. Gama irde waŋ heŋyabe kamaŋ dapŋa beŋe po maŋiŋ hitiŋ goyen tuluŋ teŋbe teŋ wayamiŋ. ⁹ Irdeb fe siŋare waŋbe kak kawaltiŋde kura gorbe makaŋ dapŋaya beretya kura hike yenamiŋ.

¹⁰ Be, Yesu beŋe, “Dapŋa yawarhaŋ go kura

yawanaŋ,” yinyiŋ. ¹¹ Irkeb Saimon Pita go hakwa hende hurkuŋ kamaŋ go tulun ten fe sinare kiryiŋ. Dapŋa karkuwaŋ beŋeŋ maŋiŋ hiriŋ. Dapŋabe budam wor po 153 yawaramiŋ. Goyenbe kamaŋ go ma erek yiriŋ. ¹² Be, Yesu beŋeŋ komatmiŋ goyen, “Waŋ wampotde niŋ biŋge nenaŋ,” yinyiŋ. Goyenbe yeŋbe Doyaŋ Al Kuruŋ yeŋ nuramiŋ geb, komatmiŋ kura beŋeŋ, “Gebe ganuŋ?” yeŋ gusuŋaŋ ma iramiŋ. ¹³ Irkeb Yesu go waŋ beret go tenbe yunyiŋ. Irdeb dapŋa goyen wor gwahade po iryiŋ. ¹⁴ Be, Yesu go kamyiŋde mat huwaryiŋ, irde komatmiŋ yago hitte forok yiriŋ goyen gare irkeb wawuŋ karwo hiriŋ.

Yesu beŋeŋ Pita tareŋ iryiŋ

¹⁵ Be, komatmiŋ go biŋge nene pasi hamiŋ. Irkeb Yesu beŋeŋ Saimon Pita go, “Saimon, Yon urmiŋ, ge gayen fudinde wor po ne niŋ amaŋeŋ nurde ha? Mel gar haŋ gare ne niŋ amaŋeŋ nurde haŋ gote folek?” inyiŋ. Irkeb Pita beŋeŋ wol heŋbe, “Gwaha, Doyaŋ Al Kuruŋ. Gebe ne beŋeŋ ge niŋ amaŋeŋ nurde hime goyen nurde ha gogo,” inyiŋ. Irkeb, “Sipsipne paka yirde hayiŋ,” inyiŋ. ¹⁶ Irdeb sopte po, “Saimon, Yon urmiŋ, gebe fudinde wor po ne niŋ amaŋeŋ nurde ha?” inyiŋ. Irkeb Saimon beŋeŋ, “Gwaha, Doyaŋ Al Kuruŋ, ne beŋeŋ ge niŋ amaŋeŋ nurde hime gobe nurde ha gogo,” inyiŋ. Irkeb wol heŋbe, “Sipsipne doyaŋ yirde hayiŋ,” inyiŋ. ¹⁷ Be, wawuŋ karwore sopte, “Saimon, Yon urmiŋ, gebe ne niŋ amaŋeŋ nurde ha?” inyiŋ. Irkeb Pita go Yesu beŋeŋ, “Gebe ne niŋ amaŋeŋ nurde ha?” gwahade wawuŋ

karwore gusuṅaṅ irkeb biṅ misiṅ iryiṅ. Irkeb Pita go, “Doyaṅ Al Kuruṅ, gebe det kuruṅ gayen tumṅaṅ nurde ha. Ge niṅ amaṅeṅ nurde hime goyen nurde ha gogo,” inyiṅ. Irkeb Yesu go wol heṅbe, “Sipsipne paka yirde hayiṅ. ¹⁸ Fudinde wor po gineṅ hime, ulger igiṅ heṅyabe gigeṅ umṅa teṅ goṅ kura kwe yeṅbe mali ga kuṅ hinhan. Goyenbe salanneṅ hawayiṅyabe al beleṅ po ganarde umṅa girdeb ge kutek ma girde hiyeṅ beleṅ goṅ gukunayiṅ,” inyiṅ. ¹⁹ Yesu beleṅ go yiriṅ gobe kame Pita daha mat kamyenṅ, irde kamde kamde miṅ gore Al Kuruṅ deṅem turṅuṅ yaṅ iryeṅ goke inyiṅ. Be, Yesu go gwaha inenṅbe, “Gama nira!” inyiṅ.

²⁰ Irkeb Pita go fulgaṅ kaṅbe Yesu beleṅ komatmiṅ kura bubulkunṅe wor po yeṅ nurde unenṅ hiyeṅ al goyen gama yirde hike kinyiṅ. Al gobe Yesu kameṅ go yeṅya biṅge funaṅ namiṅya Yesu hitte tawuṅ heṅbe, “Doyaṅ Al Kuruṅ, ganuṅ beleṅ pel gireṅ tiya?” inyiṅ al go goyen. ²¹ Be, Pita beleṅ al go keneṅbe, “Doyaṅ Al Kuruṅ, munaṅ al gabe daha tiyyenṅ?” inenṅ gusuṅaṅ iryiṅ. ²² Irkeb Yesu beleṅ wol heṅbe, “Yeṅbe diliṅ gergeṅ hikeya ne mulgaṅ heweṅ yeṅ nurenṅ gobe gere samuṅ moṅ geb. Hoyaṅ niṅ ma dufay hawayiṅ, gama po nirayiṅ,” inyiṅ. ²³ Be, Yesu beleṅ mere tiyyiṅ gote mere momoṅbe komatmiṅ yago hoyan beleṅ nurdeb keṅkela ma bebak teṅbe, “Al gobe ma kamyenṅ,” yamiṅ. Gega Yesu beleṅbe, “Al go ma kamyenṅ,” yeṅ ma yiriṅ. “Yeṅbe diliṅ gergeṅ hikeya ne mulgaṅ heweṅ yeṅ nurenṅ gobe gere samuṅ moṅ geb,” po yiriṅ.

²⁴ Yesuyen komat gobe Yesu belen mata ten hike yinyin kurun goyen asande gar kaya gago. Al gore Yesuyen baran asande gar kan hi kurun gabe fudinde yen nurde hite.

²⁵ Be, Yesube mata hoyan manan budam tiyyin. Asande gar kan hi gayen po mon. Matamin go tunnan katekbe megen gar asan goyen yerd yerd gasun minmon hiyyen yen nurde hime. Gogo po.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 3 Mar 2023 from source files dated 9 Oct 2020

dbba218f-41f3-5f08-b0b6-2a7c919093ab